

ओं नमः परमात्मने, श्री महागणपतये नमः,

श्री गुरुभ्यो नमः

हरिः ओं

कृष्ण यजुर्वेदीय तैत्तिरीय संहिता

षष्ठं काण्डं

Note: Please refer to the book, TS Kandam 1 for notes and conventions used in this Compilation.

Contents

6 कृष्ण यजुर्वेदीय तैत्तिरीय संहितायां षष्ठं काण्डं	3
6.1 षष्ठकाण्डे प्रथमः प्रश्नः – सोममन्त्रब्राह्मणनिरूपणं.....	3
6.2 षष्ठकाण्डे द्वितीयः प्रश्नः – सोममन्त्रब्राह्मणनिरूपणं.....	38
6.3 षष्ठकाण्डे तृतीयः प्रश्नः – सोममन्त्रब्राह्मणनिरूपणं.....	66
6.4 षष्ठकाण्डे चतुर्थः प्रश्नः – सोममन्त्रब्राह्मणनिरूपणं.....	94
6.5 षष्ठकाण्डे पञ्चमः प्रश्नः – सोममन्त्रब्राह्मणनिरूपणं.....	118
6.6 षष्ठकाण्डे षष्ठः प्रश्नः – सोममन्त्रब्राह्मणनिरूपणं.....	138

ओं नमः परमात्मने, श्री महागणपतये नमः,
श्री गुरुभ्यो नमः, हरिः ओं

6 कृष्ण यजुर्वेदीय तैत्तिरीय संहितायां षष्ठं काण्डं

6.1 षष्ठकाण्डे प्रथमः प्रश्नः – सोममन्त्रब्राह्मणनिरूपणं

6.1.1.1

प्राचीनव॒शं॑ करोति देवमनु॒ष्या दि॒शो व्य॑भजन्त प्राचीं॑ दे॒वा
दक्षि॑णा पि॒तरः प्र॒तीचीं॑ मनु॒ष्या उदी॑ची॒ रुद्रा॑ यत् प्राचीनव॒शं॑
करोति॑ दे॒वलोक॑मे॒व तद्-यज॑मान उ॒पाव॑र्तते परि श्रयत्यन्त॒र्हि॒तो
हि दे॒वलोक॑ो मनु॒ष्यलो॒का-न्नास्माल्लो॒कात् स्व॑तव्यमिवेत्याहुः॑ को
हि तद्-वेद॑ यद्-यमु॒ष्मिन् लो॒केऽस्ति॑ वा न वेति॑ दि॒क्ष्वती॑
का॒शान् करो॑ - [] 1

6.1.1.2

-त्यु॒भयो॑र्लो॒कयो॑-रभिजित्यै॑ केशश्मश्रु॑ वपते॒ नखानि॑ नि कृ॒न्तते॑
मृ॒ता वा ए॒षा त्वग॑मे॒ध्या यत् केश॑श्मश्रु॑ मृ॒तामे॒व त्वच॑म-मे॒ध्याम॑प॒हत्य॑

य॒ज्ञियो॑ भू॒त्वा मे॒धमु॒पैत्य॑ङ्गिर॒सः सु॒वर्गं॑ लो॒कं य॑न्तोऽप्सु
 दी॒क्षात॑पसी प्रावे॑शयन्नप्सु स्ना॑ति साक्षादे॒व दी॒क्षात॑पसी अ॒व
 रुन्धे ती॒र्थे स्ना॑ति ती॒र्थे हि ते तां प्रावे॑शयन् ती॒र्थे स्ना॑ति- [] 2

6.1.1.3

ती॒र्थमे॒व स॒माना॑नां भवत्यपोऽ॒श्नात्य॑न्तरत ए॒व मे॒ध्यो भ॑वति वास॒सा
 दी॒क्षय॑ति सौ॒म्यं वै क्षौ॑मं दे॒वत॑या सोम॒मेष दे॒वता॑मुपैति यो दी॒क्षते
 सोम॑स्य त॒नूर॑सि त॒नुवं मे पा॑हीत्याह स्वा॒मेव दे॒वता॑मुपैत्यथो
 आ॒शिष॑मे॒वैता॑मा शा॒स्ते ऽग्ने॑स्तूषा॒धानं॑ वा॒योर्वा॑त॒पानं॑ पि॒तृणां॑
 नी॒विरोष॑धीनां प्र॒घात॑- [] 3

6.1.1.4

आ॒दि॒त्यानां॑ प्राची॒नता॑नो वि॒श्वेषां॑ दे॒वाना॑मोतु नक्ष॒त्राणा-
 मती॒काशा॑स्तद्वा ए॒तथ् सर्व॑ दे॒वत्यं॑ यद्-वा॒सो यद्-वा॒ससा दी॒क्षय॑ति
 सर्वा॑भिरे॒वैनं॑ दे॒वता॑भिर्दी॒क्षय॑ति ब॒हिः प्रा॑णो वै म॒नुष्य॑स्त-स्या॒शनं॑
 प्रा॒णो-ऽश्ना॑ति स॒प्राण ए॒व दी॒क्षत॑ आ॒शितो॑ भवति यावा॑ने॒वास्य॑

प्रा॒णस्ते॑न॒ सह॑ मे॒धमु॑पैति॒ घृतं॑ दे॒वानां॑ म॒स्तु पि॒तॄणां॑ नि॒ष्प॒क्वं
म॒नु॒ष्याणां॑ तद्वा- [] 4

6.1.1.5

ए॒त॒थ् स॑र्वदे॒वत्यं॑ य॒न्नव॑नीतं॒ य॒न्नव॑नीतेनाभ्य॒ङ्गे स॑र्वा ए॒व दे॒वताः॑
प्री॒णाति॑ प्र॒च्युतो॑ वा ए॒षोऽस्मा॑ल्लो॒काद॑गतो दे॒वलोकं॑ यो दी॒क्षितो॑
ऽन्त॑रे॒व न॑वनीतं॒ तस्मा॑-न्नवनीतेनाभ्य॒ङ्गे ऽनु॑लो॒मं य॑जुषा॒ व्यावृ॑त्या
इ॒न्द्रो वृ॒त्रम॑हन् तस्य॒ कनी॑निका॒ परा॑ऽप॒तत् तदा॑ज्जनम-भवद्यदाङ्गे
चक्षु॑रे॒व भ्रा॑तृव्यस्य वृ॒ङ्गे दक्षि॑णं॒ पूर्वा॑मा॒ङ्गे - [] 5

6.1.1.6

स॒व्य॑ हि पूर्वं॒ म॒नु॒ष्या आ॑ज्जते न नि॒ धाव॑ते नी॒व हि म॒नु॒ष्या
धा॒वन्ते॑ पञ्च॒ कृत्व॑ आ॒ङ्गे पञ्चा॑क्षरा॒ पङ्क्तिः॑ पाङ्क्तो॒ यज्ञो॑ य॒ज्ञमे॒वाव॑
रु॒न्धे परि॑मितमाङ्गे॒ ऽपरि॑मित॒ हि म॒नु॒ष्या आ॑ज्जते स॒तूल॑याऽऽङ्गे-
ऽप॒तूल॑या हि म॒नु॒ष्या आ॑ज्जते॒ व्यावृ॑त्यै यदप॒तूल॑याज्जीत॒ वज्र॑ इ॒व
स्या॑थ् स॒तूल॑याऽऽङ्गे मि॒त्रत्वा॑ये- [] 6

6.1.1.7

–न्द्रो॑ वृ॒त्रम॑ह॒न्त्सोऽ॑(१)पोऽ॑(१)भ्य॑म्रियत तासां॑ य॒न्मे॑ध्यं॑ य॒ज्ञिय॑ञ्
 सदे॑वमासीत् तद॑पोद॒क्राम॑त् ते द॒र्भा अभ॑वन् यद्दर्भ॑पुञ्जीलैः पव॑यति
 या ए॒व मे॑ध्या य॒ज्ञियाः सदे॑वा आ॒पस्ता॑भिरे॒वैनं॑ पव॑यति द्वाभ्यां॑
 पव॑यत्य–हो॒रात्रा॑भ्यामे॒वैनं॑ पव॑यति त्रि॒भिः पव॑यति त्रय॑ इ॒मे लो॒का
 ए॒भिरे॒वैनं॑ लो॒कैः पव॑यति प॒ञ्चभिः॑ – [] 7

6.1.1.8

पव॑यति प॒ञ्चाक्ष॑रा प॒ङ्क्तिः पाङ्क्तो॑ य॒ज्ञो य॒ज्ञायै॑वैनं॑ पव॑यति षड्भिः॑
 पव॑यति षड्वा ऋ॒तव॑ ऋ॒तुभि॑रे॒वैनं॑ पव॑यति सप्त॑भिः पव॑यति सप्त
 छन्दा॑ञ्सि छन्दा॑भिरे॒वैनं॑ पव॑यति नव॑भिः पव॑यति नव॑ वै पु॒रुषे॑ प्रा॒णाः
 सप्रा॑णमे॒वैनं॑ पव॑यत्ये॒कवि॑ञ्शत्या पव॑यति द॒श ह॑स्त्या अ॒ङ्गुल॑यो द॒श
 प॒द्मा आ॒त्मैक॑वि॒ञ्शो यावा॑ने॒व पु॒रुष॑स्तमपरि॒वर्गं॑ – [] 8

6.1.1.9

पव॑यति चि॒त्पति॑स्त्वा पु॒नात्वित्या॑ह म॒नो वै चि॒त्पति॑र्म॒नसै॒वैनं॑
 पव॑यति वाक्प॑तिस्त्वा पु॒नात्वित्या॑ह वा॒चैवैनं॑ पव॑यति दे॒वस्त्वा स॑विता
 पु॒नात्वित्या॑ह स॒वितृ॑प्रसूत ए॒वैनं॑ पव॑यति तस्य॑ ते पवि॒त्रप॑ते पवि॒त्रेण॑

यस्मै॑ कं पु॒ने तच्छ॑के॒यमि॒त्या-हाऽऽ*शि॒षमे॑वैता॒मा शा॑स्ते । 9

(अ॒तीका॑शान् क॒रोत्य॑ - वे॒शयन्॑ ति॒र्थ स्ना॑ति - प्र॒घातो॑ -
म॒नुष्या॑णां तद्वा - आऽङ्गे॑ - मि॒त्रत्वाय॑ - पञ्च॒भि - रप॑रि॒वर्ग -
म॒ष्टाच॑त्वारि॒ंशच्च॑) (A1)

6.1.2.1

याव॑न्तो वै दे॒वा य॒ज्ञाया॑पुन॒त त ए॒वाभ॑वन् य ए॒वं वि॒द्वान् य॒ज्ञाय॑
पुनी॑ते भव॒त्येव॑ ब॒हिः प॑वयित्वाऽन्तः प्र पा॒दय॑ति म॒नुष्य॑लो॒क
ए॒वैनं॑ प॑वयित्वा पू॒तं दे॒वलो॒कं प्र ण॑यत्यदी॒क्षित॑ ए॒कयाऽऽहु॑त्येत्याहुः
स्रु॒वेण॑ चत॒स्रो जु॑होति दी॒क्षित॑त्वाय स्रु॒चा पञ्च॑मीं पञ्चाक्ष॒रा प॒ङ्क्तिः॑
पा॒ङ्क्तो य॒ज्ञो य॒ज्ञमे॒वाव॑ रुन्ध आ॒कू॒त्यै प्र॑युजेऽग्नये- [] 10

6.1.2.2

स्वा॒हेत्या॒हाऽऽकू॑त्या हि पु॒रुषो॑ य॒ज्ञम॑भि प्र॒युङ्क्ते॑ य॒जेये॑ति मे॒धायै॑
म॒नसे॑ऽग्नये स्वा॒हेत्या॒ह मे॒धया॑ हि म॒नसा॑ पु॒रुषो॑ य॒ज्ञम॑भिगच्छति
स॒रस्व॑त्यै पू॒ष्णो॑ऽग्नये स्वा॒हेत्या॒ह वा॒ग्वै स॒रस्व॑ती पृथि॒वी पू॒षा वा॒चैव॑
पृथि॒व्या य॒ज्ञं प्र॑युङ्क्त आपो॑ दे॒वी-बृ॑हती-वि॒श्वशं॑भुव इत्या॒ह या॑ वै

वर्षा॒स्ता- [] 11

6.1.2.3

आपो॑ दे॒वी-र्बृ॒हती-र्वि॒श्वशं॑भुवो यदेतद्-यजु॒र्न ब्रू॒याद्-दि॒व्या
 आपो॑ऽऽन्ता इ॒मं लो॒कमा ग॑च्छेयुरापो दे॒वी-र्बृ॒हती-र्वि॒श्वशं॑भुव
 इत्या॑हास्मा ए॒वैना॑ लो॒काय॑ शमयति तस्मा॑च्छान्ता इ॒मं लो॒कमा
 ग॑च्छन्ति द्यावापृ॒थिवी॑ इत्या॑ह द्यावापृ॒थिव्योर्हि॑ य॒ज्ञ उ॒र्वन्तरि॑क्ष-
 मित्या॑हान्तरि॒क्षे हि॑ य॒ज्ञो बृ॒हस्पति॑र्नो ह॒विषा॑ वृ॒धात्वि- [] 12

6.1.2.4

-त्या॑ह ब्र॒ह्म वै दे॒वानां॑ बृ॒हस्पति॑-र्ब्र॒ह्मणै॒वास्मै॑ य॒ज्ञमव॑ रुन्धे यद्-
 ब्रू॒याद्-वि॒धेरिति॑ य॒ज्ञस्था॑णुमृ॒च्छेद्-वृ॒धात्वित्या॑ह य॒ज्ञस्था॑णुमेव परि
 वृ॒णक्ति॑ प्र॒जापति॑-र्य॒ज्ञमसृ॑जत सोऽस्मा॑त् सृष्टः॑ प॒राडै॒थ् स प्र
 यजु॑र॒व्लीना॑त् प्र साम॒ तमृ॑गुदयच्छद्-यदृ॑गुदयच्छत्
 तदौ॑द्-ग्र॒हण॑स्यौ॑द्-ग्र॒हण॑त्व मृ॒चा- [] 13

6.1.2.5

जुहोति॑ य॒ज्ञस्यो॑द्यत्या अनु॒ष्टुप्-छ॒न्दसा॑-मुदयच्छदित्या॑-
 हु॒स्तस्मा॑दनु॒ष्टुभा॑ जुहोति॑ य॒ज्ञस्यो॑द्यत्यै द्वाद॑श वा॒थ्सब॑न्धान्युदयच्छ-

न्रित्याहु-स्तस्माद्- द्वादशभि-र्वाथ्सबन्धविदो दीक्षयन्ति सा वा
 एषर्गानुष्टुग्-वागानुष्टुग्-यदेतयर्चा दीक्षयति वाचैवैनं सर्वया दीक्षयति
 विश्वे देवस्य नेतुरित्याह सावित्र्येतेन मर्तो वृणीत सख्य- [] 14

6.1.2.6

-मित्याह पितृदेवत्यैतेन विश्वे राय इषुध्यसीत्याह वैश्वदेव्यैतेन द्युम्नं
 वृणीत पुष्यस इत्याह पौष्ण्यैतेन सा वा एषर्ख्सर्वदेवत्या यदेतयर्चा
 दीक्षयति सर्वाभिरेवैनं देवताभिर्दीक्षयति सप्ताक्षरं प्रथमं
 पदमष्टाक्षराणि त्रीणि यानि त्रीणि तान्यष्टावुप यन्ति यानि चत्वारि
 तान्यष्टौ यदष्टाक्षरा तेन- [] 15

6.1.2.7

गायत्री यदेकादशाक्षरा तेन त्रिष्टुग्यद् द्वादशाक्षरा तेन जगती
 सा वा एषर्ख्सर्वाणि छन्दांसि यदेतयर्चा दीक्षयति सर्वेभिरेवैनं
 छन्दोभिर्दीक्षयति सप्ताक्षरं प्रथमं पदं सप्तपदा शक्वरी पशवः
 शक्वरी पशूनेवाव रुन्ध एकस्मादक्षरादनाप्तं प्रथमं पदं
 तस्माद्-यद्-वाचोऽनाप्तं तन्मनुष्या उप जीवन्ति पूर्णया जुहोति ()

पूर्ण इव हि प्रजापतिः प्रजापतेराप्त्यै न्यूनया जुहोति न्यूनाद्धि
प्रजापतिः प्रजा असृजत प्रजानां सृष्ट्यै । 16

(अ॒ग्नये॑ - ता - वृ॒धात्वृ॑ - चा - स॒ख्यं - तेन॑ - जुहोति॑ -
पञ्चदश॑ च) (A2)

6.1.3.1

ऋ॒ख् सामे॑ वै दे॒वेभ्यो॑ य॒ज्ञाया॑ऽतिष्ठ॒माने॑ कृ॒ष्णो रू॒पं कृ॒त्वा-
ऽप॒क्रम्या॑तिष्ठतां तेऽम॒न्यन्त॑ यं वा इ॒मे उपा॑व॒थ्स्य॑तः स इ॒दं
भवि॑ष्यतीति ते उ॒पा॒मन्त्र॑यन्त ते अ॒हो॒रा॒त्रयो॑-र्महि॒मान॑-मप॒नि॒धाय॑
दे॒वानु॑पावर्तेतामेष वा ऋ॒चो वर्णो॑ यच्छुक्लं कृ॒ष्णाजि॑नस्यैष साम्नो
यत् कृ॒ष्णमृ॑ख्सामयोः शिल्पे॑ स्थ इत्याह॒र्ख्सामे॑ ए॒वाव

रुन्ध एष- [] 17

6.1.3.2

वा अ॒हो वर्णो॑ यच्छुक्लं कृ॒ष्णाजि॑नस्यैष रा॒त्रिया॑ यत् कृ॒ष्णं
यदे॒वैन॑योस्तत्र न्य॒क्तं तदे॒वाव रुन्धे॑ कृ॒ष्णाजि॑नेन दीक्षयति
ब्र॒ह्म॒णो वा ए॒तद्-रू॒पं यत् कृ॒ष्णाजि॑नं ब्र॒ह्म॒णैवैनं॑ दीक्षयतीमां

धिय॑ꣳ शि॒क्ष॑मा॒णस्य॑ दे॒वेत्या॑ह यथाय॒जुरे॒वैतद्-ग॒र्भो वा ए॒ष
यद्-दी॑क्षित॒ उल्बं॑ वा॒सः प्रो॑र्णु॒ते तस्मा॑द्- [] 18

6.1.3.3

ग॒र्भाः प्रा॑वृ॒ता जा॑यन्ते न पु॒रा सोम॑स्य॒ क्रया॑दपो॒र्णीत॑ यत् पु॒रा
सोम॑स्य॒ क्रया॑दपो॒र्णीत॑ ग॒र्भाः प्र॒जानां॑ प॒रापा॑तु॒काः स्युः क्री॑ते
सोमेऽपो॑र्णु॒ते जा॑यत ए॒व तद॑थो यथा व॒सीयाꣳ सं प्र॑त्यपो॒र्णुते
तादृ॑गे॒व तद॑ङ्गि॒रसः॑ सु॒वर्गं॑ लो॒कं य॑न्त ऊ॒र्जं व्य॑भजन्त
ततो॑ यद॒त्यशि॑ष्यत ते श॒रा अ॒भव॒न्नू॒र्वे श॒रा यच्छ॑र॒मयी- [] 19

6.1.3.4

मे॒खला॑ भव॒त्यूर्ज॑मे॒वाव रु॑न्धे म॒ध्यतः॑ सं॒नह्य॑ति म॒ध्यत॑ ए॒वास्मा
ऊ॒र्जं द॑धाति तस्मा॒न्मध्य॑त ऊ॒र्जा भु॑ञ्जत ऊ॒र्ध्वं वै पु॑रुष॒स्य
नाभ्यै॑ मे॒ध्य-म॒वाची॑न-म॒मेध्यं॑ य॒न्मध्य॑तः सं॒नह्य॑ति मे॒ध्यं
चै॒वास्या॑मे॒ध्यं च॑ व्या॒वर्त॑यतीन्द्रो वृ॒त्राय॑ वज्रं प्रा॒हर॑त् स त्रे॒धा
व्य॑भव॒त् स्फ्य॑स्तृ॒तीयꣳ र॒थस्तृ॒तीयं॑ यूप॒स्तृ॒तीयं- [] 20

6.1.3.5

यै॑ऽन्तः॑ शरा॑ अशी॑र्यन्त॑ ते शरा॑ अभवन्॑ तच्छरा॑णां॑ शर॑त्वं
 वज्रो॑ वै शराः॑ क्षुत्॑ खलु॑ वै मनु॑ष्यस्य॑ भ्रातृ॑व्यो यच्छर॑मयी॑
 मेख॑ला भवति॑ वज्रेणै॑व साक्षात्॑ क्षुधं॑ भ्रातृ॑व्यं मध्यतो॑ऽप हते॑
 त्रिवृ॑द्-भवति॑ त्रिवृ॑द्वै प्राण॑स्त्रिवृ॑तमे॒व प्राणं॑ मध्यतो॑ यज॑माने
 दधा॑ति पृ॒थ्वी भवति॑ रज्जू॑नां व्यावृ॑त्यै मेख॑लया॒ यज॑मानं॑ दीक्षयति॑
 योक्त्रेण॑ पत्नीं॑ मिथु॑नत्वाय- [] 21

6.1.3.6

यज्ञो॑ दक्षि॑णाम॒भ्यध्या॑यत् तां॑ सम॑भवत् तदिन्द्रो॑-ऽचाय॑थ् सोऽम॑न्यत॑
 यो वा इ॒तो ज॑निष्यते॒ स इ॒दं भ॑विष्यतीति॒ तां प्रा॑विशत् तस्या॒ इन्द्रो॑
 ए॒वाजा॑यत॒ सोऽम॑न्यत॒ यो वै म॑दितो॒ ऽपरो॑ ज॒निष्य॑ते स इ॒दं
 भ॑विष्यतीति॒ तस्या॑ अनु॒मृश्य॑ योनि॒मा-ऽच्छि॑नथ् सा सू॒तव॑शाऽभवत्
 तथ् सू॒तव॑शा॒यै ज॑न्म- [] 22

6.1.3.7

ता॒ ह॒स्ते न्य॑वेष्ट॒यत॑ तां मृ॒गेषु॑ न्य॒दधा॑त् सा कृ॒ष्णवि॑षाणा-
 ऽभ॒वदिन्द्र॑स्य यो॒निर॑सि मा मा हि॒सीरि॑ति कृ॒ष्णवि॑षाणां प्र य॒च्छति॑
 सयो॒निमे॒व य॒ज्ञं करो॑ति सयो॒निं दक्षि॑णा॒ सयो॒निमिन्द्र॑
 सयो॒नित्वा॑य कृ॒ष्यै त्वा सु॑स॒स्याया॑ इत्याह तस्मा॑दकृ॒ष्टप॑च्या ओष॒धयः॑
 पच्य॑न्ते सु॒पिप्प॒लाभ्य॑स्त्वौष॒धीभ्य॑ इत्याह तस्मा॑दोष॒धयः॑ फलं
 गृह्ण॑न्ति यद्ध॒स्तेन॑- [] 23

6.1.3.8

कण्डू॑येत॒ पाम॑नं भा॒वुकाः॑ प्र॒जाः स्यु॑र्यथ् स्म॒र्येत॑ न॒ग्नं भा॒वुकाः॑
 कृ॒ष्णवि॑षाणया॒ कण्डू॑यतेऽपि॒गृह्य॑ स्म॒र्यते॑ प्र॒जानां॑ गो॒पीथा॑य न पु॒रा
 दक्षि॑णाभ्यो ने॒तौः कृ॒ष्णवि॑षाणाम॒व चृ॑तेद्यत् पु॒रा दक्षि॑णाभ्यो ने॒तौः
 कृ॒ष्णवि॑षाणाम॒व चृ॑तेद्यो॒निः प्र॒जानां॑ प॒रापा॑तु॒का स्या॑न्नी॒तासु॑ दक्षि॑णासु
 चा॒त्वाले॑ कृ॒ष्णवि॑षाणां प्रा॒स्यति॑ यो॒निर्वै य॒ज्ञस्य॑ चा॒त्वालं॑ यो॒निः
 कृ॒ष्णवि॑षाणा यो॒नावे॒व यो॒निं द॑धाति य॒ज्ञस्य॑ सयो॒नित्वा॑य । 24

(रु॒न्ध ए॒ष - तस्मा॑ - च्छ॒रम॑यी - यू॒पस्तृ॑तीयं - मिथु॒नत्वा॑य -

जन्म - हस्तेना - ऽष्टाचत्वारिंशच्च) (A3)

6.1.4.1

वाग्वै देवेभ्यो ऽपाक्रामद्-यज्ञायातिष्ठमाना सा वनस्पतीन् प्राविशत्
सैषा वाग्वनस्पतिषु वदति या दुन्दुभौ या तूणवे या वीणायां
यद्-दीक्षितदण्डं प्रयच्छति वाचमेवाव रुन्ध औदुंबरो भवत्यूर्वा
उदुंबर ऊर्जमेवाव रुन्धे मुखेन संमितो भवति मुखत एवास्मा
ऊर्जं दधाति तस्मान् मुखत ऊर्जा भुञ्जते- [] 25

6.1.4.2

क्रीते सोमे मैत्रावरुणाय दण्डं प्र यच्छति मैत्रावरुणो हि पुरस्ता -
दृत्विग्भ्यो वाचं विभजति तामृत्विजो यजमाने प्रति ष्ठापयन्ति स्वाहा
यज्ञं मनसेत्याह मनसा हि पुरुषो यज्ञमभिगच्छति स्वाहा
द्यावापृथिवीभ्या -मित्याह द्यावापृथिव्योर्.हि यज्ञः स्वाहोरोर-न्तरिक्षा
-दित्याहान्तरिक्षे हि यज्ञः स्वाहा यज्ञं वातादा रभ इत्याहायं-[] 26

6.1.4.3

वाव यः पवते स यज्ञस्तमेव साक्षादा रभते मुष्टी करोति वाचं
यच्छति यज्ञस्य धृत्या अदीक्षिषायं ब्राह्मण इति त्रिरुपांश्वाह

दे॒वेभ्य॑ ए॒वैनं॑ प्रा॒ऽऽह॑ त्रि॒रुच्चै॑रु॒भयै॑भ्य ए॒वैनं॑ दे॒वमनु॑ष्येभ्यः
प्रा॒ऽऽह॑ न पु॒रा नक्ष॑त्रेभ्यो वाचंँ वि सृ॒जेद्-यत्पु॒रा नक्ष॑त्रेभ्यो
वाचंँ वि॒सृजे॑द्-य॒ज्ञंँ वि॒च्छिन्द्वा॑- [] 27

6.1.4.4

-दु॒दिते॑षु नक्ष॑त्रेषु व्र॒तं कृ॑णुतेति वाचंँ वि सृ॒जति॑ य॒ज्ञव्र॑तो वै
दी॒क्षितो॑ य॒ज्ञमे॒वाभि॑ वाचंँ वि सृ॒जति॑ यदि वि॒सृजे॑द्-वै॒ष्णवी॑मृ॒चमनु॑
ब्रू॒याद्-य॒ज्ञो वै वि॒ष्णुर्य॒ज्ञेनै॒व य॒ज्ञंँ सं त॑नोति दै॒वीं धि॒यं म॑नामह
इ॒त्याह॑ य॒ज्ञमे॒व तन्म्र॑दयति सु॒पा॒रा नो॑ अ॒सद्व॑श इ॒त्याह॑ व्यु॒ष्टिमे॒वाव
रु॒न्धे- [] 28

6.1.4.5

ब्र॒ह्मवा॑दि॒नो व॑दन्ति हो॒तव्यं॑ दी॒क्षित॑स्य गृ॒हा(३) इ॒ न हो॒तव्या॑(३)मि॒ति
ह॒विर्वै दी॒क्षितो॑ य॒ज्जुहु॑याद्-य॒जमा॑नस्याव॒दाय॑ जुहु॒याद्-य॒न्न
जुहु॑याद्-य॒ज्ञप॑रु॒रन्तरि॑याद्ये दे॒वा म॑नो॒जाता॑ म॒नोयु॑ज इ॒त्याह॑ प्रा॒णा
वै दे॒वा म॑नो॒जाता॑ म॒नोयु॑जस्तेष्वे॒व प॑रोक्षं जुहोति त॒न्नेव॑ हु॒तं
ने॒वाहु॑तं॑ स्व॒पन्तंँ वै दी॒क्षितंँ॑ र॒क्षांँ सि॑ जिघांँसन्त्यग्निः- [] 29

6.1.4.6

खलु॒ वै र॒क्षो॒हा॒ग्ने त्व॑ सु॒ जा॒गृ॒हि वय॑ सु॒ म॒न्दि॒षी॒म॒ही॒त्या॒हा॒ग्नि-
मे॒वा॒धि॒पां कृ॒त्वा स्व॑पि॒ति र॒क्ष॒सा॒म॒प॒ह॒त्या अ॒व्र॒त्य॒मि॒व वा ए॒ष क॑रोति
यो दी॒क्षितः॑ स्व॑पि॒ति त्व॒म॒ग्ने व्र॑त॒पा अ॒सी॒त्या॒हा॒ग्निर्वै दे॒वानां॑ व्र॒त॒प॒तिः
स ए॒वैनं॑ व्र॒त॒मा लं॑भयति दे॒व आ म॒र्त्ये॒ष्वेत्या॑ह दे॒वो- [] 30

6.1.4.7

ह्येष॑ सन् म॒र्त्येषु॑ त्वं य॒ज्ञेष्वी॒ड्य इ॒त्या॒हैत॑ हि य॒ज्ञेष्वी॒डते॑
वै दी॒क्षिता॑थ सु॒षु॒पुष इन्द्रि॑यं दे॒वताः॑ क्रा॒म॒न्ति वि॒श्वे दे॒वा अ॒भि
मा॒मा॒ऽव॒वृ॒त्र-॒न्त्रि॒त्या-हेन्द्रि॑येणै॒वैनं॑ दे॒वता॑भिः सं नयति यदे॒तद्-य॒जुर्न
ब्रू॒याद्-या॒वत ए॒व प॒शू॒न॒भि दी॒क्षे॒त ता॒व॒न्तो॑ऽस्य प॒श॒वः स्यु॑
रास्वे॒यथ॑- [] 31

6.1.4.8

सो॒माऽऽ* भू॒यो भ॑रेत्या॒हा-प॑रि॒मि॒ता॒ने॒व प॒शू॒न॒व रु॒न्धे च॒न्द्र॒म॒सि
म॒म भो॑गाय भवेत्या॒ह य॒था॒दे॒व॒त॒मे॒वै॒नाः प्र॑ति गृ॒ह्णा॒ति वा॒य॒वै
त्वा व॑रु॒णाय॑ त्वेति यदे॒व॒मे॒ता ना॒नु॒दि॒शे॒द॒य॒था॒दे॒व॒तं द॑क्षिणा
ग॒म॒ये॒दा दे॒वता॑भ्यो वृ॒श्च्ये॒त यदे॒व॒मे॒ता अ॒नु॒दि॒श॒ति य॒था॒दे॒व॒त॒मे॒व

दक्षि॑णा गमयति॑ न दे॒वता॑भ्य॒ आ- [] 32

6.1.4.9

वृ॑श्च्यते दे॒वीरा॑पो अ॒पां न॒पादि॑त्याह॒ यद्वो॑ मे॒ध्यं य॑ज्ञि॒यञ्
सदे॑वं तद्वो॑ मा॒ऽव क्र॑मिषमि॒ति वा॑वैतदाहाच्छि॒न्नं तन्तुं॑ पृथि॒व्या
अनु॑ गे॒षमि॑त्याह॒ सेतु॑मे॒व कृ॒त्वाऽत्ये॑ति । 33

(भु॒ञ्जते॑ - ऽयं - छि॒न्धाद् - रु॒न्धे - ऽग्नि॑ - रा॒ह दे॒व - इ॒यद्
- दे॒वता॑भ्य॒ आ - त्रय॑स्त्रि॒ंशच्च॑) (A4)

6.1.5.1

दे॒वा वै दे॒वय॑जन-म॒ध्यव॑साय दि॒शो न प्रा॑जा॒नन् ते॑(१)ऽन्यौ॑ -
ऽन्यमु॑पा॒धावन् त्वया॑ प्र जा॒नाम॑ त्वयेति॒ तेऽदि॑त्याञ् सम॑ध्रियन्त॒ त्वया॑
प्र जा॒नामे॒ति सा॒ऽब्रवी॑द्-वरं॑ वृ॒णै म॒त्प्रा॑यणा ए॒व वो॑ य॒ज्ञा म॑दुदयना
अस॑न्निति॒ तस्मा॑दादि॒त्यः प्रा॑यणी॒यो य॒ज्ञाना॑मादि॒त्य उ॑दयनी॒यः पञ्च॑
दे॒वता॑ यजति॒ पञ्च॑ दि॒शो दि॒शां प्र॑ज्ञा॒त्या- [] 34

6.1.5.2

अथो॑ पञ्चाक्षरा॑ पङ्क्तिः॑ पाङ्क्तौ॑ यज्ञो॑ यज्ञमेवाव॑ रुन्धे॑ पथ्या॑
 स्व॒स्तिम॑यजन् प्राची॑मेव॒ तया॑ दि॒शं प्रा॒जान॑न्न॒ग्निना॑ दक्षिणा॑ सोमे॑न
 प्र॒तीची॑ स॒वित्रो॑दी॒ची-म॑दित्यो॒र्ध्वा प॑थ्या॑ स्व॒स्तिं य॑जति प्राची॑मेव
 तया॑ दि॒शं प्र॒ जाना॑ति प॒थ्या स्व॒स्तिमि॑ष्ट्वाग्नी॒षोमौ॑ यजति॒ चक्षु॑षी
 वा ए॒ते य॒ज्ञस्य॑ यदग्नी॒षोमौ॑ ताभ्यामे॒वानु॑ पश्य- [] 35

6.1.5.3

-त्यग्नी॒षोमा॑विष्ट्वा स॒वितारं॑ य॒जति॑ स॒वितृ॑प्रसूत ए॒वानु॑ पश्यति
 स॒वितार॑मिष्ट्वाऽदि॒तिं य॑जती॒यं वा॑ अ॒दिति॑रस्यामे॒व प्र॑तिष्ठा॒यानु॑
 पश्य॒त्यदि॑तिमिष्ट्वा मा॒रुती॑मृचमन्वाह म॒रुतो॑ वै दे॒वानां॑ विशो॑
 दे॒ववि॒शां ख॒लु वै क॑ल्पमानं मनुष्यवि॒शमनु॑ कल्पते॒ यन्
 मा॒रुती॑मृचमन्वाह वि॒शां क्लृ॑प्त्यै ब्रह्मवादि॒नो वद॑न्ति
 प्रया॒जव॑दननूया॒जं प्रा॒यणी॑यं का॒र्य-म॑नूया॒जव॑- [] 36

6.1.5.4

दप्रया॒ज-मु॑दयनीयमि॒तीमे॑ वै प्रया॒जा अ॒मी अ॒नूया॒जाः सै॒व सा
 य॒ज्ञस्य॑ स॒न्तति॑स्तत् तथा न का॒र्यमा॒त्मा वै प्रया॒जाः प्र॒जाऽनू॑या॒जा

यत् प्रयाजा-नन्तरियादात्मानम-न्तरियाद्-यदनूयाजा-नन्तरियात्
 प्रजामन्तरियाद्यतः खलु वै यज्ञस्य विततस्य न क्रियते तदनु
 यज्ञः परा भवति यज्ञं पराभवन्तं यजमानोऽनु- [] 37

6.1.5.5

परा भवति प्रयाजवदेवा-नूयाजवत् प्रायणीयं कार्यं
 प्रयाजवदनूयाजव-दुदयनीयं नाऽऽत्मानमन्तरेति न प्रजां न
 यज्ञः पराभवति न यजमानः प्रायणीयस्य निष्कास उदयनीयमभि
 निर्वपति सैव सा यज्ञस्य सन्ततिर्याः प्रायणीयस्य याज्या यत् ता
 उदयनीयस्य याज्याः कुर्यात् पराङ्मुं लोकमा रोहेत् प्रमायुकः
 स्याद्याः प्रायणीयस्य पुरोऽनुवाक्यास्ता () उदयनीयस्य याज्याः
 करोत्यस्मिन्नेव लोके प्रति तिष्ठति । 38

(प्रजात्यै - पश्यत्य - नूयाजव - यजमानोऽनु - पुरोनुवाक्यास्ता
 - अष्टौ च) (A5)

6.1.6.1

क॒द्रूश्च॒ वै सु॒पर्णी चा॑ऽऽ*त्मरूपयो॑रस्पर्धेता॒ऽ सा क॒द्रूः
 सु॒पर्णीम॑जय॒थ् साऽब्र॑वीत् तृ॒तीयस्या॑मितो दि॒वि सोम॑स्तमा ह॒र
 तेना॑ऽऽ*त्मानं निष्क्रीणी॒ष्वेती॒यं वै क॒द्रूसौ सु॒पर्णी छन्दा॑ऽसि
 सौपर्णे॒याः साब्र॑वीदस्मै वै पि॒तरौ पु॒त्रान् बिभ्रि॑त-स्तृ॒तीयस्या॑मितो
 दि॒वि सोम॑स्तमा ह॒र तेना॑ऽऽ*त्मानं निष्क्रीणी॒ष्वे- [] 39

6.1.6.2

ति मा क॒द्रूवो॑चदिति जग॒त्युद॑पत-च्चतु॑र्दशाक्षरा सती सा ऽप्रा॑प्य
 न्यव॑र्तत तस्यै द्वे अक्षरे॑ अमीयेता॒ऽ सा प॒शुभिश्च॑ दीक्षया
 चाऽग॑च्छत् तस्माज्जगती छन्द॑सां प॒शव्य॑तमा तस्मात् प॒शुमन्तं॑
 दीक्षो॑प नमति त्रिष्टु॑गुदपतत् त्रयो॑दशाक्षरा सती सा ऽप्रा॑प्य
 न्यव॑र्तत तस्यै द्वे अक्षरे॑ अमीयेता॒ऽ सा दक्षि॑णाभिश्च - [] 40

6.1.6.3

तप॑सा चाऽग॑च्छत् तस्मात् त्रिष्टु॑भो लो॒के मा॒ध्यन्दि॑ने सव॑ने दक्षि॑णा
 नीय॑न्त एतत् खलु॒ वाव तप॑ इत्याहु॒र्यः स्वं द॑दातीति
 गाय॑त्र्युदपतच्चतु॑रक्षरा सत्य॑जया ज्योति॑षा तम॑स्या अजा॑ऽभ्यरु॒न्ध

तदजाया॑ अज॒त्व॒ सा सोमं॑ चाऽऽहर॑च्च॒त्वारि॑ चाक्ष॒राणि॑ साऽष्टाक्ष॒रा
सम॑पद्यत ब्रह्म॒वादि॑नो वदन्ति- [] 41

6.1.6.4

कस्मा॑त् स॒त्याद्-गा॑यत्री क॒निष्ठा॑ छन्द॒सा स॒ती य॑ज्ञ॒मुखं॑ प॒रीया॑येति
यदे॒वादः॑ सोम॒माऽहर॑त् तस्मा॑द्-य॒ज्ञमु॒खं प॑र्ये॒त् तस्मा॑त् तेज॒स्विनी॑तमा
प॒द्भ्यां द्वे॑ स॒वने॑ स॒मगृ॑ह्णान् मुखे॒नैकं॑ यन्मुखे॒न स॒मगृ॑ह्णात्
तद॒धय॑त् तस्मा॑द् द्वे स॒वने॑ शु॒क्रव॑ती प्रा॒तः स॒वनं॑ च मा॒ध्यंदि॑नं
च तस्मा॑त् तृतीय॑ स॒वन ऋ॒जीष॑म॒भि षु॑ण्वन्ति धी॒तमि॑व हि
म॒न्यन्त॑- [] 42

6.1.6.5

आ॒शिर॑मव॒ नय॑ति सशु॒क्रत्वा॑याथो सं भ॒रत्ये॒वैन॑त् त
सोम॑मा॒ह्रिय॑माणं गन्ध॒र्वो वि॒श्वाव॑सुः प॒र्यमु॑ष्णाथ॒ स तिस्रो॑ रात्रीः
प॒रिमु॑षितोऽव॒सत् तस्मा॑त् तिस्रो॑ रात्रीः क्री॒तः सोमो॑ व॒सति॑ ते दे॒वा
अब्रु॑वन्थ् स्त्री॒कामा॑ वै गन्ध॒र्वा स्त्रि॒त्रया॑ निष्क्री॒णामे॑ति ते वाच
स्त्रि॒यमे॑कहा॒यनीं॑ कृ॒त्वा तया॑ नि॒रक्री॑णन्थ् सा रोहि॒द्-रूपं॑ कृ॒त्वा

गन्धर्वेभ्यो- [] 43

6.1.6.6

ऽपक्रम्यातिष्ठत् तद्-रोहितो जन्म ते देवा अब्रुवन्नप युष्मदक्रमी -
 न्नास्मानु-पावर्तते वि ह्वयामहा इति ब्रह्म गन्धर्वा अवदन्नगायन् देवाः
 सा देवान् गायत उपावर्तत तस्माद्-गायन्तः स्त्रियः कामयन्ते
 कामुका एनः स्त्रियो भवन्ति य एवं वेदाथो य एवं विद्वानपि
 जन्येषु भवति तेभ्य एव ददत्युत यद्-बहुतया - [] 44

6.1.6.7

भवन्त्येकहायन्या क्रीणाति वाचैवैनः सर्वया क्रीणाति तस्मादेकहायना
 मनुष्या वाचं वदन्त्यकूटया ऽकर्णयाऽकाणयाऽश्लोणया ऽसप्तशफया
 क्रीणाति सर्वयैवैनं क्रीणाति यच्छ्वेतया क्रीणीयाद्-दुश्चर्मा यजमानः
 स्याद्यत् कृष्णया-ऽनुस्तरणी स्यात् प्रमायुको यजमानः स्याद्यद्
 द्विरूपया वात्रघ्नी स्यात् स वाऽन्यं जिनीयात् तं वाऽन्यो
 जिनीयादरुणया पिङ्गाक्ष्या () क्रीणात्येतद्वै सोमस्य रूपः स्वयैवैनं
 देवतया क्रीणाति । 45

(निष्क्रीणीष्व - दक्षिणाभिश्च - वदन्ति - मन्यन्ते - गन्धर्वेभ्यो -
बहुतयाः - पिङ्गाक्ष्या - दश च) (A6)

6.1.7.1

तद्धिरण्यमभवत् तस्मादद्भ्यो हिरण्यं पुनन्ति ब्रह्मवादिनो वदन्ति
कस्मात् सत्यादनस्थिकेन प्रजाः प्रवीयन्ते ऽस्थन्वतीर्जायन्त इति
यद्धिरण्यं घृतेऽवधाय जुहोति तस्मादनस्थिकेन प्रजाः प्र वीयन्ते
ऽस्थन्वतीर्जायन्त एतद्वा अग्नेः प्रियं धाम यद्-घृतं तेजो
हिरण्यमियन्ते शुक्र तनूरिदं वर्च इत्याह सतेजसमेवैनं
सतनुं- [] 46

6.1.7.2

करोत्यथो सं भरत्येवैनं यदबद्धम-वदध्याद्-गर्भाः प्रजानां
परापातुकाः स्युर्बद्धमव दधाति गर्भाणां धृत्यै निष्टक्यं बध्नाति
प्रजानां प्रजननाय वाग्वा एषा यथ् सोमक्रयणी जूरसीत्याह
यद्धि मनसा जवते तद्-वाचा वदति धृता मनसेत्याह मनसा हि
वाग्धृता जुष्टा विष्णव इत्याह- [] 47

6.1.7.3

य॒ज्ञो वै वि॒ष्णु र्य॒ज्ञायै॒वैनां जु॒ष्टां करो॑ति तस्या॑स्ते स॒त्यस॑वसः
 प्र॒सव॑ इत्या॒ह स॒वितृ-प्र॑सूतामे॒व वाच॑मव रुन्धे का॒ण्डेका॒ण्डे वै
 क्रि॒यमा॑णे य॒ज्ञꣳ रक्षाꣳसि जिघाꣳसन्त्येष॑ खलु॒ वा अ॑रक्षो॒हतः
 पन्था॑ योऽग्ने॒श्च सूर्य॑स्य च सूर्य॑स्य चक्षु॒रा-ऽरु॑हम॒ग्नेर॑क्षणः
 क॒नीनि॑का॒मित्या॒ह य ए॒वारक्षो॑हतः पन्था॒स्तꣳ स॒मारो॑हति- [] 48

6.1.7.4

वाग्वा ए॒षा यथ् सो॑मक्रय॒णी चि॑दसि म॒नाऽसी॑त्या॒ह शा॒स्त्येवै॒नामे॑तत्
 तस्मा॑च्छि॒ष्टाः प्र॒जा जा॑यन्ते चि॒दसी॑त्या॒ह यद्धि॑ म॒नसा॑ चे॒तय॑ते
 तद्-वा॒चा व॑दति म॒नाऽसी॑त्या॒ह यद्धि॑ म॒नसाऽभि॑गच्छति॒ तत् करो॑ति
 धी॒रसी॑त्या॒ह यद्धि॑ म॒नसा॑ ध्या॒यति॑ तद्-वा॒चा- [] 49

6.1.7.5

व॑दति दक्षि॒णाऽसी॑त्या॒ह दक्षि॒णा ह्येषा॑ य॒ज्ञिया॑ऽसी॒त्याह य॒ज्ञिया॑मे॒वैनां
 करो॑ति क्ष॒त्रिया॑सीत्या॒ह क्ष॒त्रिया॑ ह्येषा॑ ऽदि॒तिर॑स्युभयतः शी॒र्ष्णीत्या॒ह
 यदे॒वाऽऽ*दि॒त्यः प्रा॑यणी॒यो य॒ज्ञाना॑मादि॒त्य उ॑दयनी॒य-स्त॑स्मादे॒वमा॒ह

यद॑ब॒द्धा॒ स्याद॑य॒ता स्या॒द्यत् प॑दि॒ब॒द्धा-ऽनु॑स्तर॒णी स्यात् प्र॒मायु॑को
यज॑मानः स्या- [] 50

6.1.7.6

-द्यत् क॑र्णगृ॒हीता॒ वा॒र्त्रघ्नी॑ स्याथ् स वा॒ऽन्यं जि॑नी॒यात् तं वा॒ऽन्यो
जि॑नी॒यान्मि॒त्रस्त्वा॒ पदि॑ ब॒ध्नात्वि॒त्याह॑ मि॒त्रो वै शि॒वो दे॒वानां॑ तेनै॒वैनां॑
पदि॑ ब॒ध्नाति॒ पूषा॑ऽध्व॒नः पा॒त्वित्या॑हेयं वै पू॒षेमामे॒वास्या॑ अधि॒पाम॑कः
सम॑ष्ट्या॒ इन्द्रा॑या-ध्य॒क्षाये॒त्याहेन्द्र॑मे॒वास्या॑ अध्य॒क्षं करो॑- [] 51

6.1.7.7

-त्यनु॑ त्वा मा॒ता म॑न्यतामनु॑ पि॒तेत्या॑हा-नु॒मतयै॒वैनया॑ क्रीणाति
सा दे॒वि दे॒वम॒च्छेही॑त्याह दे॒वी ह्येषा॑ दे॒वः सोम॑ इन्द्रा॒य
सोम॑मित्याहेन्द्रा॒य हि सोम॑ आ॒ह्रिय॑ते यदे॒तद्-यजु॑र्न ब्रू॒यात् परा॑च्येव
सोम॑क्रयणीयाद्-रु॒द्रस्त्वाऽऽ वर्त॑यत्वित्याह रु॒द्रो वै क्रू॒रो- [] 52

6.1.7.8

दे॒वानां॑ तमे॒वास्यै॑ पर॒स्ताद्-द॑धा॒त्यावृ॑त्त्यै क्रू॒रमि॑व वा ए॒तत् करो॑ति
यद्-रु॒द्रस्य॑ की॒र्तय॑ति मि॒त्रस्य॑ प॒थेत्या॑ह शान्त्यै॑ वा॒चा वा ए॒ष वि

क्रीणीते॑ यः सोम॑क्रय॒ण्या स्व॒स्ति सोम॑सखा पुनरेहि॑ सह॒ रय्येत्या॑ह
वाचै॑व विक्री॒य पुन॑रात्मन् वाचं॑ धत्तेऽनुप॑दासुकाऽस्य॒ वाग्भव॑ति
य एवं॑ वेद॒ () । 53 (सत॑नुं - विष्ण॑व इत्या॒ह - समा॑रोहति -
ध्याय॑ति तद् वा॒चा - यज॑मानः स्यात् - करो॑ति - क्रू॒रो - वेद॑) (A7)

6.1.8.1

षट् प॒दान्यनु॑ नि क्रा॒मति॑ षड॒हं वाङ्ना॑ति वदत्यु॒त सँव॑त्सरस्याय॒ने
याव॑त्येव वा॒क्ताम॑व रुन्धे सप्त॒मे प॒दे जु॑होति सप्तप॑दा शक्वरी
प॒शवः॑ शक्वरी प॒शूने॒वाव रुन्धे॑ सप्त॒ ग्राम्याः॑ प॒शवः॑ सप्ता*ऽऽर॒ण्याः
सप्त॑ छन्दा॒ - स्यु॑भयस्या-वरु॒द्ध्यै वस्व्य॑सि रु॒द्राऽसी॑त्याह
रूप॑मेवास्या ए॒तन् म॒हिमा॒नं - [] 54

6.1.8.2

ँव्याच॑ष्टे बृह॒स्पति॑स्त्वा सु॒म्ने रण्व॑त्त्वित्या॒ह ब्र॒ह्म वै दे॒वानां॑
बृह॒स्पति॑-ब्र॒ह्मणै॑वास्मै प॒शून॑व रुन्धे रु॒द्रो वसु॑भिरा
चिके॑त्त्वित्याहाऽऽ*वृ॒त्त्यै पृ॒थिव्या॑स्त्वा मूर्ध॒न्ना जिघ॑र्मि दे॒वय॑जन
इत्या॑ह पृ॒थिव्या॑ ह्येष॒ मूर्धा॑ यद्-दे॒वय॑जनमिडा॒याः प॒द इत्या॑हेडा॒यै

ह्येतत् पदं यथ् सोमक्रयण्यै घृतवति स्वाहे- [] 55

6.1.8.3

-त्याह यदेवास्यै पदाद्-घृतमपीड्यत तस्मादेवमाह
यदध्वर्युरनग्नावाहुतिं जुहुयादन्धोऽध्वर्युः स्याद्-रक्षाऽसि
यज्ञऽ हन्युर्.हिरण्यमुपास्य जुहोत्यग्नित्येव जुहोति नान्धोऽध्वर्यु
र्भवति न यज्ञऽ रक्षाऽसि घ्नन्ति काण्डेकाण्डे वै क्रियमाणे यज्ञऽ
रक्षाऽसि जिघाऽसन्ति परिलिखितऽ रक्षः परिलिखिता अरातय
इत्याह रक्षसामपहत्या- [] 56

6.1.8.4

इदमहऽ रक्षसो ग्रीवा अपि कृन्तामि योऽस्मान् द्वेष्टि यं च वयं
द्विष्म इत्याह द्वौ वाव पुरुषौ यं चैव द्वेष्टि यश्चैनं द्वेष्टि
तयोरेवानन्तरायं ग्रीवाः कृन्तति पशवो वै सोमक्रयण्यै पदं
यावत्तमूतऽ सं वपति पशूनेवाव रुन्धेऽस्मे राय इति सं
वपत्यात्मान-मेवाध्वर्युः- [] 57

6.1.8.5

प॒शु॒भ्यो॒ नान्त॑रेति॒ त्वे रा॒य इति॑ यज॑मानाय॒ प्र य॑च्छति॒ यज॑मान ए॒व
 रयिं॑ दधाति॒ तोते॑ रा॒य इति॑ प॒त्न्या अ॒र्धो वा ए॒ष आ॒त्मनो॑ यत् प॒त्नी
 यथा॑ गृ॒हेषु॑ नि॒धत्ते॑ तादृ॒गेव॑ तत् त्वष्टी॑मती ते स॒पेयेत्या॑ह त्वष्टा॒ वै
 प॒शूनां॑ मि॒थुना॑नाꣳ रू॒पकृ॑द्-रू॒पमे॒व प॒शुषु॑ दधात्य॒स्मै वै
 लो॒काय॑ गा॒र्हप॑त्य आ॒ धी॒यते॑ () ऽमु॒ष्मा आ॒हव॑नीयो यद्-
 गा॒र्हप॑त्य उ॒पव॑पेदस्मिन् लो॒के प॒शुमा॑न्थ स्याद्-यदा॒हव॑नीये
 ऽमु॒ष्मिन् लो॒के प॒शुमा॑न्थ स्यादु॒भयो॑रुप॒ वप॑त्यु॒भयो॑रे॒वैनं॑ लो॒कयोः॑
 प॒शुम॑न्तं करोति । 58

(महि॑मानꣳ - स्वा॒हा - ऽप॑हत्या - अध्व॑र्यु - धी॒यते -
 चतु॑र्विꣳशतिश्च) (A8)

6.1.9.1

ब्र॒ह्मवा॑दिनो॒ वद॑न्ति वि॒चित्यः॒ सोमा॑(3) न वि॒चित्या॑(3) इति॒ सोमो॒ वा
 ओष॑धीनाꣳ रा॒जा तस्मिन्॑ यदाप॒न्नं ग्र॑सितमे॒वास्य॑ तद्-यद्-
 वि॒चिनु॑याद्-यथा॒ ऽस्या॑द्ग्र॒सितं॑ नि॒ष्विद॑ति तादृ॒गेव॑ तद्यन्न
 वि॒चिनु॑याद्-यथा॒ ऽक्ष॑न्नाप॒न्नं वि॒धाव॑ति तादृ॒गेव॑ तत् क्षो॒धुको॑ ऽध्व॑र्युः

स्यात् क्षो॑धु॒को यज॑मानः सोम॑विक्रयि॒न्थ् सोम॑ꣳ शो॒धये॒त्येव
ब्रू॒याद् यदी॑तरं- [] 59

6.1.9.2

यदी॑तरमु॒भये॑नैव सोम॑विक्रयि॒ण-म॑र्पयति तस्मा॑त् सोम॑विक्रयी
क्षो॑धु॒को ऽरु॒णो ह स्मा॑ऽऽ*हौप॑वेशिः सोम॑क्रय॒ण ए॒वाहं तृ॑तीय
स॒वनम॑व रु॒न्ध इति॑ पशू॒नां च॑र्मन् मिमी॑ते पशू॒नेवा॑व रु॒न्धे प॒शवो॑ हि
तृ॒तीयꣳ स॒वनं यं॑ का॒मये॑तापशुः स्या॑दित्यृ॒क्षत॑स्तस्य मिमी॑तर्क्षं वा
अप॑शव्यमपशु॒रेव भ॑वति यं का॒मये॑त पशु॒मान्थ् स्या॑- [] 60

6.1.9.3

-दिति॑ लो॒म॒त॒स्तस्य॑ मिमी॑तैतद्वै पशू॒नाꣳ रू॒पꣳ रू॒पेणै॒वास्मै॑
पशू॒नव॑ रु॒न्धे पशु॑मानेव भवत्य॒पाम॑न्ते क्री॒णाति॑ सर॒समे॒वैनं॑
क्री॒णात्य॑-मा॒त्योऽसी॒त्याहा॒मैवैनं॑ कुरु॒ते शु॒क्रस्ते॒ ग्रह॑ इत्या॒ह शु॒क्रो
ह्यस्य॑ ग्र॒हो ऽन॒साऽच्छ॑ याति म॒हि॒मान॑-मे॒वास्या॑च्छ या॒त्यन॒सा- [] 61

6.1.9.4

ऽच्छ॑ याति तस्मा॑दनोवाह्यꣳ स॒मे जी॒वनं॑ यत्र॒ खलु॒ वा ए॒तꣳ
शी॒र्ष्णा हर॑न्ति तस्मा॑च्छीर्ष॒हार्यं॑ गि॒रौ जी॒वनम॑भि त्यं दे॒वꣳ

स॒वि॒तार॒मि॒त्य॒ति-॑छ॒न्द॒स॒र्चा॒ मि॒मी॒ते ऽति॑छ॒न्दा॒ वै स॒र्वा॒णि
छ॒न्दा॒ॽसि॒ स॒र्वे॒भि॒रे॒वैनं॑ छ॒न्दो॑भि॒र्मि॒मी॒ते व॒र्ष्म॒ वा ए॒षा छ॒न्द॒सां
य॒द॒ति॑छ॒न्दा॒ य॒द॒ति॑छ॒न्द॒स॒र्चा॒ मि॒मी॒ते व॒र्ष्मै॒वैन॑ॽ स॒मा॒ना॒नां
क॒रो॒त्ये॒क॒यै॒क॒यो॒थ् सर्गं॑- [] 62

6.1.9.5

मि॒मी॒ते ऽया॑त॒या॒मि॒नि-॑या॒या॒त-॑या॒मि॒न्यै॒वैनं॑ मि॒मी॒ते त॒स्मा॒न्ना॒ना॒वी॒र्या
अ॒ङ्गु॒लयः॑ स॒र्वा॒स्व॒ङ्गु॒ष्ठ॒मु॒प नि॑ गृ॒ह्णा॒ति त॒स्मा॒त् स॒मा॒व॒द्वी॒र्यो॑ऽन्या॒भि-
र॒ङ्गु॒लि॒भि॒स्त॒स्मा॒त् स॒र्वा॒ अनु॑ सं च॒र॒ति य॒थ् स॒ह स॒र्वा॒भि॒र्मि॒मी॒त
स॒ॽशि॒लि॒ष्टा अ॒ङ्गु॒लयो॑ जा॒ये॒र-॑न्ने॒क॒यै॒क॒यो॒थ् सर्गं॑ मि॒मी॒ते त॒स्मा॒द्
वि॒भ॒क्ता जा॒य॒न्ते प॒ञ्च॒ कृ॒त्वो य॒जु॒षा मि॒मी॒ते प॒ञ्चा॑क्ष॒रा प॒ङ्क्तिः॑ पा॒ङ्क्तो
य॒ज्ञो य॒ज्ञ॒मे॒वाव॑ रु॒न्धे प॒ञ्च॒ कृ॒त्व॒स्तू॒ष्णीं- [] 63

6.1.9.6

-द॒श सं प॒द्य॒न्ते द॒शा॑क्ष॒रा वि॒रा॒डन्नं॑ वि॒रा॒ड् वि॒रा॒जै॒वा॒न्ना॒द्य॒मव॑ रु॒न्धे
य॒द् य॒जु॒षा मि॒मी॒ते भू॒त॒मे॒वाव॑ रु॒न्धे य॒त् तू॒ष्णीं भ॒वि॒ष्य॒द्-य॒द्-वै
ता॒वा॒ने॒व सो॒मः स्या॒द् या॒व॒न्तं मि॒मी॒ते य॒ज॒मा॒न॒स्यै॒व स्या॒न्ना॒पि

सदस्यानां प्रजाभ्यस्त्वेत्युप समूहति सदस्यानेवान्वा भजति
वाससोप नह्यति सर्वदेवत्यं वै- [] 64

6.1.9.7

वासः सर्वाभिरेवैनं देवताभिः समर्थयति पशवो वै सोमः प्राणाय
त्वेत्युप नह्यति प्राणमेव पशुषु दधाति व्यानाय त्वेत्यनु शृन्थति
व्यानमेव पशुषु दधाति तस्मात् स्वपन्तं प्राणा न जहति । 65
(इतरं - पशुमान्त् स्याद् - यात्यनसो - थसर्ग - तूष्णी -
सर्वदेवत्यं वै - त्रयस्त्रिंशच्च) (A9)

6.1.10.1

यत् कलया ते शफेन ते क्रीणानीति पणेतगो अर्घ्यं सोमं कुर्यादगो
अर्घ्यं यजमानमगो अर्घमध्वर्युं गोस्तु महिमानं नाव तिरेद् गवा ते
क्रीणानीत्येव ब्रूयाद् गो अर्घमेव सोमं करोति गो अर्घ्यं यजमानं
गो अर्घमध्वर्युं न गोर्महिमानमव तिरत्यजया क्रीणाति सतपसमेवैनं
क्रीणाति हिरण्येन क्रीणाति सशुक्रमेवै- [] 66

6.1.10.2

–नं॑ क्री॑णाति॒ धे॒न्वा क्री॑णाति॒ सा॒शिर॑मे॒वैनं॑ क्री॑णात्यृष॒भेण॑ क्री॑णाति॒
 से॒न्द्रमे॑वैनं॑ क्री॑णात्यन॒डुहा॑ क्री॑णाति॒ वह्नि॑र्वा अन॒ड्वान् वह्नि॑नैव वह्नि॑
 य॒ज्ञस्य॑ क्री॑णाति॒ मिथु॑नाभ्यां॑ क्री॑णाति॒ मिथु॑नस्याव॒–रु॒द्ध्यै वा॑स॒सा
 क्री॑णाति॒ सर्व॑दे॒वत्यं॑ वै वा॒सः सर्वा॑भ्य ए॒वैनं॑ दे॒वता॑भ्यः क्री॑णाति॒ दश॑
 सं प॑द्यन्ते दशा॒क्षरा॑ वि॒राडन्नं॑ वि॒राड् वि॒राजै॑वान्नाद्यमव॒ रुन्धे॑– [] 67

6.1.10.3

तप॑सस्तनूर॒सि प्र॒जाप॑तेर्वर्ण॒ इत्या॑ह प॒शुभ्य॑ ए॒व तद॑ध्वर्यु॒र्नि हु॑त
 आ॒त्मनोऽना॑व्रस्काय॒ गच्छ॑ति श्रियं॒ प्र प॒शूना॑प्नोति॒ य ए॒वं वैद॑ शु॒क्रं
 ते शु॒क्रेण॑ क्री॑णामीत्या॒ह यथा॑ य॒जुरे॒वैतद् दे॒वा वै येन॑ हिर॒ण्येन॑
 सोम॑मक्री॒णन् तद॑भीष॒हा पुन॑राऽद॒दत॑ को हि तेज॑सा वि॒क्रेष्य॑त॒ इति॑
 येन॑ हिर॒ण्येन॑– [] 68

6.1.10.4

सोमं॑ क्री॒णीयात् तद॑भीष॒हा पुन॑रा द॒दीत॑ तेज॒ एवाऽऽत्म॑न् ध॒त्तेऽस्मे
 ज्योतिः॑ सोमवि॒क्रयि॑णि तम॒ इत्या॑ह ज्योति॑रेव यज॒माने॑ दधाति॒ तम॑सा
 सोमवि॒क्रयि॑णम॒र्पय॑ति यदनु॑पग्रथ्य॒ हन्याद्–द॒न्दशू॑कास्ता॒ऽ समा॑ऽ

सर्पाः स्युरिदमहं सर्पाणां दन्दशूकानां ग्रीवा उप ग्रथ्नामीत्याहा-
दन्दशूकास्तां समां सर्पा भवन्ति तमसा सोमविक्रयिणं

विध्यति स्वान- [] 69

6.1.10.5

भ्राजेत्याहैते वा अमुष्मिन् लोके सोममरक्षन् तेभ्योऽधि सोममाऽहरन्
यदेतेभ्यः सोमक्रयणा-न्नानुदिशेदक्रीतोऽस्य सोमः स्यान्नास्यैते
ऽमुष्मिन् लोके सोमं रक्षेयुर्यदेतेभ्यः सोमक्रयणाननुदिशति
क्रीतोऽस्य सोमो भवत्येतस्यामुष्मिन् लोके सोमं रक्षन्ति । 70

(सशुक्रमेव - रुन्ध - इति येन हिरण्येन - स्वान -
चतुश्चत्वारिंशच्च) (A10)

6.1.11.1

वारुणो वै क्रीतः सोम उपनद्धो मित्रो न एहि सुमित्रधा इत्याह
शान्त्या इन्द्रस्योरुमा विश दक्षिणमित्याह देवा वै यं सोममक्रीणन्
तमिन्द्रस्योरौ दक्षिण आ ऽसादयन्नेष खलु वा एतर्हीन्द्रो यो यजते
तस्मादेवमाहोदायुषा स्वायुषेत्याह देवता एवा-न्वारभ्योत्- [] 71

6.1.11.2

तिष्ठत्यु-र्वन्तरिक्ष-मन्विहीत्याहा-न्तरिक्षदेवत्यो(1) ह्येतर्.हि
 सोमोऽदित्याः सदोऽस्यदित्याः सद आ सीदेत्याह यथायजुरेवैतद् द्वि
 वा एनमेतदर्धयति यद् वारुणं सन्तं मैत्रं करोति
 वारुण्यर्चाऽऽ सादयति स्वयैवैनं देवतया समर्धयति वाससा
 पर्यानहति सर्वदेवत्यं वै वासः सर्वाभिरेवै- [] 72

6.1.11.3

-नं देवताभिः समर्धयत्यथो रक्षसामपहत्यै वनेषु व्यन्तरिक्षं
 ततानेत्याह वनेषु हि व्यन्तरिक्षं ततान वाजमर्वथस्वित्याह वाजं
 ह्यर्वथसु पयो अघ्नियास्वित्याह पयो ह्यघ्नियासु हथ्सु क्रतुमित्याह
 हथ्सु हि क्रतुं वरुणो विक्ष्वग्निमित्याह वरुणो हि विक्ष्वग्निं
 दिवि सूर्य- [] 73

6.1.11.4

मित्याह दिवि हि सूर्यं सोममद्रावित्याह ग्रावाणो वा अद्रयस्तेषु
 वा एष सोमं दधाति यो यजते तस्मादेवमाहोदु त्यं जातवेदसमिति
 सौर्यर्चा कृष्णाजिनं प्रत्यानहति रक्षसामपहत्या उस्त्रावेतं

धूर्॒षाहा॒वित्या॑ह॒ यथा॑य॒जुरे॒वैतत् प्र॑ च्यवस्व भुवस्पत॒ इत्या॑ह
भू॒ताना॑ ॐ ह्ये- [] 74

6.1.11.5

-ष पतिर्विश्वा॑न्यभि॒ धामा॑नीत्याह॒ विश्वा॑नि ह्ये॑(1) षोऽभि॒ धामा॑नि
प्र॒च्यव॑ते मा त्वा परिपरी विददित्याह॒ यदे॒वादः सोम॑मा॒ह्रिय॑माणं
गन्ध॒र्वो विश्वा॑वसुः पर्यमु॒ष्णात् तस्मा॑-देवमाहापरिमोषाय॒ यज॑मानस्य
स्वस्त्यय॒न्यसी॑त्याह॒ यज॑मानस्यैवैष यज्ञस्यान्वारं॒भो ऽन॑वच्छित्यै
वरु॒णो वा ए॒ष यज॑मानमभ्यैति॒ यत्- [] 75

6.1.11.6

क्री॒तः सोम॑ उप॒नद्धो॑ नमो॒ मित्र॑स्य वरु॒णस्य॑ चक्ष॒स इत्या॑ह
शान्त्या॒ आ सोमं॑ व॒हन्त्य॑ग्निना प्रति तिष्ठते तौ संभवन्तौ
यज॑मानमभि सं भवतः पुरा खलु वावैष मेधायाऽऽ*त्मानमारभ्य
चरति॒ यो दी॑क्षितो यदग्नीषोमीयं पशु॒माल॑भत आत्मनिष्क्रयण
ए॒वास्य॑ स तस्मात् तस्य नाऽऽ*श्यं पुरुषनिष्क्रयण इव ह्यथो खल्वाहु
() रग्नीषोमाभ्यां वा इन्द्रो वृत्रमहन्निति यदग्नीषोमीयं

प॒शु॒मा॒ल॒भ॒ते॒ वा॒र्त्र॒घ्न॒ ए॒वा॒स्य॒ स॒ तस्मा॑द्-वा॒श्यं॑ वा॒रु॒ण्य॒र्चा॒ परि॑
च॒रति॑ स्वयै॒वैनं॑ दे॒वत॑या॒ परि॑ च॒रति॑ । 76

(अ॒न्वा॒र॒भ्यो॒थ् - सर्वा॑भि॒रेव॑ - सूर्य॑ - भू॒ता॒ना॒ ह्य॑ - ति॒ य -
दा॒हुः - स॒प्त॒वि॒ंश॒तिश्च॑) (A11)

Prasna Korvai with starting Padams of 1 to 11 Anuvaakams :-

(प्रा॒ची॒न॒व॒ंशं॑ - या॒वन्त॑ - ऋ॒ख॒सामे॑ - वा॒ग्वै दे॒वेभ्यो॑ -
दे॒वा वै दे॒वय॑जनं - क॒दू॒श्च - तद्धि॑रण्य॒ - षट् प॒दानि॑ -
ब्र॒ह्म॒वा॒दि॒नो वि॒चित्यो॑ - यत् क॒लया॑ ते - वा॒रु॒णो वै क्री॒तः सोम॑ -
एका॑दश)

Korvai with starting Padams of 1, 11, 21 Series of Panchaatis :-

(प्रा॒ची॒न॒व॒ंशं॑ - स्वा॒हेत्या॑ह - ये॒ऽन्तः श॒रा - ह्येष॑ सं - तप॑सा
च - यत्कर्ण॑गृही - तेति॑ लो॒मतो॑ - वा॒रु॒णः - षट् स॑प्ततिः)

First and Last Padam of First Prasnam of 6th Kandam

(प्राचीनव॑ ऽं – परि॑ चरति)

॥ हरिः॑ ओं ॥

॥ कृष्ण यजुर्वेदीय तैत्तिरीय संहितायां षष्ठकाण्डे प्रथमः प्रश्नः

समाप्तः ॥

ओं नमः परमात्मने, श्री महागणपतये नमः, श्री गुरुभ्यो नमः

हरिः ओं

6.2 षष्ठकाण्डे द्वितीयः प्रश्नः – सोममन्त्रब्राह्मणनिरूपणं

6.2.1.1

यदु॒भौ वि॒मु॒च्याऽऽ*ति॒थ्यं गृ॒ह्णी॒याद्-य॒ज्ञं वि॒च्छि॒न्द्याद्-यदु॒भाव-
वि॒मु॒च्य॒ यथाऽना॒गता॒याऽऽति॒थ्यं क्रि॒यते तादृ॒गेव तद्-वि॒मु॒क्तो -
ऽन्योऽन॒ड्वान् भव॒त्य वि॒मु॒क्तोऽन्यो-ऽथाऽऽ*ति॒थ्यं गृ॒ह्णाति य॒ज्ञस्य
सन्त॒त्यै प॒त्न्यन्वा॒रभ॒ते प॒त्नी हि पा॒रीण॒ह्यस्ये॒शे प॒त्नियै॒ वानु॒मतं निर्व॑पति
यद्वै प॒त्नी य॒ज्ञस्य॒ करो॑ति मि॒थुनं॒ तदथो॒ प॒त्निया॒ एवै- [] 1

6.2.1.2

-ष य॒ज्ञस्या॒न्वा॒रंभो॒ ऽन॒वच्छि॒त्यै याव॑द्-भि॒र्वै रा॒जाऽनु॒चरै॒राग॑च्छति
सर्वे॑भ्यो॒ वै तेभ्य॑ आ॒ति॒थ्यं क्रि॒यते छ॒न्दा॒सि खलु॒ वै सोम॑स्य
रा॒ज्ञोऽनु॒चरा॒ण्यग्ने-रा॒ति॒थ्यम॑सि वि॒ष्णवे॒ त्वेत्या॑ह गाय॒त्रिया
ए॒वैतेन॑ करो॒ति सोम॑स्याऽऽ*ति॒थ्यम॑सि वि॒ष्णवे॒ त्वेत्या॑ह त्रि॒ष्टुभ॑ ए॒वैतेन॑
करो॒त्यति॑थेरा॒ति॒थ्यम॑सि वि॒ष्णवे॒ त्वेत्या॑ह जग॒त्या- [] 2

6.2.1.3

ए॒वैते॑न॒ करो॒त्य॒ग्नये॑ त्वा रा॒य॒स्पो॒षदा॒न्त्रे वि॒ष्णा॒वे त्वे॒त्या॒हानु॑ष्टु॒भ
 ए॒वैते॑न॒ करो॒ति श्ये॒नाय॑ त्वा सो॒म॒भृते॑ वि॒ष्णा॒वे त्वे॒त्या॒ह गा॒य॒त्रिया
 ए॒वैते॑न॒ करो॒ति प॒ञ्च कृ॒त्वो गृ॒ह्णाति॑ प॒ञ्चाक्ष॑रा प॒ङ्क्तिः पा॒ङ्क्तो य॒ज्ञो
 य॒ज्ञमे॒वाव रु॒न्धे ब्र॒ह्मवा॑दि॒नो वद॑न्ति कस्मा॑त् स॒त्याद्-गा॒य॒त्रिया
 उ॒भय॑त आ॒तिथ्य॑स्य क्रि॒यत॑ इति॒ यदे॒वादः॑ सो॒ममा- [] 3

6.2.1.4

ऽह॒रत् तस्मा॑द्-गा॒य॒त्रिया उ॒भय॑त आ॒तिथ्य॑स्य क्रि॒यते
 पु॒रस्ता॑च्चो॒परि॑ष्टाच्च शि॒रो वा ए॒तद् य॒ज्ञस्य॑ यदा॒तिथ्यं॑ न॒वक॑पालः
 पु॒रोडा॑शो भ॒वति॑ तस्मान्न॒वधा॑ शि॒रो वि॒ष्यूतं॑ न॒वक॑पालः पु॒रोडा॑शो
 भ॒वति॑ ते त्रय॑स्त्रि॒कपा॒लास्त्रि॑वृ॒ता स्तो॒मेन॑ सं॒मिता॑स्तेज॒स्त्रि॑वृत् तेज॑
 ए॒व य॒ज्ञस्य॑ शी॒र्षन् द॑धाति न॒वक॑पालः पु॒रोडा॑शो भ॒वति॑ ते
 त्रय॑स्त्रि॒कपा॒लास्त्रि॑वृ॒ता प्रा॒णेन॑ सं॒मिता॑स्त्रि॒वृद्भै- [] 4

6.2.1.5

प्रा॒ण-स्त्रि॑वृ॒तमे॒व प्रा॒णम॑भि॒पूर्वं य॒ज्ञस्य॑ शी॒र्षन् द॑धाति
 प्र॒जाप॑ते॒र्वा ए॒तानि॑ पक्ष॑माणि यदश्व॒वाला ऐ॑क्ष॒वी ति॒रश्ची॑ यदाश्व॒वालः

प्र॒स्त॒रो भ॒वत्यै॑क्ष॒वी ति॒रश्ची॑ प्र॒जाप॑तेरे॒व तच्च॑क्षुः संभ॑रति दे॒वा वै या
आहु॑तीर॒जुह॑वुस्ता असु॒रा निष्का॑वमादन् ते दे॒वाः कार्ष्ण॑र्यमपश्यन्
कर्म॑ण्यो वै कर्म॑नेन कुर्वी॑तेति ते कार्ष्ण॑र्यम॒यान् परि॑धीन- [] 5

6.2.1.6

-कुर्व॑त तैर्वै ते रक्षा॑स्यपा॒घ्नत॑ यत् कार्ष्ण॑र्यम॒याः परि॑ध्यो भव॑न्ति
रक्षा॑सामप॒हत्यै स॑ स्पर्श॑यति रक्षा॑सामनन्व-व॒चारा॑य न पु॒रस्ता॑त्
परि॑ दधा॒त्यादि॒त्यो ह्ये॒वोद्यन् पु॒रस्ता॑द्-रक्षा॑स्यप॒हन्त्यू॒र्ध्वे समि॑धावा
दधा॒त्युपरि॑ष्ठादे॒व रक्षा॑स्यप॒ हन्ति॑ यजु॒षाऽन्यां॑ तू॒ष्णीम॒न्यां मि॑थुन॒त्वाय॑
द्वे आ॑ दधाति द्वि॒पाद्-यज॑मानः प्र॒तिष्ठि॑त्यै ब्र॒ह्मवा॑दिनो वद॑न्त्य- [] 6

6.2.1.7

-ग्निश्च॑ वा ए॒तौ सोम॑श्च क॒था सोमा॑याऽऽ*ति॒थ्यं क्रि॒यते॑ ना॒ग्नय॑ इति
यद॒ग्नाव॑ग्निं मथि॒त्वा प्र॑हरति तेनै॒वाग्नय॑ आ॒तिथ्यं॑ क्रि॒यते॑
ऽथो॒ खल्वा॑हु॒रग्निः॑ सर्वा॒ देवता॑ इति यद्ध॒विरा॑साद्याग्निं मन्थ॑ति
ह॒व्यायै॑वाऽऽ*सन्ना॒य सर्वा॑ दे॒वता॑ जनयति । 7 (प॒त्न्या ए॒व - जग॑त्या
- आ - त्रि॒वृद्धै - परि॑धीन् - वद॑न्त्ये - क॑चत्वारि॒ंशच्च॑) (A1)

6.2.2.1

दे॒वा॒सु॒राः सँ॑य॒त्ता आ॒सन् ते दे॒वा मि॒थो वि॒प्रि॒या आ॒सन्
 तेऽ॒(१)न्योऽन्य॑स्मै ज्यै॒ष्ठ्या॒याति॑ष्ठ॒मानाः पञ्च॑धा व्य॒क्राम॑न् न॒ग्निर्व॑सु॒भिः
 सो॒मो रु॒द्रैरिन्द्रो म॒रुद्भिर्व॑रु॒ण आ॒दित्यैर्बृ॑ह॒स्पतिर्वि॒श्वैर्दे॒वैस्ते
 ऽम॒न्यन्ता॑सु॒रेभ्यो वा इ॒दं भ्रातृ॑व्येभ्यो र॒ध्यामो यन्मि॒थो वि॒प्रि॒याः स्मो
 या न इ॒माः प्रि॒यास्त॒नुव॑स्ताः स॒मव॑द्याम॒है ताभ्यः स
 निर्ऋ॑च्छाद्यो- [] 8

6.2.2.2

नः प्र॒थमो॑(१)न्योऽन्य॑स्मै द्रु॒ह्यादि॑ति तस्मा॒द्यः स॒तानू॑न॒प्त्रिणां प्र॒थमो
 द्रु॒ह्यति स आ॒र्तिमा॑च्छति यत् ता॒नू॒न॒प्त्रं स॒मव॑द्यति भ्रातृ॑व्याभिभू॒त्यै
 भव॑त्यात्म॒ना परा॑ऽस्य भ्रातृ॑व्यो भवति पञ्च कृ॒त्वोऽव॑द्यति पञ्च॑धा हि
 ते तथ् स॒मवा॑द्यन्ताथो पञ्चा॑क्षरा प॒ङ्क्तिः पाङ्क्तो य॒ज्ञो य॒ज्ञमे॒वाव रु॒न्ध
 आप॑तये त्वा गृ॒ह्णामी॑त्याह प्रा॒णो वा- [] 9

6.2.2.3

आप॑तिः प्रा॒णमे॒व प्री॑णाति परि॒पत॑य इत्या॒ह मनो॑ वै परि॒पति॑र्मन॒
ए॒व प्री॑णाति तनू॒नप्त्र॑ इत्या॒ह तनु॑वो हि ते ताः सम॒वाद्य॑न्त
शा॒क्वरा॑येत्या॒ह श॒क्त्यै॑ हि ते ताः सम॒वाद्य॑न्त श॒क्म-
न्नो॒जिष्ठा॑येत्या॒हौजि॑ष्ठ॒ः हि ते त दा॑त्मनः सम॒वाद्य॑न्ता
-ना॒धृष्ट॑मस्यना॒धृष्य॑-मि॒त्याहा॑ना॒धृष्ट॑ः ह्येत॑दना॒धृष्यं॑ दे॒वाना॑मो॒ज- [] 10

6.2.2.4

इत्या॒ह दे॒वाना॑ः ह्येत॑दो॒जोऽभि॑शस्तिपा अन॒भि॒शस्ते॑न्यमि॒त्याहा॑ -
भि॒शस्ति॑पा ह्येत॑द -न॒भि॒शस्ते॑न्यमनु॒ मे दी॒क्षां दी॒क्षा॑पति-
र्मन्य॑तामि॒त्याह॑ यथा॒यजु॑रेवैतद्-घृ॒तं वै दे॒वा वज्रं॑ कृ॒त्वा सोम॑मघ्न-
न्नन्ति॑कमि॒व खलु॑ वा अस्यै॒तच्च॑रन्ति यत् ता॒नू॒नप्त्रे॑ण प्र॒चर॑न्त्यः
शु॒रः शु॒स्ते दे॒व सो॒माऽऽप्या॑यतामि॒त्याह॑ य- [] 11

6.2.2.5

-दे॒वास्या॑पु॒वाय॑ते यन्मी॒यते॑-तदे॒वास्या॑येतेनाऽऽप्या॑ययत्या
तुभ्य॑मिन्द्रः प्या॒यता॑मा त्वमिन्द्रा॒य प्या॑यस्वेत्या-होभा॒वेवेन्द्रं॑ च
सोमं॑ चाऽऽप्या॑ययत्या प्या॒यय॑ सखी॒न्थ स॒न्या मे॒धये॑त्याहर्त्वि॒जो

वा अस्य सखायस्तानेवाऽऽप्याययति स्वस्ति ते देव सोम
सुत्यामशीये- [] 12

6.2.2.6

-त्याहा ऽऽशिषमेवैतामा शास्ते प्र वा एतेऽस्मा-ल्लोकाच्च्यवन्ते ये
सोममा-प्याययन्त्य-न्तरिक्षदेवत्यो हि सोम आप्यायित एष्टा रायः
प्रेषे भगायेत्याह द्यावापृथिवीभ्यामेव नमस्कृत्यास्मिन् लोके
प्रति तिष्ठन्ति देवासुराः सँयन्ता आसन् ते देवा बिभ्यतोऽग्निं
प्राविशन् तस्मादाहुरग्निः सर्वा देवता इति ते- [] 13

6.2.2.7

ऽग्निमेव वरूथं कृत्वा ऽसुरानभ्यभव-न्नग्निमिव खलु वा एष
प्रविशति योऽवान्तरदीक्षामुपैति भ्रातृव्याभिभूत्यै भवत्यात्मना
पराऽस्य भ्रातृव्यो भवत्यात्मानमेव दीक्षया पाति प्रजामवान्तरदीक्षया
सन्तरां मेखलां समायच्छते प्रजा ह्यात्मनोऽन्तरतरा तप्तव्रतो
भवति मदन्तीभिर्मार्जयते निर्ह्यग्निः शीतेन वायति समिद्ध्यै या ते
अग्ने () रुद्रिया तनूरित्याह स्वयैवैनद् देवतया व्रतयति सयोनित्वाय

शान्त्यै॑ । 14 (यो - वा - ओज - आह॑ य - द॑शीये - ति ते॑ -
ऽग्न - ए॒काद॑श च) (A2)

6.2.3.1

तेषाम॑सुराणां॑ तिस्रः॑ पुर॑ आस-न्नयस्म-य्यवमा॑ऽथ रजता॑ऽथ हरिणी॑
ता दे॒वा जेतुं॑ नाशक्नुवन् ता उपसदै॒वाजिगी॑षन् तस्मादाहु॑र्यश्चै॒वं
वैद॑ यश्च नोपसदा॑ वै महापुरं॑ जयन्तीति॑ त इषु॑ सम॑स्कुर्वता-
ग्निमनी॑क॒ सोम॑ शल्यं॑ विष्णुं॑ तेजनं॑ तेऽब्रुवन्॑ क
इमाम॑सिष्यतीति- [] 15

6.2.3.2

रुद्र॑ इत्यब्रुवन् रुद्रो॑ वै क्रूरः॑ सोऽस्य॑त्विति॑ सोऽब्रवीद् वरं॑ वृणा
अहमे॒व प॑शूना-मधिपतिर॑सानीति॑ तस्माद् रुद्रः॑ पशूना-
मधिपति॑स्ता रुद्रो॑ऽवासृजथ॑ स तिस्रः॑ पुरो॑ भित्त्वै॒भ्यो लो॒केभ्यो॑-
ऽसुरान् प्राणु॑दत॑ यदुपसद॑ उपसद्यन्ते॑ भ्रातृ॑व्यपराणुत्यै॑ नान्यामाहु॑तिं
पुरस्ता॑-ज्जुहुयाद्-यदन्यामाहु॑तिं पुरस्ता॑ज्जुहुया- [] 16

6.2.3.3

द॒न्यन्मुखं॑ कुर्या॒त् सु॒वेणा॑ऽघार॒मा घा॑रयति य॒ज्ञस्य॑ प्र॒ज्ञा॒त्यै॑
 प॒रा॒ड॒ति॒क्रम्य॑ जु॒होति॑ प॒राच॑ ए॒वैभ्यो॑ लो॒केभ्यो॑ यज॒मानो॑ भ्रातृ॒व्यान्
 प्र॒ णु॒द॒ते पु॒नर॒त्या॒क्रम्यो॑प॒सदं॑ जु॒होति॑ प्र॒णु॒द्यैवै॒भ्यो लो॒केभ्यो॑
 भ्रातृ॒व्याज्जि॒त्वा भ्रातृ॒व्यलो॒क-म॒भ्यारो॑हति दे॒वा वै याः॑ प्रा॒तरु॒प॒सद॑
 उ॒पासी॑द-॒न्नह॒स्ताभि॒रसु॒रान् प्रा॒णुद॑न्त याः सा॒यञ् रा॒त्रियै॑ ताभि॒र्यथ्
 सा॒यं प्रा॒तरु॒प॒सद॑- [] 17

6.2.3.4

उ॒प॒स॒द्यन्ते॑ ऽहो॒रात्रा॑भ्या॒मेव॑ तद्-यज॒मानो॑ भ्रातृ॒व्यान् प्र॒ णु॒द॒ते
 याः प्रा॒तर्या॒ज्याः॑ स्यु॒स्ताः सा॒यं पु॒रोऽनु॒वाक्याः॑ कुर्या॒दया॑तयाम॒त्वाय॑
 ति॒स्र उ॒प॒स॒द उ॒पैति॑ त्रय॑ इ॒मे लो॒का इ॒माने॒व लो॒कान् प्री॑णाति
 षट्॒थ् सं प॒द्यन्ते॑ षड्वा ऋ॒तव॑ ऋ॒तूने॒व प्री॑णाति द्वा॒द॒शाही॒ने सोम॑
 उ॒पैति॑ द्वा॒द॒श मा॒साः सँव॑त्सरः सं॒वत्सर॑मे॒व प्री॑णाति चतुर्विं॒शतिः॑
 सं- [] 18

6.2.3.5

प॒द्यन्ते॑ चतु॒र्विंश॑ति-र॒धमा॑सा अ॒र्धमा॑सानेव प्री॒णात्या॑रा॒ग्रा -
मवा॑न्तरदी॒क्षा-मु॒पेया॑द्यः का॒मये॑ताऽस्मिन् मे॒ लो॒केऽर्धु॑कं॒
स्या॑दित्ये॒कम॒ग्रेऽथ॒ द्वाव॑थ त्री॒नथ॒ चतु॑र ए॒षा वा आ॑रा॒ग्रा ऽवा॑न्तरदी॒क्षा
ऽस्मि॑न्नेवास्मै॒ लो॒केऽर्धु॑कं भवति॒ परो॑वरीयसी-मवा॑न्तरदी॒क्षा-
मु॒पेया॑द्यः का॒मये॑तामु॒ष्मिन् मे॒ लो॒केऽर्धु॑कं॒ स्या॑दिति॒ चतु॑रोऽग्रे ()
ऽथ॒ त्री॒नथ॒ द्वाव॑थै॒कमे॑षा वै प॒रोव॑रीयस्य-वा॑न्तरदी॒क्षा ऽमु॒ष्मिन्नेवा॑स्मै
लो॒केऽर्धु॑कं भवति । 19

(अ॒सि॒ष्य॒तीति॑ - जु॒हु॒याथ् - सा॒यं प्रा॑तरु॒पस॑द - श्रु॒तुर्विं॑श॒तिः सं
- चतु॑रोऽग्रे - षोड॑श च) (A3)

6.2.4.1

सु॒वर्गं वा॑ ए॒ते लो॒कं य॑न्ति य॒ उप॑सद॒ उप॑यन्ति तेषां य॒ उन्न॑यते
ही॒यत॑ ए॒व स॒ नोद॑नेषीति॒ सू॒त्रीय॑मिव॒ यो वै स्वार्थे॑तां य॒ताऽश्रान्तो॑
ही॒यत॑ उ॒त स॒ निष्क॑याय॒ सह॑ व॒सति॒ तस्मा॑त् सकृ॒दुन्नी॑य॒ नाप॑रमु॒न्नये॑त
द॒ध्नो॒न्नये॑तै॒तद्वै प॒शूना॑ रूपं॒ रूपे॑णै॒व प॒शूना॑व रु॒न्धे- [] 20

6.2.4.2

य॒ज्ञो दे॒वेभ्यो॑ नि॒लाय॑त वि॒ष्णू रू॒पं कृ॒त्वा स पृ॑थि॒वीं प्रा॒विश॑त्
तं दे॒वा ह॒स्तान्त् स॒ञ् रभ्यै॑च्छन् तमिन्द्र उ॒पर्यु॑पर्य॒त्यक्रा॑मत्
सोऽब्र॑वीत् को मा॒ऽयमु॑पर्यु॒पर्यत्य॑क्रमी-दित्य॒हं दु॒र्गे ह॑न्तेत्यथ
कस्त्वमि॒त्यहं॑ दु॒र्गादा॑हर्तेति सोऽब्र॑वीद् दु॒र्गे वै ह॑न्ताऽवोच॒था व॒राहो॑ऽयं
ॐ॒वा॒ममो॑षः- [] 21

6.2.4.3

स॒प्तानां॑ गि॒रीणां॑ प॒रस्ता॑द्वि॒त्तं ॐ॒वेद्य॑मसु॒राणां॑ बिभ॒र्ति तं ज॑हि
यदि॑ दु॒र्गे ह॑न्ताऽसीति स द॒र्भपु॑ञ्जीलमु॒द्-वृ॑ह्य स॒प्त गि॒रीन् भि॒त्त्वा
तम॑हन्त् सोऽब्र॑वीद् दु॒र्गाद्वा आ॑हर्तावोच॒था ए॒तमा॑ ह॒रेति॑ तमै॒भ्यो य॒ज्ञ
ए॒व य॒ज्ञमा॑ऽहर॒द्यत् तद्वि॒त्तं ॐ॒वेद्य॑मसु॒राणा॑-मवि॒न्दन्त॑ तदे॒कं ॐ॒वेद्यै॑
वे॒दित्व॑मसु॒राणां॑- [] 22

6.2.4.4

ॐ॒वा इ॒यम॑ग्र आसीद् याव॒दासी॑नः प॒राप॑श्यति तावद् दे॒वानां॑ ते दे॒वा
अ॒ब्रुव॑न्नस्त्वे॒व नो॑ऽस्यामपीति किय॒द्वो दा॑स्याम इति याव॒दिय॑ञ्

स॒लावृ॒की त्रिः॑ प॒रि॒क्राम॑ति ताव॒न्नो द॒त्तेति॑ स इन्द्रः॑ स॒लावृ॒की रू॒पं
कृ॒त्वेमां॑ त्रिः॑ स॒र्वतः॑ प॒र्य॒क्राम॑त् तदि॒माम॑विन्दन्त॒ यदि॒माम॑विन्दन्त॒ तद्
वेद्यै॑ वेदि॒त्वञ्- [] 23

6.2.4.5

सा वा इ॒यञ् स॒र्वैव॑ वेदि॒रिय॑ति श॒क्ष्यामी॑ति त्वा अ॒वमा॑य यजन्ते
त्रि॒ञ्शत् प॒दानि॑ प॒श्चात् ति॒रश्ची॑ भवति ष॒ट्त्रि॒ञ्शत् प्रा॒ची
चतु॑र्वि॒ञ्शतिः॑ पु॒रस्ता॑त् ति॒रश्ची॑ द॒शद॑श संप॒द्यन्ते॑ द॒शाक्ष॑रा वि॒राडन्नं॑
वि॒राड् वि॒राजै॑वान्नाद्यमव रु॒न्ध उ॒द्धन्ति॑ यदे॒वास्या॑ अमे॒ध्यं तद॑प
ह॒न्त्यु॒द्धन्ति॑ तस्मा॒दोष॑धयः प॒रा भ॑वन्ति () ब॒र्हिः स्तृ॑णाति
तस्मा॒दोष॑धयः पु॒नरा॑ भ॒वन्त्यु॒त्तरं॑ ब॒र्हिष॑ उत्त॒रब॒र्हिः स्तृ॑णाति
प्र॒जा वै ब॒र्हिर्य॑जमान उत्त॒र ब॒र्हि र्य॑जमान-मे॒वा-य॑जमाना॒दुत्तरं॑
क॒रोति॑ तस्मा॒द्-य॑जमानो ऽय॒जमाना॑दुत्तरः । 24

(रु॒न्धे - वा॒ममो॑षो - वे॒दि॒त्वम॑सुराणां - वै॒दि॒त्वं - भ॑वन्ति -
पञ्च॑वि॒ञ्शतिश्च॑) (A4)

6.2.5.1

यद्वा अनी॑शानो॒ भार॑माद॒त्ते वि॒ वै स लि॑शते॒ यद् द्वाद॑श
 सा॒हस्यो॑प॒सदः॑ स्यु॒स्तिस्त्रो॑ऽहीन॒स्य य॒ज्ञस्य॑ विलो॒म क्रि॑येत॒ तिस्र॑ ए॒व
 सा॒हस्यो॑प॒सदो॑ द्वाद॒शाहीन॑स्य॒ यज्ञ॑स्य॒ सवी॑र्य॒त्वाया॑थो सलो॒म क्रि॑यते
 व॒त्सस्यै॑कः॒ स्तनो॑ भा॒गी हि सोऽथै॑क॒ऽस्तनं॑ व्र॒तमु॑पैत्यथ
 द्वा॒वथ॑ त्री॒नथ॑ च॒तुर॑ ए॒तद्वै॑- [] 25

6.2.5.2

क्षुर॑पवि॒ नाम॑ व्र॒तं यै॑न प्र जा॒तान् भ्रा॑तृ॒व्यान् नु॒दते॑ प्रति॒
 जनि॑ष्यमा॒णान॑थो कनी॒यसै॑व भू॒य उपै॑ति च॒तुरोऽग्रे॑ स्त॒नान्
 व्र॒तमु॑पैत्यथ त्री॒नथ॑ द्वा॒वथै॑कमे॒तद्वै सु॑जघनं॒ नाम॑ व्र॒तं
 तप॑स्य॒ऽसुव॑र्ग्यमथो प्रै॒व जा॑यते प्र॒जया॑ प॒शुभि॑र्य॒वागू
 राज॑न्यस्य॒ व्रतं॑ कू॒रेव॑ वै य॒वागूः कू॒र इ॒व- [] 26

6.2.5.3

राज॑न्यो व॒ज्रस्य॑ रू॒पं स॒मृद्ध्य॑ आ॒मिक्षा॑ वै॒श्यस्य॑ पा॒कय॑ज्ञस्य॒
 रू॒पं पु॒ष्ट्यै॑ पयो॑ ब्रा॒ह्मण॑स्य॒ तेजो॑ वै ब्रा॒ह्मण॑स्ते॒जः प॒यस्ते॒जसै॑व

तेजः॑ पय॑ आ॒त्मन् ध॒त्ते ऽथो॑ पय॑सा॒ वै गर्भा॑ वर्ध॒न्ते गर्भ॑ इव॒ खलु॑
वा ए॒ष यद् दी॑क्षितो॒ यदस्य॑ पयो॑ व्रतं॒ भव॑त्या॒त्मानमे॒व तद् वर्ध॑यति
त्रिव्र॑तो॒ वै मनु॑रासीद् द्विव्र॑ता॒ असुरा॑ एकव्र॑ता- [] 27

6.2.5.4

दे॒वाः प्रा॒तर्म॑ध्यंदि॒ने सा॒यं तन् मनो॑र्व्र॒तमा॑सीत् पा॒कय॑ज्ञस्य॒ रूपं॑ पु॒ष्ट्यै॑
प्रा॒तश्च॑ सा॒यं चा॒सुरा॑णां निर्म॑ध्यं क्षु॒धो रूपं॑ तत॒स्ते परा॑ऽभवन्
म॒ध्यंदि॑ने म॒ध्यरा॑त्रे दे॒वानां॑ तत॒स्तेऽभव॑न्त् सु॒वर्गं लो॒कमा॑यन् यदस्य
म॒ध्यंदि॑ने म॒ध्यरा॑त्रे व्रतं॒ भव॑ति म॒ध्यतो॑ वा अ॒न्नेन॑ भु॒ञ्जते॑ म॒ध्यत॑ ए॒व
तदूर्ज॑ ध॒त्ते भ्रा॑तृ॒व्याभि॑भू॒त्यै भव॑त्या॒त्मना॑- [] 28

6.2.5.5

परा॑ऽस्य भ्रा॑तृ॒व्यो भव॑ति गर्भो॒ वा ए॒ष यद् दी॑क्षितो॒ योनि॑ दी॒क्षित॑विमि॒तं
यद् दी॑क्षितो दी॒क्षित॑विमि॒तात् प्र॑वसेद् यथा॒ योने॑र्गर्भः॒ स्कन्द॑ति
तादृ॑गे॒व तन्न॑ प्र॒वस्त॑व्यमा॒त्मनो॑ गोपी॒थायै॑ष वै व्याघ्रः॒ कुल॑गो॒पो
यद॑ग्निस्तस्माद् यद् दी॑क्षितः प्र॒वसे॑त् स ए॒नमी॑श्वरो॒ऽनू॒त्थाय॑ हन्तो॒र्न
प्र॒वस्त॑व्यमा॒त्मनो॑ गु॒प्त्यै दक्षि॑णतः शय॒ एत॑द्वै यज॒मान॑स्या ()

ऽऽ*य॒त॒न॒७स्व॒ ए॒वाऽऽ*य॒त॒ने॒ श॒ये॒ ऽग्नि॑म॒भ्या॒वृ॒त्य॒ श॒ये॒ दे॒वता॑ ए॒व
य॒ज्ञम॑भ्या॒वृ॒त्य॒ श॒ये॒ । 29 (ए॒त॒द्वै - कू॒र इ॒वै - क॒व्र॒ता - आ॒त्म॒ना -
य॒ज॒मा॒न॒स्य॑ - त्रयो॑द॒श च॑) (A5)

6.2.6.1

पु॒रो॒ह॒वि॒षि॑ दे॒व॒य॒ज॒ने॒ या॒ज॒ये॒द्यं॑ का॒म॒ये॒तो॒पै॒न॒मु॒त्त॒रो॒ य॒ज्ञो॑ न॒मे॒द॒भि॒
सु॒व॒र्गं॑ लो॒कं॑ ज॒ये॒दि॒त्ये॒त॒द्वै॒ पु॒रो॒ह॒वि॒र्दे॒व॒य॒ज॒नं॑ य॒स्य॒ हो॒ता॑ प्रा॒त॒र॒नु॒वा॒क
-म॒नु॒ब्रु॒व-न्न॒ग्नि॑म॒प आ॒दि॒त्य॒म॒भि॒ वि॒प॒श्य॒त्यु॒पै॒न॒मु॒त्त॒रो॒ य॒ज्ञो॑ न॒म॒त्य॒भि॒
सु॒व॒र्गं॑ लो॒कं॑ ज॒य॒त्या॒प्ते॑ दे॒व॒य॒ज॒ने॒ या॒ज॒ये॒द् - भ्रा॒तृ॒व्य॒व॒न्तं॑ प॒न्थां॑
वा॒ऽधि॒स्प॒र्श॒ये॒त् क॒र्त॒ं वा॒ या॒व॒न्ना॒न॒से॒ या॒त॒वै॒- [] 30

6.2.6.2

न र॒था॒यै॒त॒द्वा॒ आ॒प्तं॑ दे॒व॒य॒ज॒न॒मा॒प्नो॒त्ये॒व भ्रा॒तृ॒व्यं॑ नै॒नं॑ भ्रा॒तृ॒व्य
आ॒प्नो॒त्ये॒को॒न्न॒ते॑ दे॒व॒य॒ज॒ने॒ या॒ज॒ये॒त् प॒शु॒का॒म-मे॒को॒न्न॒ता॒द्वै
दे॒व॒य॒ज॒ना॒द॒ङ्गि॒र॒सः॑ प॒शू॒न॒सृ॒ज॒न्ता॒न्त॒रा॒ स॒दो॒ह॒वि॒र्धा॒ने॑ उ॒न्न॒त॒७
स्या॒दे॒त॒द्वा॒ ए॒को॒न्न॒तं॑ दे॒व॒य॒ज॒नं॑ प॒शु॒मा॒ने॒व भ॒व॒ति॒ त्र्यु॒न्न॒ते॑ दे॒व॒य॒ज॒ने॒
या॒ज॒ये॒त् सु॒व॒र्ग॒का॒मं॑ त्र्यु॒न्न॒ता॒द्वै॑ दे॒व॒य॒ज॒ना॒द॒ङ्गि॒र॒सः॑ सु॒व॒र्गं॑ लो॒क॒मा॒य॒-

नन्तरा ऽऽहवनीयं च हविर्धानं चो- [] 31

6.2.6.3

-न्नतः स्यादन्तरा हविर्धानं च सदश्चान्तरा सदश्च गार्हपत्यं
चैतद्वै त्र्युन्नतं देवयजनं सुवर्गमेव लोकमेति प्रतिष्ठिते देवयजने
याजयेत् प्रतिष्ठाकाममेतद्वै प्रतिष्ठितं देवयजनं यथ सर्वतः समं
प्रत्येव तिष्ठति यत्रान्या अन्या ओषधयो व्यतिषक्ताः स्युस्तद्-याजयेत्
पशुकाममेतद्वै पशूनां रूपं रूपेणैवास्मै पशू- [] 32

6.2.6.4

नव रुन्धे पशुमानेव भवति निर्ऋतिगृहीते देवयजने याजयेद्यं
कामयेत् निर्ऋत्यास्य यज्ञं ग्राहयेयमित्येतद्वै निर्ऋतिगृहीतं
देवयजनं यथ सदृश्यै सत्या ऋक्षं निर्ऋत्यैवास्य यज्ञं ग्राहयति
व्यावृत्ते देवयजने याजयेद् व्यावृत्कामं यं पात्रे वा तल्पे वा
मीमांसेरन् प्राचीनमाहवनीयात् प्रवणं स्यात् प्रतीचीनं
गार्हपत्यादेतद्वै व्यावृत्तं देवयजनं वि पाप्मना () भ्रातृव्येणा-
ऽऽवर्तते नैनं पात्रे न तल्पे मीमांसन्ते कार्ये देवयजने

याजयेद्-भूतिकामं कार्यो वै पुरुषो भवत्येव । 33

(यातवै - हविर्धानं च - पशून् - पाप्मना - ऽष्टादश च) (A6)

6.2.7.1

तेभ्य उत्तरवेदिः सि॒न्ही रूपं कृत्वोभया-नन्तराऽपक्रम्यातिष्ठत् ते
देवा अमन्यन्त यतरान् वा इयमुपावथ्स्यति त इदं भविष्यन्तीति
तामुपामन्त्रयन्त साऽब्रवीद् वरं वृणै सर्वान् मया कामान् व्यश्नवथ
पूर्वा तु माऽग्नेराहुतिरश्नवता इति तस्मादुत्तरवेदिं पूर्वामग्ने-
व्याधारयन्ति वारेवृत्॑ ह्यस्यै शम्यया परि मिमीते- [] 34

6.2.7.2

मात्रैवास्यै साथो युक्तेनैव युक्तमव रुन्धे वित्तायनी मेऽसीत्याह
वित्ता ह्येनानावत् तित्तायनी मेऽसीत्याह तित्कान् ह्येनानावदवतान्मा
नाथितमित्याह नाथितान् ह्येनानावदवतान्मा व्यथितमित्याह व्यथितान्
ह्येनानावद्-विदेरग्निर्नभो नामा- [] 35

6.2.7.3

ग्ने॑ अङ्गिर॑ इति॑ त्रि॒र्हर॑ति॒ य ए॒वैषु॑ लो॒केष्व॒ग्नय॑-स्ताने॒वाव॑ रु॒न्धे
तू॒ष्णीं च॑तु॒र्थं ह॑रत्य॒नि-रु॒क्तमे॒वाव॑ रु॒न्धे सि॒न्ही॒रसि॑
महि॒षी॒रसी॒त्याह॑ सि॒न्ही॒र्ह्येषा॑ रू॒पं कृ॒त्वोभ॑या-नन्तरा॑ ऽप॒क्रम्या॑ति॒ष्ठदु॒रु
प्र॒थस्वो॒रु ते॑ य॒ज्ञप॑तिः प्र॒थता॑मि॒त्याह॑ यज॒मान॑मे॒व प्र॒जया॑ प॒शुभिः॑
प्रथ॑यति ध्रु॒वा- [] 36

6.2.7.4

ऽसी॑ति स॒न् ह॑न्ति धृ॒त्यै दे॒वेभ्यः॑ शु॒न्धस्व॑ दे॒वेभ्यः॑ शुं॒भस्वे॒त्यव॑
चो॒क्षति॑ प्र च॑ किर॒ति शु॒द्ध्या॑ इन्द्र॒घोष॑स्त्वा वसु॒भिः पु॒रस्ता॑त्
पा॒त्वित्या॑ह दि॒ग्भ्य ए॒वैनां॑ प्रो॒क्षति॑ दे॒वाश्चे॒दु-त्तर॑वेदि॒रुपा॑वव॒र्तीहै॒व वि
ज॒याम॑हा इत्य॒सुरा॑ वज्र॒मुद्य॑त्य दे॒वान॒भ्याय॑न्त॒ तानि॑न्द्र॒घोषो॑ वसु॒भिः
पु॒रस्ता॑दपा- [] 37

6.2.7.5

-नु॒दत॑ म॒नोज॑वाः पि॒तृभि॑र्दक्षि॒णतः॑ प्र॒चे॒ता रु॒द्रैः
पश्चा॑द्-वि॒श्वक॑र्माऽऽदि॒त्यैरु॑त्तरतो॒ यदे॒वमु॑त्तरवेदिं प्रो॒क्षति॑ दि॒ग्भ्य
ए॒व तद्-य॑ज॒मानो॑ भ्रातृ॒व्यान् प्र॑ णु॒दत॑ इन्द्रो॒ यती॑न्थ् सा॒लावृ॑के॒भ्यः

प्रायच्छत् तान् दक्षिणत उत्तरवेद्या आदन् यत् प्रोक्षणीना-मुच्छिष्येत
तद् दक्षिणत उत्तरवेद्यै नि नयेद्-यदेव तत्र क्रूरं तत् तेन शमयति
यं द्विष्यात् तं ध्यायेच्छुचै () वैनमर्पयति । 38

(मिमीते - नाम - ध्रुवा - ऽप - शुचा - त्रीणि च) (A7)

6.2.8.1

सोत्तरवेदिरब्रवीथ् सर्वान् मया कामान् व्यश्नवथेति ते देवा
अकामयन्तासुरान् भ्रातृव्यानभि भवेमेति तेऽजुहवुः सि॒॒हीरसि
सपन्नसाही स्वाहेति तेऽसुरान् भ्रातृव्या-नभ्यभवन् तेऽसुरान्
भ्रातृव्या-नभिभूयाकामयन्त प्रजां विन्देमहीति तेऽजुहवुः सि॒॒हीरसि
सुप्रजावनिः स्वाहेति ते प्रजामविन्दन्त ते प्रजां वित्त्वा- [] 39

6.2.8.2

ऽकामयन्त पशून् विन्देमहीति तेऽजुहवुः सि॒॒हीरसि रायस्पोषवनिः
स्वाहेति ते पशून्विन्दन्त ते पशून् वित्त्वाऽकामयन्त प्रतिष्ठां
विन्देमहीति तेऽजुहवुः सि॒॒ही-रस्यादित्यवनिः स्वाहेति त इमां
प्रतिष्ठामविन्दन्त त इमां प्रतिष्ठां वित्त्वाऽकामयन्त देवता आशिष

उ॒पे॒या॒मे॒ति॒ ते॒ऽजु॒हवुः॒ सि॒॒॒॒ही॒र॒स्या॒ वह॒ दे॒वान् दे॒वय॒ते- [] 40

6.2.8.3

यज॑मा॒नाय॒ स्वा॒हे॒ति॒ ते॒ दे॒वता॑ आ॒शि॒ष उ॒पा॒यन् पञ्च॑ कृ॒त्वो
व्या॑धा॒रय॒ति पञ्चा॑क्ष॒रा प॒ङ्क्तिः॑ पा॒ङ्क्तो य॒ज्ञो य॒ज्ञमे॒वाव रु॒न्धे ऽक्ष॑ण॒या
व्या॑धा॒रय॒ति तस्मा॑दक्ष॒णया॒ प॒शवो॑ऽङ्गानि॒ प्र॒हर॒न्ति प्र॒तिष्ठि॑त्यै
भू॒तेभ्य॑स्त्वे॒ति स्मृ॒चमु॒द्रु॒ह्णाति॒ य ए॒व दे॒वा भू॒तास्तेषां॑ तद्-भा॒गधे॒यं
ता॒ने॒व ते॒न प्री॑णाति॒ पौतु॑द्र॒वान् परि॑धीन् परि॒ दधा॑त्येषां- [] 41

6.2.8.4

लो॒का॒नां वि॒धृ॒त्या अ॒ग्नेस्त्र॑यो ज्य॒याया॑ऽसो भ्रा॒तर आ॒सन् ते
दे॒वेभ्यो॑ ह॒व्यं व॑हन्तः प्रा॒मी॒यन्त सौ॑ऽग्नि॒रबि॑भेदि॒त्थं वा॒व
स्य आ॒र्ति॒माऽरि॑ष्यतीति॒ स नि॒ला॒यत॑ स यां व॒नस्प॑तिष्व॒वस॑तां
पू॒तुद्रौ॑ या॒मोष॑धीषु॒ ताऽसु॑गन्धि॒तेज॑ने॒ यां प॒शुषु॑ तां पे॒त्वस्या॑न्तरा
शृ॒ङ्गे तं॑ दे॒वताः॑ प्र॒षमै॑च्छन् तम॒न्ववि॑न्दन् तमब्रु॒व- [] 42

6.2.8.5

-न्नु॒प न॒ आ वर्त॑स्व ह॒व्यं नो॑ व॒हेति॒ सौ॑ऽब्र॒वीद् वरं॑ वृ॒णौ यदे॒व
गृ॒ही॒तस्या॑हु॒तस्य॑ ब॒हिः परि॑धि॒ स्कन्दा॑त् तन्मे॒ भ्रातृ॑णां

भा॒ग॒धे॒य॒म॒स॒दि॒ति॒ तस्मा॑द्-यद्-गृ॒ही॒त॒स्याहु॑ तस्य ब॒हिः॑ परि॒धि
स्क्र॒न्द॒ति॒ तेषां॑ तद् भा॒ग॒धे॒यं॑ ता॒ने॒व ते॒न प्री॑णाति सोऽम॒न्य॒ता॒स्थ॒न्वन्तो॑
मे पूर्वे॑ भ्रा॒तरः॑ प्रा॒मेष॑ता॒स्थानि॑ शा॒तया॑ इति॒ स या॒न्य- [] 43

6.2.8.6

-स्था॒न्य॒शा॒तय॑त॒ तत् पू॒तु॒द्रव॑-भ॒वद्-यन्मा॑ꣳ स॒मुप॑मृ॒तं तद्-गुल्गु॑लु
यदे॒तान्त् सं॑भा॒रान्त् सं॑ भ॒रत्य॑ग्निमे॒व तथ् सं॑भ॒रत्य॑ग्नेः पु॒रीष॑-
मसी॑त्या॒हाग्ने॑र्ह्य॒तत् पु॒रीषं॑ यथ् सं॒भारा॑ अथो ख॒ल्वाहु॑रे॒ते वा॒वैनं॑ ते
भ्रा॒तरः॑ परि॒ शेरे॑ यत् पौ॒तु॒द्रवाः॑ परि॒धय॑ इति । 44 (वि॒त्त्वा - दे॒वय॑त
- ए॒षा - म॒ब्रुव॑न् - या॒नि - चतु॑श्च॒त्वारि॑ꣳश॒च्च) (A8)

6.2.9.1

ब॒द्धम॑व॒ स्य॑ति वरु॒णपा॑शादे॒वैने॑ मुञ्च॑ति प्र॒णे॒ने॒क्ति॒ मे॒ध्ये ए॒वैने॑
करो॑ति सा॒वि॒त्रि॒यर्चा॑ हु॒त्वा ह॒वि॒र्धा॒ने प्र॑ वर्त॒यति॑ स॒वि॒तृ॒प्र॒सू॒त ए॒वैने॑
प्र॑ वर्त॒यति॑ वरु॒णो वा ए॒ष दु॒र्वा॒गु॒भय॑तो ब॒द्धो यद॑क्षः स
यदु॒थ् स॒र्जे॒द्-य॑ज॒मान॑स्य गृ॒हा-न॒भ्यु॒त्स॒र्जे॒थ् सु॒वाग्दे॑व दु॒र्याꣳ
आ व॑दे॒त्याह॑ गृ॒हा वै दु॒र्याः॑ शा॒न्त्यै॑ प॒न्यु- [] 45

6.2.9.2

पान॑क्ति॒ पत्नी॑ हि॒ सर्व॑स्य मि॒त्रं मि॒त्रत्वा॑य यद्वै पत्नी॑ य॒ज्ञस्य॑ करोति॒
मि॒थुनं॑ तदथो॒ पत्न्या॑ ए॒वैष॑ य॒ज्ञस्या॑-न्वारं॑भोऽन॒वच्छि॑त्यै॒ वर्त्मना॑ वा
अ॒न्वित्य॑ य॒ज्ञं रक्षा॑सि जिघा॑सन्ति॒ वैष्ण॑वीभ्या॒मृग्भ्यां॑ व॒र्त्मनो॑
जु॒होति॑ य॒ज्ञो वै विष्णु॑र्य॒ज्ञादे॒व रक्षा॑स्यप॒ हन्ति॑ यद॒ध्वर्यु॑-र॒न॒ग्ना-
वाहु॑तिं जुहु॒या-द॒न्धोऽध्व॑र्युः स्याद्-रक्षा॑सि य॒ज्ञं ह॒न्युर्- [] 46

6.2.9.3

-हिर॑ण्यमु॒पास्य॑ जुहोत्य॒ग्नित्ये॒व जुहोति॑ नान्धोऽध्व॑र्युर्भवति॒ न
य॒ज्ञं रक्षा॑सि घ्नन्ति॒ प्राची॑ प्रेत॒मध्व॑रं कल्पयन्ती॒ इत्या॑ह
सुव॑र्गमे॒वैनं॑ लो॒कं ग॑मयत्यत्र॒ रमे॑थां व॒र्ष्मन् पृ॑थिव्या॒ इत्या॑ह व॒र्ष्म
ह्येत॑त् पृथिव्या॒ यद् दे॒वय॑जनं॒ शिरो॑ वा ए॒तद्-य॒ज्ञस्य॑ यद्ध॒विर्धानं॑
दि॒वो वा विष्ण॑वु॒त वा पृ॑थिव्या- [] 47

6.2.9.4

इत्या॑शीर्ष॒दय॑र्चा दक्षि॒णस्य॑ ह॒विर्धान॑स्य॒ मेथीं॑ नि॒ हन्ति॑ शी॒र्षत॑ ए॒व
य॒ज्ञस्य॑ यज॒मान॑ आ॒शिषो॑ऽव॒ रुन्धे॑ दण्डो॒ वा औ॒पर॑स्तृतीयस्य॒
ह॒विर्धान॑स्य॒ वषट्कारे॑-णाक्ष॒-मच्छि॑नद्-यत्-तृतीयं॒ छदि॑र्.

ह॒वि॒र्धा॒न॒यो-रु॒दा॒हि॒य॒ते तृ॒ती॒य॒स्य ह॒वि॒र्धा॒न॒स्याव॒रु॒द्ध्यै शि॒रो वा
 ए॒तद्-य॒ज्ञ॒स्य य॒द्ध॒वि॒र्धा॒नं वि॒ष्णो र॒राट॑म॒सि वि॒ष्णोः पृ॒ष्ठ॒म॒सी॒त्याह॑
 तस्मा॑दे॒ताव॒द्धा शि॒रो वि॒ष्यू॒तं वि॒ष्णोः () स्यू॒र॒सि
 वि॒ष्णोर्ध्रु॒व॒म॒सी॒त्याह॑ वैष्ण॒व॒ं हि दे॒व॒तया॑ ह॒वि॒र्धा॒नं यं प्र॒थ॒मं ग्र॒न्थिं
 ग्र॒न्थी॒याद्य॑त् तं न वि॒स्र॒ं स॒येद॒मेहे॒नाध्व॑र्युः प्र॒मी॒येत॑ तस्मा॒त् स
 वि॒स्र॒स्यः । 48 (प॒त्नी - ह॒न्यु - र्वा पृ॒थि॒व्या - वि॒ष्यू॒तं वि॒ष्णोः -
 षड्वि॑ंश॒तिश्च) (A9)

6.2.10.1

दे॒व॒स्य त्वा स॒वि॒तुः प्र॒स॒व इत्य॑भि॒मा द॒त्ते प्र॒सू॒त्या अ॒श्विनौ॑
 र्बा॒हु॒भ्यामि॒त्याहा॒श्विनौ॑ हि दे॒वा॒नाम॑ध्व॒र्यू आस्तां॑ पू॒ष्णो
 ह॒स्ता॒भ्यामि॒त्याह॑ य॒त्यै व॒ज्र इ॒व वा ए॒षा यद॑भ्रि॒रभ्रि॒र॒सि
 ना॒रि॒र॒सी॒त्याह॑ शा॒न्त्यै का॒ण्डे का॒ण्डे वै क्रि॒य॒मा॒णे य॒ज्ञ॒ं र॒क्षां॒सि
 जि॒घा॒ंस॒न्ति परि॑लि॒खित॑ र॒क्षः परि॑लि॒खिता॑ अ॒रा॒तय॑ इ॒त्याह॑
 र॒क्ष॒सा॒मप॑ह॒त्या- [] 49

6.2.10.2

इ॒दम॒ह॒ र॒क्ष॒सो ग्री॒वा अ॒पि कृ॒न्ता॒मि योऽ॒स्मान् द्वेष्टि॑ यं च॒ वयं॑
द्विष्म॑ इ॒त्याह॑ द्वौ वा॒व पु॒रुषौ॑ यं चै॒व द्वेष्टि॑ यश्चैनं॑ द्वेष्टि॑ तयो॒रेवा॒नन्तरा॑यं
ग्री॒वाः कृ॒न्तति॑ दि॒वे त्वाऽ॒न्तरि॑क्षाय॒ त्वा पृ॒थि॒व्यै त्वे॒त्याहै॒भ्य ए॒वैनां॑
लो॒केभ्यः॑ प्रोक्षति॑ प॒रस्ता॑दर्वाचीं प्रोक्षति॑ तस्मात्- [] 50

6.2.10.3

प॒रस्ता॑दर्वाचीं म॒नुष्या॑ ऊ॒र्जमु॑प जी॒वन्ति॑ कू॒रमि॒व वा ए॒तत् क॑रोति
यत् ख॒नत्य॑पोऽव॒ नय॑ति शान्त्यै॒ यव॑मती॒रव॑ न॒यत्यू॒र्वे य॒व ऊ॒र्गु॒दुम्ब॑र
ऊ॒र्जे॒वोर्ज॑ र्जं॒ सम॑र्धयति॒ यज॑मानेन॒ सम्मि॑तौदुम्बरी॒ भव॑ति या॒वाने॑व
यज॑मानस्ता॒वती-मे॒वास्मि॑-न्नू॒र्जं द॑धाति॒ पित॑रूणां॒ स॒दन॑मसीति॒
ब॒र्हि॒रव॑ स्तृणाति॒ पित॑दे॒वत्या॑(१) - [] 51

6.2.10.4

ह्येत॑द्-यन्नि॒खातं॑ य॒द्-ब॒र्हि॒रन॑वस्तीर्य॒ मि॒नुया॑त् पि॒तृदे॒वत्या॑
नि॒खाता॑ स्याद्-ब॒र्हि॒रव॑स्तीर्य॒ मि॒नोत्य॑स्यामे॒वैनां॑ मि॒नोत्य॑थो
स्वा॒रुह॑मे॒वैनां॑ क॒रोत्यु॑द्-दि॒व स्त॒भाना॑ऽऽन्तरि॒क्षं पृ॒णे॒त्याहै॒षां

लोकानां विधृत्यै द्युतानस्त्वा मारुतो मिनोत्वित्याह द्युतानो ह स्म वै
मारुतो देवानामौदुंबरीं मिनोति तेनैवै- [] 52

6.2.10.5

-नां मिनोति ब्रह्मवनिं त्वा क्षत्रवनिमित्याह यथायजुरेवैतद् घृतेन
द्यावापृथिवी आ पृणेत्यामित्यौदुंबरीं जुहोति द्यावापृथिवी एव
रसेनानक्त्या-न्तमन्व-वस्रवयत्यान्तमेव यजमानं तेजसा-
नक्त्यैन्द्रमसीति छदिरधि नि दधात्यैन्द्रं हि देवतया सदो विश्वजनस्य
छायेत्याह विश्वजनस्य ह्येषा छाया यथ् सदो नवछदि- [] 53

6.2.10.6

तेजस्कामस्य मिनुयात् त्रिवृता स्तोमेन सम्मितं तेजस्त्रिवृत् तेजस्व्यैव
भव-त्येकादश-छदीन्द्रियकाम-स्यैकादशाक्षरा त्रिष्टुगिन्द्रियं
त्रिष्टुगिन्द्रियाव्यैव भवति पञ्चदशछदि भ्रातृव्यवतः पञ्चदशो वज्रो
भ्रातृव्याभिभूत्यै सप्तदशछदि प्रजाकामस्य सप्तदशः प्रजापतिः
प्रजापतेराप्त्या एकविंशतिछदि प्रतिष्ठाकाम-स्यैकविंशः स्तोमानां
प्रतिष्ठा प्रतिष्ठित्या उदरं वै सद ऊर्गुदुंबरो मध्यत औदुंबरीं मिनोति

मध्य॑त ए॒व प्र॒जाना॑मूर्जं॑ दधा॒ति तस्मा॑न्- [] 54

6.2.10.7

मध्य॑त ऊ॒र्जा भु॑ञ्जते यज॑मानलो॒के वै दक्षि॑णानि छदी॒ष्णि
 भ्रातृ॑व्यलो॒क उत्तरा॑णि दक्षि॑णान्यु॒त्तरा॑णि करो॒ति यज॑मान-मे॒वा-
 यज॑मानादु॒त्तरं करो॒ति तस्मा॑द् यज॑मानोऽयज॑मानादु॒त्तरो ऽन्तर्व॑र्तान्
 करो॒ति व्यावृ॑त्यै तस्मा॑दरण्यं प्र॒जा उप जी॑वन्ति परि॒ त्वा गि॑र्वणो गि॒र
 इत्या॑ह यथा॒यजु॑रेवै॒तदिन्द्र॑स्य स्यूर॒सीन्द्र॑स्य ध्रु॒वम॑सीत्या॒हैन्द्र॑
 हि दे॒वतया॑ सदो () यं प्र॒थमं॑ ग्रन्थिं॒ ग्रन्थि॑नीयाद्यत् तं न
 वि॒स्र॑ स॒येदमे॑हेनाध्व॒र्युः प्र॑मीयेत तस्मा॑त् स वि॒स्रस्यः॑ । 55
 (अप॑हत्यै - तस्मा॑त् - पितृ॑दे॒वत्यं॑ - तेनै॒व - नव॑छदि - तस्मा॑त्
 - सदः॑ - पञ्च॑दश च) (A10)

6.2.11.1

शि॒रो वा ए॒तद्-य॒ज्ञस्य॑ यद्ध॒विर्धानं॑ प्रा॒णा उप॑रवा ह॒विर्धाने॑ खा॒यन्ते
 तस्मा॑च्छी॒र्षन् प्रा॒णा अध॑स्तात् खा॒यन्ते तस्मा॑दध॒स्ताच्छी॑र्षः
 प्रा॒णा रक्षो॑ह॒णो वल॑ग॒हनो॑ वैष्ण॒वान् खना॑मीत्या॒ह वैष्ण॑वा हि

दे॒वत॑यो॒पर॒वा अ॒सुरा॑ वै नि॒र्यन्तो॑ दे॒वानां॑ प्रा॒णेषु॑ व॒लगान् न्य॒खनन्॑
 तान् बा॒हुमा॑त्रेऽन्ववि॒न्दन् तस्मा॑द् बा॒हुमा॑त्राः खा॒यन्त इ॒दम॒हं तं
 व॒लग॑मु॒द्वपा॑मि- [] 56

6.2.11.2

यं नः॑ स॒मानो॑ यम॒स॒मानो॑ निच॒खाने॑त्याह द्वौ वाव॑ पु॒रुषौ॑
 यश्चै॒व स॒मानो॑ यश्चा॒स॒मानो॑ यमे॒वास्मै॑ तौ व॒लगं॑ नि॒खन॑तस्तमे॒वोद्व॑पति
 संतृ॑णत्ति तस्मा॒त् संतृ॑ण्णा अ॒न्तर॑तः प्रा॒णा न सं भि॑नत्ति
 तस्मा॑दसं॒भिन्नाः॑ प्रा॒णा अ॒पोऽव॑ नयति तस्मा॑दा॒र्द्रा अ॒न्तर॑तः प्रा॒णा
 यव॑मती॒रव॑ नय- [] 57

6.2.11.3

-त्यूर्ग्वै॑ यवः प्रा॒णा उ॒पर॒वाः प्रा॒णेष्वे॒वोर्जं॑ दधाति ब॒र्हि॒रव॑ स्तृणाति
 तस्मा॑ल्लो॒मशा॑ अ॒न्तर॑तः प्रा॒णा आ॒ज्ये॒न व्या॑घारयति ते॒जो वा आ॒ज्यं॑
 प्रा॒णा उ॒पर॒वाः प्रा॒णेष्वे॒व ते॒जो दधा॑ति ह॒नू वा ए॒ते य॒ज्ञस्य॑
 यदधि॑षवणे न सं तृ॑णत्य संतृ॑ण्णे हि ह॒नू अथो॑ ख॒लु दी॒र्घसो॑मे
 संतृ॑द्ये धृ॒त्यै शि॒रो वा ए॒तद्-य॒ज्ञस्य॑ यद्ध॒वि॒र्धानं॑- [] 58

6.2.11.4

प्रा॒णा उप॒रवा ह॒नू अधि॒षव॑णे जि॒ह्वा च॒र्म ग्रा॒वा॒णो द॒न्ता
 मु॒खमा॑हवनीयो ना॒सिको॑-त्तर॒वेदि॑-रु॒दर॑ꣳ सदो॒ यदा॑ खलु॒ वै
 जि॒ह्वाया द॒थ्स्वधि॑ खा॒दत्य॑थ॒ मुखं॑ गच्छति॒ यदा॑ मुखं॒ गच्छ॑त्यथो॒दरं॑
 गच्छ॑ति तस्मा॒द्धवि॑र्धाने च॒र्मन्ना॑धि ग्रा॒वभि॑रभिषु॒त्याऽऽ*ह॑वनीये हु॒त्वा
 प्र॒त्यञ्चः॑ प॒रेत्य॑ सद॒सि भ॑क्षयन्ति॒ यो वै वि॒राजो॑ यज्ञ॒मुखे॑ दोहं॒ वैद॑
 दु॒ह ए॒वै () ना॒मियं॑ वै वि॒राट् तस्यै॑ त्वक् च॒र्मो॒धोऽधि॑षव॒णे
 स्त॒ना उप॒रवा ग्रा॒वा॒णो व॒थ्सा ऋ॒त्विजो॑ दुहन्ति॒ सोमः॑ प॒यो
 य ए॒वं वैद॑ दु॒ह ए॒वैनां॑ । 59

(व॒पामि॑ - य॒वम॑ती॒रव॑ नयति - ह॒विर्द्धानि॑ - मे॒व -
 त्रयो॑विं॒शति॑श्च) (A11)

Prasna Korvai with starting Padams of 1 to 11 Anuvaakams :-

(य॒दु॒भौ - दे॒वा॒सुराः॑ मि॒थ - स्ते॒षाꣳ - सु॒वर्गं॑ - य॒द्वा अ॒नी॒शानः॑ -
 पु॒रो॒ह॒वि॒षि - ते॒भ्यः॑ - सो॒त्तर॒वे॒दि - ब॒द्धन् - दे॒वस्या॑ऽभिं॒ व॒ज्रः॑ -
 शि॒रो वा - ए॒का॒द॒श)

Korvai with starting Padams of 1, 11, 21 Series of Panchaatis :-

(य॒दु॒भा – वि॒त्या॒ह दे॒वानां॑ – य॒ज्ञो दे॒वेभ्यो॑ – न र॒थाय॑ –
य॒ज॒मा॒नाय॑ – प॒र॒स्ता॒दर्वा॒ची – न॒व पञ्चा॒शत्)

First and Last Padam of Second Prasnam of 6th Kanda

(य॒दु॒भौ – दु॒ह ए॒वैनां॑)

॥ हरिः ओं ॥

॥ कृष्ण यजुर्वेदीय तैत्तिरीय संहितायां षष्ठकाण्डे द्वितीयः प्रश्नः समाप्तः ॥

ओं नमः परमात्मने, श्री महागणपतये नमः, श्री गुरुभ्यो नमः

हरिः ओं

6.3 षष्ठकाण्डे तृतीयः प्रश्नः – सोममन्त्रब्राह्मणनिरूपणं

6.3.1.1

चा॒त्वा॒लाद्-धि॒ष्णि॒या॒नु॒प॒ व॒प॒ति॒ यो॒नि॒र्वै॒ य॒ज्ञ॒स्य॒ चा॒त्वा॒लं॑ य॒ज्ञ॒स्य॑
स॒यो॒नि॒त्वा॒य॒ दे॒वा॒ वै॒ य॒ज्ञं॑ प॒रा॒ऽज॒य॒न्त॒ त॒मा॒ग्नी॒ध्रा॒त् पु॒न॒र॒पा॒ज॒य॒न्ने॒त॒द्वै॑
य॒ज्ञ॒स्या-प॒रा॒जि॒तं॑ य॒दा॒ग्नी॒ध्रं॑ य॒दा॒ग्नी॒ध्रा॒द्धि॒ष्णि॒या॒न् वि॒हर॑ति॒ य॒दे॒व
य॒ज्ञ॒स्या-प॒रा॒जि॒तं॑ त॒त॒ ए॒वैनं॑ पु॒न॒स्त॒नु॒ते॒ प॒रा॒जि॒त्ये॒व॒ ख॒लु॒ वा॒ ए॒ते
य॒न्ति॒ ये॒ ब॒हि॒ष्प॒व॒मा॒न॑ सर्प॒न्ति॒ ब॒हि॒ष्प॒व॒मा॒ने॒ स्तु॒त- [] 1

6.3.1.2

आ॒हा॒ग्नी॒द॒ग्नी॒न् वि॒ हर॑ ब॒र्हिः॑ स्तृ॒णा॒हि॒ पु॒रो॒डा॒शा॑ अ॒लं॑ कु॒र्वि॒ति॑
य॒ज्ञ॒मे॒वा॒प॒जि॒त्य॒ पु॒न॒स्त॒न्वा॒ना॒ य॒न्त्य॒ङ्गा॒रै॒र्द्वे॑ स॒व॒ने॒ वि॒ हर॑ति॒
श॒ला॒का॒भि-स्तृ॒तीय॑ स॒शु॒क्र॒त्वा॒या॒थो॒ सं॒ भ॒र॒त्ये॒वैन॑द्धि॒ष्णि॒या॒ वा
अ॒मु॒ष्मि॒न् लो॒के॒ सो॒म॒म॒र॒क्ष॒न् ते॒भ्यो॒ऽधि॒ सो॒म॒मा॒ऽहर॑न् त
म॒न्व॒वा॒य॒न्तं॑ प॒र्य॒वि॒श॒न् य॒ ए॒वं वे॒द॑ वि॒न्द॒ते- [] 2

6.3.1.3

परिवेष्टारं॑ ते सोम॑पी॒थेन॑ व्या॒र्ध्यन्त॑ ते दे॒वेषु॑ सोम॑पी॒थमै॑च्छन्त॑ तान्
 दे॒वा अब्रु॑वन् द्वे॒द्वे नाम॑नी कुरु॒ध्वमथ॑ प्र वाऽऽप्स्य॑थ न वेत्य॒ग्नयो॑ वा
 अथ॑ धि॒ष्ण्यास्तस्मा॑द् द्विना॑मा ब्राह्म॒णोऽर्धु॑कस्तेषां॑ ये नेदि॒ष्टं
 पर्य॑वि॒शन् ते सोम॑पी॒थं प्राऽ*प्नु॑वन्नाह॒वनीय॑ आ॒ग्नीध्री॑यो हो॒त्रीयो
 मार्जा॑लीयस्तस्मा॑त् तेषु॑ जुह्वत्य॒तिहाय॑ वषट् करोति॑ वि ह्ये- [] 3

6.3.1.4

-ते सोम॑पी॒थेनाऽऽ*र्ध्यन्त॑ दे॒वा वै याः प्रा॑ची-राहु॒ती-रजु॑हवुर्ये
 पु॒रस्ता॑दसुरा॒ आसन्॑ ताऽस्ता॒भिः प्रा॑णुदन्त॒ याः प्र॑तीचीर्ये पश्चा॑दसुरा
 आसन्॑ ताऽस्ता॒भि-रपा॑नुदन्त॒ प्राची॑रन्या आहु॒तयो॑ हूयन्ते॑ प्रत्य॒डासी॑नो
 धि॒ष्ण्यान् व्या॑घारयति पश्चा॑च्चैव पु॒रस्ता॑च्च यज॑मानो भ्रातृ॒व्यान्
 प्र णु॑दते तस्मा॑त् प॒राचीः॑ प्र॒जाः प्र॑ वीयन्ते प्र॒तीची॑- [] 4

6.3.1.5

जाय॑न्ते प्रा॒णा वा ए॒ते यद्धि॑ष्ण्या यद॒ध्वर्युः॑ प्रत्य॒ङ् धि॑ष्ण्यानति॒सर्पे॑त्
 प्रा॒णान्थ् संक॑र्षेत् प्र॒मायु॑कः स्यान्नाभि॒र्वा ए॒षा य॒ज्ञस्य॑ यद्धो॒तोर्ध्वः॑

खलु॑ वै नाभ्यै॑ प्रा॒णोऽवा॑डपा॒नो यद॑ध्वर्युः प्रत्यङ् होता॑रम॒तिसर्पे॑दपा॒ने
प्रा॒णं द॑ध्यात् प्र॒मायु॑कः स्यान्नाध्वर्यु॑रुप गा॒येद् वाग्वी॑र्यो वा अ॑ध्वर्यु-
र्यद॑ध्वर्यु॒रुप-गा॒येदु॑द्-गा॒त्रे- [] 5

6.3.1.6

वाच॑ꣳ सं प्र यच्छे-दुप॑दासुकाऽस्य वाख् स्याद्ब्र॑ह्मवा॒दिनो॑ वदन्ति
नास॑ꣳस्थिते सोमै॑ऽध्वर्युः प्रत्यङ्ख् सदोऽती॑यादथ कथा दाक्षि॑णानि
होतु॑मेति यामो हि स तेषां कस्मा अह॑ देवा यामं वा॑यामं वाऽनु
ज्ञा॑स्यन्तीत्यु-त्तरेणाऽऽग्नी॑ध्रं परीत्य जुहोति दाक्षि॑णानि न प्रा॒णान्त्सं
कर्ष॑ति न्यन्ये धिष्णि॑या उप्यन्ते () नान्ये यान् निव॑पति तेन तान्
प्री॑णाति यान् ननिव॑पति यदनुदि॑शति तेन तान् । 6

(स्तु॑ते - वि॒न्दते - हि - वी॑यन्ते प्र॒तीची - रुद्ग्रा॑त्र - उप्यन्ते -
चतु॑र्दश च) (A1)

6.3.2.1

सुव॑र्गाय वा ए॒तानि॑ लो॒काय॑ हूयन्ते यद् वैस॑र्जनानि द्वाभ्यां
गा॒र्हप॑त्ये जुहोति द्वि॒पाद् यज॑मानः प्रतिष्ठि॑त्या आग्नी॑ध्रे

जुहोत्यन्तरिक्ष एवाऽऽक्रमत आहवनीये जुहोति सुवर्गमेवैनं लोकं
गमयति देवान् वै सुवर्गं लोकं यतो रक्षाऽस्य जिघाऽसन्ते सोमेन
राज्ञा रक्षाऽस्यपहत्याप्तुमात्मानं कृत्वा सुवर्गं लोकमायन्
रक्षसा-मनुपलाभायाऽऽतः सोमो भवत्यथ- [] 7

6.3.2.2

वैसर्जनानि जुहोति रक्षसामपहत्यै त्वं सोम तनूकृद्भ्य इत्याह
तनूकृद्ध्येष द्वेषोभ्योऽन्यकृतेभ्य इत्याहान्यकृतानि हि रक्षाऽस्युरु
यन्ताऽसि वरूथमित्याहोरु णस्कृधीति वावैतदाह जुषाणो
अप्तराज्यस्य वेत्वित्याहाप्तुमेव यजमानं कृत्वा सुवर्गं लोकं गमयति
रक्षसा-मनुपलाभायाऽऽ सोमं ददत- [] 8

6.3.2.3

आ ग्राव्ण आ वायव्यान्या द्रोणकलशमुत् पत्नीमा नयन्त्यन्वनाऽसि
प्र वर्तयन्ति यावदेवास्यास्ति तेन सह सुवर्गं लोकमेति
नयवत्यर्चाऽऽग्नीध्रे जुहोति सुवर्गस्य लोकस्याभिनीत्यै ग्राव्णो
वायव्यानि द्रोणकलशमाग्नीध्र उप वासयति वि ह्येनं तैर्गृह्यते यथ

स॒हो॒प॒वा॒स॒ये-द॒पु॒वा॒ये॒त सौ॒म्य॒र्चा प्र पा॒द॒य॒ति स्व॒यै- [] 9

6.3.2.4

-वैनं॑ दे॒व॒त॒या प्र पा॒द॒य॒त्यदि॒त्याः स॒दोऽस्य॑दि॒त्याः स॒द आ सी॒दे॒त्याह॑
य॒था॒य॒जु॒रे॒वै॒तद्-य॒ज॒मा॒नो वा ए॒तस्य॑ पु॒रा गो॒प्ता भ॑व॒त्येष॒ वो दे॒व
स॒वि॒तः सो॒म इ॒त्याह॑ स॒वि॒तृप्र॑सू॒त ए॒वैनं॑ दे॒वता॑भ्यः॒ सं प्र॑य॒च्छ॒त्येत॑त्
त्व॒ꣳ सो॒म दे॒वो दे॒वानु॑पा॒गा इ॒त्याह॑ दे॒वो ह्येष॑ सन्- [] 10

6.3.2.5

दे॒वानु॑पै॒तीद॒महं॑ म॒नु॒ष्यो म॒नु॒ष्या॑नि॒त्याह॑ म॒नु॒ष्यो(१) ह्येष॑ सन्
म॒नु॒ष्या॑नु॒पै॒ति य॒दे॒तद् य॒जुर्न॑ ब्रू॒याद॑प्र॒जा अ॒प॒शु॒र्य॒ज॒मा॒नः स्या॑त्
स॒ह प्र॒ज॒या स॒ह रा॒य॒स्पो॒षे॒णे॒त्याह॑ प्र॒ज॒यै॒व प॒शु॒भिः स॒हेमं॑
ँलो॒कमु॑पा॒वर्त॑ते न॒मो दे॒वे॒भ्य इ॒त्याह॑ न॒मस्का॒रो हि दे॒वाना॑ꣳ स्व॒धा
पि॒तृ॒भ्य इ॒त्याह॑ स्व॒धाका॒रो हि- [] 11

6.3.2.6

पि॒तृ॒णा॒मि॒द॒महं॑ नि॒र्व॒रु॒णस्य॑ पा॒शादि॒त्याह॑ व॒रु॒णपा॒शादे॒व निर्मु॑च्य॒ते
ऽग्ने॑ व्र॒त॒प॒त आ॒त्म॒नः पूर्वा॑ त॒नू॒रादे॒ये॒त्याहुः॑ को हि त॒द्वेद॑ यद्

व॒सी॒या॒न्त्स्वे॒ व॒शो॑ भू॒ते पु॒नर्वा॑ द॒दाति॒ न वे॒ति ग्रा॒वा॒णो॒ वै सोम॑स्य
रा॒ज्ञो म॒लि॒म्लु॒से॒ना य ए॒वं वि॒द्वान् ग्रा॒व्ण आ॒ग्नी॒ध्र उप॒वा॒सय॑ति नैनं
म॒लि॒म्लु॒से॒ना वि॒न्दति॑ () । 12 (अ॒र्थ - द॒दते॑ - स्व॒या - स॒न्थ -
स्व॒धा॒का॒रो हि॑ - वि॒न्दति॑) (A2)

6.3.3.1

वै॒ष्णव्य॑र्चा हु॒त्वा यू॒पम॑च्छैति वै॒ष्णवो॑ वै दे॒वत॑या यू॒पः स्व॒यैवैनं॑
दे॒वत॑या ऽच्छैत्यत्यन्या॒नगां॑ ना॒न्या-नु॒पा॒गामि॑त्याहाति ह्यन्या॒नेति॑ ना॒न्या-
नु॒पैत्य॑र्वाक्त्वा प॒रैर॑विदं प॒रोऽव॑रैरित्या॒हार्वा॑ग्येनं प॒रैर्वि॑न्दति
प॒रोऽव॑रैस्तं त्वा जु॒षे- [] 13

6.3.3.2

वै॒ष्णा॒वं दे॒वय॑ज्याया इत्या॒ह दे॒वय॑ज्यायै ह्ये॒नं जु॒षते॑ दे॒वस्त्वा॑ स॒विता
म॒ध्वा॒न॒त्ति॒व॒त्या॒ह ते॒ज॒सै॒वैन॑-म॒न॒क्त्यो॑ष॒धे त्रा॒य॒स्वैन॑ स्व॒धि॒ते मै॒न
हि॒सी॒रि॒त्या॒ह व॒ज्रो॑ वै स्व॒धि॒तिः शान्त्यै॑ स्व॒धि॒तेर्वृ॒क्षस्य॑ बि॒भ्यतः॑
प्र॒थ॒मे॒न श॑क॒ले॒न स॒ह ते॒जः॑ प॒रा प॑तति यः प्र॒थ॒मः श॑क॒लः प॒राप॑तेत्
त॒म॒प्या ह॑रे॒त् स॒ते॒ज॒स- [] 14

6.3.3.3

–मे॒वैन॒मा॒ हर॒ती॒मे॒ वै॒ लो॒का॒ यू॒पात् प्र॒यतो॑ बि॒भ्यति॑ दि॒वम॒ग्रेण॑ मा
ले॒खी॒रन्त॑रि॒क्षं म॒ध्येन॑ मा हि॒सी॒रित्या॑है॒भ्य ए॒वैनं॑ लो॒केभ्यः॑ श॒मय॑ति
व॒नस्प॑ते श॒तव॑ल्शो वि॒रोहे॑त्या॒व्रश्च॑ने जुहोति॒ तस्मा॑–दा॒व्रश्च॑नाद्–
वृ॒क्षाणां॑ भू॒याꣳस॑ उत्तिष्ठन्ति॒ सह॑स्र॒वल्शा॑ वि॒वयꣳ रु॒हेमे॑त्याहा–
ऽऽ*शि॒षमे॒वैता॑मा शास्ते॒ ऽन॑क्षसङ्गं– [] 15

6.3.3.4

वृ॒श्चेद्–यद॑क्षसङ्गं॒ वृ॒श्चेद॑ध ई॒षं य॑ज॒मान॑स्य प्र॒मायु॑कꣳ स्याद्यं
का॒मये॑ताप्रतिष्ठितः स्यादित्या॒रोहं॑ तस्मै॒ वृ॒श्चे॑देष वै व॒नस्प॑तीना–
मप्रतिष्ठितोऽप्रतिष्ठित ए॒व भ॑वति यं का॒मये॑ताप॒शुः स्या॑दित्य॒पर्णं॑ तस्मै
शु॒ष्काग्रं॑ वृ॒श्चे॑देष वै व॒नस्प॑तीना–मप॒शव्योऽप॒शुरे॒व भ॑वति यं का॒मये॑त
प॒शुमा॑न्त् स्यादिति॒ बहु॑पर्णं॒ तस्मै॒ बहु॑शा॒खं वृ॒श्चे॑देष वै– [] 16

6.3.3.5

व॒नस्प॑तीनां प॒शव्यः॑ प॒शुमा॑ने॒व भ॑वति प्र॒तिष्ठि॑तं वृ॒श्चेत्
प्र॒तिष्ठा॑का॒मस्यै॑ष वै व॒नस्प॑तीनां प्र॒तिष्ठि॑तो यः स॒मे भू॑म्यै
स्वाद्यो॑ने॒ रूढः॑ प्र॒त्ये॒व तिष्ठ॑ति यः प्र॒त्यङ्गु॑प॒नत॑स्तं वृ॒श्चेत् स॑ हि

मे॒ध॒म॒भ्यु॒प॒न॒तः॑ प॒ञ्चा॒र॒न्निं॑ तस्मै॑ वृ॒श्चे॒द्यं॑ का॒म॒ये॒तो॒पै॒न॒मु॒त्त॒रो॑ य॒ज्ञो
न॒मे॒दि॒ति॒ प॒ञ्चा॒क्ष॒रा॒ प॒ङ्क्तिः॑ पा॒ङ्क्तो॑ य॒ज्ञ उ॒पै॒न॒मु॒त्त॒रो॑ य॒ज्ञो- [] 17

6.3.3.6

न॒म॒ति॒ ष॒ड॒र॒न्निं॑ प्र॒ति॒ष्ठा॒का॒म॒स्य॑ ष॒ड्वा॑ ऋ॒त॒व॑ ऋ॒तु॒ष्वे॒व॑ प्र॒ति॒ ति॒ष्ठ॒ति॑
स॒प्ता॒र॒न्निं॑ प॒शु॒का॒म॒स्य॑ स॒प्त॒प॒दा॒ श॒क्व॒री॒ प॒श॒वः॑ श॒क्व॒री॒ प॒शू॒ने॒वा॒व॑
रु॒न्धे॒ न॒वा॒र॒न्निं॑ ते॒ज॒स्का॒म॒स्य॑ त्रि॒वृ॒ता॒ स्तो॒मे॒न॑ स॒म्मितं॑ ते॒ज॒स्त्रि॒वृ॒त्
ते॒ज॒स्व्ये॒व॑ भ॒व-त्ये॒का॒द॒शा॒र॒न्नि-मि॒न्द्रि॒य॒का॒म-स्यै॒का॒द॒शा॒क्ष॒रा
त्रि॒ष्टु॒गि॒न्द्रि॒यं॑ त्रि॒ष्टु॒गि॒न्द्रि॒या॒व्ये॒व॑ भ॒व॒ति॒ प॒ञ्च॒द॒शा॒र॒न्निं॑ भ्रा॒तृ॒व्य॒व॒तः॑
प॒ञ्च॒द॒शो॑ व॒ज्रो॑ भ्रा॒तृ॒व्या॒भि॒भू॒त्यै॑ स॒प्त॒द॒शा॒र॒न्निं॑ प्र॒जा॒का॒म॒स्य॑ स॒प्त॒द॒शः॑
प्र॒जा॒प॒तिः॑ प्र॒जा॒प॒ते॒रा॒प्त्या॑ () ए॒क॒विं॒श॒त्य॒र॒न्निं॑ प्र॒ति॒ष्ठा॒का॒म-
स्यै॒क॒विं॒शः॑ स्तो॒मा॒नां॑ प्र॒ति॒ष्ठा॒ प्र॒ति॒ष्ठि॒त्या॑ अ॒ष्टा॒श्रि॒र्भ॒व-त्य॒ष्टा॒क्ष॒रा॑ गा॒य॒त्री
ते॒जो॑ गा॒य॒त्री॒ गा॒य॒त्री॒ य॒ज्ञ॒मु॒खं॑ ते॒ज॒सै॒व॑ गा॒य॒त्रि॒या॒ य॒ज्ञ॒मु॒खे॒न॑
सं॒मितः॑ । 18 (जु॒षे - स॒ते॒ज॒स - म॒न॒क्ष॒स॒ङ्गं॑ - ब॒हु॒शा॒खं॑ वृ॒श्चे॒देष॑ वै
- य॒ज्ञ उ॒पै॒न॒मु॒त्त॒रो॑ य॒ज्ञ - आ॒प्त्या॑ - ए॒का॒न्न॒विं॒श॒तिश्च॑) (A3)

6.3.4.1

पृ॒थिव्यै॑ त्वा॒ऽन्तरि॑क्षाय॒ त्वा दि॒वे त्वे॒त्याहै॑भ्य॒ ए॒वैनं॑ लो॒केभ्यः॑
 प्रो॒क्षति॑ प॒राञ्चं॑ प्रो॒क्षति॑ प॒राडि॒व हि सु॒वर्गो॑ लो॒कः क्रू॒रमि॒व वा
 ए॒तत् क॑रोति॒ यत् ख॑नत्यपो॒ऽव न॑यति॒ शान्त्यै॑ य॒वम॑ती॒रव॑ न॒यत्यू॑र्ग्वै
 य॒वो य॑ज॒माने॑न॒ यूपः॑ सं॒मितो॑ या॒वाने॑व॒ यज॑मान-स्ता॒वती॑-मे॒वास्मि॑-
 न्नूर्जं॑ दधाति- [] 19

6.3.4.2

पि॒तृणां॑ स॒दन॑मसीति॒ बर्.हि॑रव॒ स्तृणा॑ति॒ पितृ॑दे॒वत्या॑(१)७
 ह्ये॒तद्-य॑न्नि॒खातं॑ य॒द्-बर्.हि॑र॒नव॑स्तीर्य॒ मि॒नुया॑त् पि॒तृदे॒वत्यो॑ नि॒खातः॑
 स्या॒द् बर्.हि॑र॒वस्ती॑र्य॒ मि॒नोत्य॑स्यामे॒वैनं॑ मि॒नोति॑ यू॒पश॑कल॒मवा॑स्यति
 स॒तेज॑समे॒वैनं॑ मि॒नोति॑ दे॒वस्त्वा॑ स॒विता॑ म॒ध्वाऽन॑क्त्वित्या॒ह
 ते॒जसै॑वैन॒मन॑क्ति॒ सु॒पिप्प॑ला॒भ्य-स्त्वौष॑धी॒भ्य इति॑ च॒षालं॑ प्र॒ति- [] 20

6.3.4.3

मु॒ञ्चति॑ तस्मा॒च्छीर्ष॑त॒ ओष॑धयः॒ फलं॑ गृह्णन्त्य॒नक्ति॑ ते॒जो
 वा आ॒ज्यं य॑ज॒माने॑नाग्नि॒ष्ठाऽश्रिः॑ सं॒मिता॑ यद॒ग्निष्ठा॑-म॒श्रिम॑नक्ति
 य॒ज॒मान॑मे॒व ते॒जसा॑ ऽन॒क्त्यान्त॑-म॒नक्त्या॑न्तमे॒व य॒ज॒मानं॑ ते॒जसा॑नक्ति

सर्वतः॑ परि॑ मृ॒शत्य॑परिवर्ग-मे॒वास्मिन्॑ तेजो॑ दधा॒त्युद् दिव॑
स्त॒भाना॑ऽन्तरि॒क्षं पृ॒णेत्या॑है॒षां लो॒कानां॑ वि॒धृत्यै॑ वैष्ण॒व्यर्चा- [] 21

6.3.4.4

कल्प॑यति॒ वैष्णवो॑ वै दे॒वतया॑ यू॒पः स्वयै॑वैनं॑ दे॒वतया॑ कल्प॑यति
द्वाभ्यां॑ कल्प॑यति द्वि॒पाद् यज॑मानः॒ प्रति॑ष्ठित्यै॒ यं काम॑येत तेज॒सैनं॑
दे॒वता॑भिरिन्द्रि॒येण व्य॑र्धयेय-मि॒त्यग्नि॑ष्ठां तस्या॒श्रि-मा॑हवनीया॒दित्थं॑
वे॒त्थं वा॑ऽति नाव॑येत् तेज॒सैवैनं॑ दे॒वता॑भिरिन्द्रि॒येण व्य॑र्धयति॒ यं
काम॑येत तेज॒सैनं॑ दे॒वता॑भिरिन्द्रि॒येण सम॑र्धयेयमि॒त्य- [] 22

6.3.4.5

-ग्नि॑ष्ठां तस्या॒श्रिमा॑हवनीये॒न सं मि॑नुयात् तेज॒सैवैनं॑ दे॒वता॑भिरिन्द्रि॒येण
सम॑र्धयति ब्र॒ह्मव॑निं त्वा क्ष॒त्रव॑निमित्याह यथा॒यजु॑रेवैतत् परि॑
व्य॒यत्यू॑र्वै र॒शना॑ यज॒माने॑न यू॒पः संमि॑तो यज॒मानमे॒वोर्जा॑ सम॑र्धयति
नाभि॑दघ्ने परि॑ व्य॒यति॑ नाभि॑दघ्न ए॒वास्मा॑ ऊ॒र्जं दधा॑ति
तस्मा॑न्नाभि॑दघ्न ऊ॒र्जा भु॑ञ्जते॒ यं काम॑येतोर्जे॒न- [] 23

6.3.4.6

ॐ॒व्य॒र्धये॒य-मि॒त्यूर्ध्वा॑ ॐ॒वा त॒स्यावा॑चीं ॐ॒वाऽवो॑हे॒दूर्जे॑वैनं ॐ॒व्य॒र्धय॑ति॒ यदि॑
 का॒मये॑त॒ वर्॒षुकः॑ प॒र्जन्यः॑ स्या॒दित्य॑-वा॒चीम॑वो॒हेद् वृ॑ष्टिमे॒व नि॑
 य॒च्छति॑ यदि॒ का॒मये॑ता॒ वर्॒षुकः॑ स्या॒दित्यूर्ध्वा॑मु॒दूहे॑द् वृ॑ष्टिमे॒वोद्
 य॒च्छति॑ पि॒तृणां॑ नि॒खातं॑ म॒नुष्या॑णामूर्ध्वं नि॒खाता॑दा र॒शना॑या
 ओष॑धीना॒ं र॒शना॑ वि॒श्वेषां॑- [] 24

6.3.4.7

दे॒वाना॑मूर्ध्वं॒ र॒शना॑या आ च॒षाला॑दिन्द्र॒स्य च॒षालं॑
 सा॒ध्याना॑मति॒रिक्तं॑ स वा ए॒ष स॒र्वदे॑वत्यो य॒द्वूपो॑ य॒द्वूपं॑ मि॒नोति॑ सर्वा
 ए॒व दे॒वताः॑ प्री॒णाति॑ य॒ज्ञेन॑ वै दे॒वाः सु॒वर्गं॑ लो॒कमा॑यन् तेऽम॒न्यन्त॑
 म॒नुष्या॑ नोऽन्वाभ॒विष्य॑न्तीति॒ ते यू॒पेन॑ योपयित्वा सु॒वर्गं॑ लो॒कमा॑यन्
 तमृ॑षयो यू॒पेनै॒वानु॑ प्रा॒जान॑न् तद् यू॒पस्य॑ यू॒पत्वं॑- [] 25

6.3.4.8

य॒द् यू॒पं मि॒नोति॑ सु॒वर्गस्य॑ लो॒कस्य॑ प्र॒ज्ञात्यै॑ पु॒रस्ता॑न् मि॒नोति॑
 पु॒रस्ता॑द्धि य॒ज्ञस्य॑ प्र॒ज्ञाय॑ते प्र॒ज्ञातं॑ हि तद् यदति॑पन्न आ॒हुरि॑दं
 का॒र्यमा॑सीदिति॒ सा॒ध्या वै दे॒वा य॒ज्ञम॑त्यम॒न्यन्त॑ तान् य॒ज्ञो ना॑स्पृ॒शत्

तान् यद् य॒ज्ञस्यातिरि॑क्तमासीत् तदस्पृ॑शदतिरि॑क्तं वा ए॒तद् य॒ज्ञस्य॑
यद॒ग्नाव॒ग्निं म॑थित्वा प्र॒हर॒त्यतिरि॑क्तमेत- [] 26

6.3.4.9

-द्यू॒पस्य॑ यदूर्ध्वं च॒षाला॒त् तेषां॑ तद् भा॒गधे॒यं ताने॑व तेन॒ प्रीणा॑ति
दे॒वा वै स॒स्थि॑ते सोमे प्र सु॒चोऽहर॑न् प्र यू॒पं तेऽम॑न्यन्त य॒ज्ञवेश॑सं
वा इ॒दं कु॑र्म इति ते प्र॒स्तर॑ सु॒चां निष्क्र॑यण-मप॒श्यन्त् स्वरुं॑
यू॒पस्य॑ स॒स्थि॑ते सोमे प्र प्र॒स्तर॑ ह॒रति जु॒होति॑
स्वरु॑मय॒ज्ञवेश॑साय । 27

(द॒धाति॑ - प्र॒त्यृ - चा - सम॑र्द्धये॒यमित्यू॑ - जै॒नं - वि॒श्वेषां॑ -
यू॒पत्व॑ - मतिरि॑क्तमे॒तद् - द्वि॒चत्वा॑रि॒शच्च॑) (A4)

6.3.5.1

सा॒ध्या वै दे॒वा अ॒स्मिन् लो॒क आ॒सन् ना॒न्यत् किं॑ चन॒ मिष॑त्
तेऽग्नि॑मे॒वाग्नये॑ मे॒धाया॑ ऽल॒भन्त॑ न ह्य॒न्यदा॒लंभ्य॑-मवि॒न्दन्
ततो॑ वा इ॒माः प्र॒जाः प्रा॒जाय॑न्त यद॒ग्नाव॒ग्निं म॑थित्वा प्र॒हर॒ति
प्र॒जानां॑ प्र॒जन॑नाय रु॒द्रो वा ए॒ष यद॑ग्निर्यज॒मानः॑ प॒शुर्य॑त्

प॒शु॒मा॒ल॒भ्या॒ग्निं॑ म॒न्थेद् रु॒द्राय॑ यज॒मान॑- [] 28

6.3.5.2

–म॒पि द॒ध्यात् प्र॒मायु॑कः स्या॒दथो॑ ख॒ल्वाहु॑र॒ग्निः सर्वा॑ दे॒वता॑
ह॒विरे॑तद्यत् प॒शुरि॑ति यत् प॒शुमा॒ल॒भ्या॒ग्निं म॒न्थति॑ ह॒व्यायै॑वाऽऽ*स॒न्नाय॑
सर्वा॑ दे॒वता॑ ज॒नय॑-त्यु॒पाकृ॑त्यैव म॒न्थ्य-स्त॒न्नेवाऽऽ*ल॒ब्धं
ने॒वाना॑ल॒ब्ध-म॒ग्ने-ज॒नित्र॑-म॒सीत्या॑हा॒ग्नेर्ह्ये॑त-ज्ज॒नित्रं॑ वृ॒षणौ॑ स्थ
इत्या॑ह वृ॒षणौ॑- [] 29

6.3.5.3

ह्ये॒ता-वु॒र्वश्य॑स्यायु-र॒सीत्या॑ह मिथु॒नत्वाय॑ घृ॒तेना॑क्ते वृ॒षणं॑
दधा॑थामि॒त्याह॑ वृ॒षण॑ छे॒ते दधा॑ते ये अ॒ग्निं गा॒यत्रं॑ छ॒न्दोऽनु॑
प्र जा॒यस्वे॒त्याह॑ छ॒न्दोभि॑रे॒वैनं॑ प्र ज॒नय॑त्य॒ग्नये॑ म॒थ्यमा॑ना॒यानु॑
ब्रू॒हीत्या॑ह सा॒वित्री॑मृ॒चम॒न्वाह॑ स॒वितृ॑प्र॒सूत॑ ए॒वैनं॑ म॒न्थति॑ जा॒ताया॑नु
ब्रू॒हि- [] 30

6.3.5.4

प्र॒ह्रिय॑मा॒णायानु॑ ब्रू॒हीत्या॑ह का॒ण्डेका॑ण्ड ए॒वैनं॑ क्रि॒यमा॑णे स॒मर्ध॑यति
गा॒यत्रीः सर्वा॑ अ॒न्वाह॑ गा॒यत्र॑छ॒न्दा वा अ॒ग्निः स्वे॒नैवैनं॑ छ॒न्दसा॑

स॒म॒र्ध॒य॒त्य॒ग्निः॑ पु॒रा भ॒व॒त्य॒ग्निं॑ म॒थि॒त्वा प्र॑ ह॒रति॑ तौ स॒ंभ॒व॒न्तौ॑
यज॑मा॒नम॒भि सं॑ भ॒व॒तो भ॒व॒तं नः॑ स॒म॒न॒सा॒वि॒त्याह॑ शा॒न्त्यै॑ प्र॒हृत्य॑
जुहो॑ति जा॒तायै॑वास्मा॒ अन्न॑मपि () द॒धा॒त्याज्ये॑न जुहो॒त्येत॒द्वा अ॒ग्नेः
प्रि॒यं धाम॑ यदाज्यं प्रि॒येणै॒वैनं॑ धाम्ना स॒म॒र्ध॒य॒त्यथो॑ तेज॒सा । 31

(यज॑मान – मा॒ह वृष॑णौ – जा॒ताया॑नु ब्रू॒ह्या – प्य –
ष्टा॑द॒श च) (A5)

6.3.6.1

इ॒षे त्वेति॑ ब॒र्हि॒रा द॑त्त इ॒च्छ॒त इ॒व ह्ये॒ष यो॑ यज॑त उप॒वीर॑सीत्याहोप
ह्ये॒ना॒नाक॑रोत्युपो दे॒वान् दै॒वीर्वि॑शः प्रागु॒रित्या॑ह दै॒वीर्ह्ये॒ता वि॑शः
स॒तीर्दे॒वानु॑पय॒न्ति व॒ह्नीरु॑शिज इत्या॒हर्त्वि॑जो वै व॒ह्य उ॒शिज॑-
स्तस्मा॑दे॒वमा॒ह बृ॒हस्प॑ते धा॒रया॑ वसू॒नीत्या॑- [] 32

6.3.6.2

-ह ब्र॒ह्म वै दे॒वानां॑ बृ॒हस्प॑ति ब्र॒ह्मणै॑वास्मै प॒शून्व रु॒न्धे ह॒व्या ते॑
स्वद॑न्तामि॒त्याह॑ स्वद॒यत्ये॒वैनान्॑ दे॒व त्वष्ट॑र्वसु र॒ण्वेत्या॑ह त्वष्टा॒ वै
प॒शूनां॑ मि॒थुना॑नाꣳ रू॒पकृ॑द् रू॒पमे॒व प॒शुषु॑ द॒धाति॑ रे॒वती॑

र॒म॒ध्व॒मि॒त्या॒ह॒ प॒श॒वो॒ वै रे॒वतीः॑ प॒शू॒ने॒वा॒स्मै र॒मय॑ति दे॒वस्य॑ त्वा
स॒वि॒तुः प्र॒स॒व इति॑- [] 33

6.3.6.3

र॒श॒ना॒मा द॒त्ते प्र॒सू॒त्या अ॒श्विनो॑र्बा॒हु॒भ्या-मि॒त्या॒हा॒श्विनो॑ हि
दे॒वा॒ना॒म॒ध्व॒र्यू आ॒स्तां पू॒ष्णो ह॒स्ता॒भ्या॒मि॒त्या॒ह य॒त्या ऋ॒तस्य॑ त्वा
दे॒व॒ह॒विः पा॒शे॒नाऽऽ* र॒भ इ॒त्या॒ह स॒त्यं वा ऋ॒तं स॒त्ये॒नै॒वैन॑मृ॒ते॒ना
ऽऽ*र॒भ॒ते ऽक्ष॑ण॒या परि॑ ह॒रति॑ व॒ध्यं हि प्र॒त्य॒ज्चं प्रति॑ मु॒ञ्च॑न्ति
व्या॒वृ॒त्त्यै ध॒र्षा मा॒नु॒षा॒निति॑ नि यु॒नक्ति॑ धृ॒त्या अ॒द्भ्य- [] 34

6.3.6.4

स्त्वौष॑धी॒भ्यः प्रो॒क्षा॒मी॒त्या॒हा॒द्भ्यो ह्येष॑ ओष॑धी॒भ्यः सं॒भ॒वति॑
यत् प॒शु॒रपां॑ पे॒रुर॒सी॒त्या॒हैष॑ ह्य॒पां पा॒ता यो मे॒धा॒याऽऽ* र॒भ्यते॑
स्वा॒त्तं चि॒त् स॒दे॒व ह॒व्य॒मा॒पो दे॒वीः स्व॒द॒तै॒नमि॒त्या॒ह
स्व॒द॒य॒त्ये॒वैन॑-मु॒परि॑ष्ठात् प्रो॒क्ष॒त्यु॒परि॑ष्ठादे॒वैनं॑ मे॒ध्यं करो॑ति
पा॒य॒य॒त्यन्त॑रत ए॒वैनं॑ () मे॒ध्यं करो॑त्यध॒स्ता॒दु॒पो॒क्षति॑ स॒र्वत॑
ए॒वैनं॑ मे॒ध्यं करो॑ति । 35 (व॒सू॒नीति॑ - प्र॒स॒व इत्य॑ - द॒भ्यो -

ॐ॒न्तर॒त ए॒वैनं॑ – द॒श च॑) (A6)

6.3.7.1

अ॒ग्नि॒ना वै हो॒त्रा दे॒वा अ॒सुरा॑-न॒भ्य॒भव॑-न्न॒ग्नये॑ स॒मि॒ध्यमा॑ना॒यानु॑
ब्रू॒ही॒त्याह॑ भ्रातृ॒व्याभि॑भू॒त्यै स॒प्तद॑श सा॒मि॒धेनी॑र॒न्वाह॑ स॒प्तद॑शः
प्र॒जाप॑तिः प्र॒जाप॑तेरा॒प्त्यै स॒प्तद॑शान्वाह॑ द्वा॒दश॑ मा॒साः प॒ञ्च॒र्तवः॑ स
सँ॒व॒थ्स॒रः सँ॒व॒थ्स॒रं प्र॒जा अ॒नु प्र॒जाय॑न्ते प्र॒जानां॑ प्र॒जन॑नाय
दे॒वा वै सा॒मि॒धेनी॑र॒नूच्य॑ य॒ज्ञं ना॒न्वप॑श्यन्थ् स
प्र॒जाप॑ति-स्तू॒ष्णीमा॑घार- [] 36

6.3.7.2

-मा ऽघा॒रय॑त् ततो॒ वै दे॒वा य॒ज्ञम॑न्वप॒श्यन् यत् तू॒ष्णी-मा॑घार-
मा॒घा॒रय॑ति य॒ज्ञस्या॑नु॒ख्या॒त्या अ॒सुरे॑षु वै य॒ज्ञ आ॑सीत् तं
दे॒वास्तू॒ष्णीं॑ हो॒मेना॑वृ॒ज्जत॑ यत् तू॒ष्णी-मा॑घार-मा॒घा॒रय॑ति
भ्रातृ॒व्यस्यै॑व तद् य॒ज्ञं वृ॑द्धे परि॒धी॒न्थ् सं मा॒र्षि पु॒नात्ये॑वैनान् त्रि॒स्त्रिः
सं मा॒र्षि त्र्या॑वृ॒द्धि य॒ज्ञोऽथो॑ रक्ष॒साम॑प॒हत्यै॑ द्वा॒दश॑ सं प॒द्यन्ते॑
द्वा॒दश॑- [] 37

6.3.7.3

मा॒साः सँ॒व॒थ्स॒रः सँ॒व॒थ्स॒रमे॒व प्री॒णा॒त्यथो॑ सँ॒व॒थ्स॒रमे॒वास्मा॑
उप॑ दधाति सु॒वर्ग॑स्य लो॒कस्य॑ सम॒ष्ट्यै शि॒रो वा ए॒तद् य॒ज्ञस्य॑
यदा॑घा॒रोऽग्निः॑ सर्वा॑ दे॒वता॑ यदा॑घा॒र-मा॑घा॒रय॑ति शी॒र्ष॒त ए॒व य॒ज्ञस्य॑
यज॑मानः सर्वा॑ दे॒वता॑ अव॑ रुन्धे शि॒रो वा ए॒तद् य॒ज्ञस्य॑ यदा॑घा॒र
आ॒त्मा प॒शुरा॑घा॒रमा॑घा॒र्य प॒शुञ् सम॑न॒क्त्या॒त्मन्ने॒व य॒ज्ञस्य॑- [] 38

6.3.7.4

शि॒रः प्र॑ति दधाति सं ते॑ प्रा॒णो वा॒युना॑ गच्छ॒तामि॒त्याह॑ वा॒युदे॒वत्यो॑ वै
प्रा॒णो वा॒यावे॒वास्य॑ प्रा॒णं जु॑होति सं य॒ज्ञत्रै॑र॒ङ्गानि॑ सं
य॒ज्ञप॑तिराशिषे॒त्याह॑ य॒ज्ञप॑तिमे॒वास्याऽऽ*शि॒षं ग॑मयति वि॒श्वरू॑पो
वै त्वाष्ट्र॑ उप॒रिष्ठा॑त् प॒शुम॑भ्यवमीत् तस्मा॑-दुप॒रिष्ठा॑त् प॒शोर्ना॑व द्यन्ति
यदुप॒रिष्ठा॑त् प॒शुञ् सम॑न॒क्ति मे॒ध्यमे॒वै- [] 39

6.3.7.5

-नं॑ करोत्यृ॒त्विजो॑ वृणी॒ते छन्दा॑स्ये॒व वृणी॑ते स॒प्त वृणी॑ते स॒प्त
ग्रा॒म्याः प॒शवः॑ स॒प्ताऽऽ*र॒ण्याः स॒प्त छन्दा॑स्यु॒भय॑स्या वरु॒द्ध्या

एकाद॑श प्र॒या॒जान् य॒जति॑ द॒श वै प॒शोः प्रा॒णा आ॒त्मैका॑द॒शो
यावा॑ने॒व प॒शुस्तं॑ प्र य॒जति॑ व॒पामे॒कः परि॑ शय आ॒त्मैवाऽऽ*त्मानं॑ परि॑
शये॑ वज्रो॒ वै स्व॒धिति॑र्वज्रो॒ यूप॑शक॒लो घृ॒तं ख॒लु वै () दे॒वा वज्रं॑
कृ॒त्वा सोम॑म॒घ्नन् घृ॒तेना॒क्तौ प॒शुं त्रा॑येथा॒मित्या॑ह वज्रे॒णैवैनं॑ व॒शे
कृ॒त्वाऽऽल॑भते । 40

(आ॒धारं – प॒द्यन्ते॑ द्वा॒द॒शा – ऽऽत्म॑न्ने॒व य॒ज्ञस्य॑ – मे॒ध्यमे॑व – ख॒लु
वा – अ॒ष्टाद॑श च) (A7)

6.3.8.1

पर्य॑ग्नि करोति सर्व॑हु॒तमे॒वैनं॑ करोत्य-स्क॒न्दाया॑-स्क॒न्नं हि॒ तद् यद्
धु॒तस्य॑ स्क॒न्दति॑ त्रिः पर्य॑ग्नि करोति त्र्या॒वृद्धि॑ य॒ज्ञोऽथो॑
रक्ष॑सामप॒हत्यै॑ ब्र॒ह्मवा॑दिनो वदन्त्यन्वा॒रभ्यः॑ प॒शू(३)र्नान्वा॒रभ्या(३)
इति॑ मृ॒त्यवे॑ वा ए॒ष नी॑यते यत् प॒शुस्तं॑ यदन्वा॒रभेत॑ प्रमा॒युको॑
यज॑मानः स्यादथो ख॒ल्वाहुः॑ सु॒वर्गा॒य वा ए॒ष लो॒काय॑
नी॒यते॑ यत्- [] 41

6.3.8.2

प॒शुरि॒ति य॒न्ना॒न्वा॒रभे॑त सु॒वर्गा॒ल्लो॒काद् यज॑मानो हीयेत
वपा॒श्रप॑णी॒भ्या-म॒न्वा॒रभ॑ते तन्ने॒वान्वा॒रब्धं॑ ने॒वान्वा॒रब्ध॑मुप॒ प्रेष्य॑
होत॑र्ह॒व्या दे॒वेभ्य॑ इ॒त्याहे॒षित॑ ॐ हि कर्म क्रियते रे॒वती॑र्य॒ज्ञप॑तिं
प्रि॒यधा ऽऽवि॑शते॒त्याह॑ यथा॒यजु॑रे॒वैतद॑ग्निना पु॒रस्ता॑देति रक्ष॒साम॑प॒हत्यै॑
पृथि॒व्याः संपृ॑चः पा॒हीति॑ ब॒र्हि- [] 42

6.3.8.3

-रु॒पास्य॑त्य-स्क॒न्दाया॑-स्क॒न्न ॐ हि तद् यद् ब॒र्हिषि॑ स्क॒न्दत्य॑थो
ब॒र्हिष॑दमे॒वैनं॑ करोति प॒राडा॑ वर्ततेऽध्व॒र्युः प॒शोः सं॒ज्ञप्य॑मा॒नात्
प॒शुभ्य॑ ए॒व तन्नि॑ हु॒त आ॒त्मनो॑ऽना॒व्रस्का॑य गच्छति श्रि॒यं प्र
प॒शूना॑प्नोति य ए॒वं वैद॑ प॒श्चा॒ल्लो॒का वा ए॒षा प्रा॑च्यु॒दानी॑यते यत्
प॒त्नी न॑मस्त आ॒ताने॑त्याहाऽऽ*दि॒त्यस्य॑ वै र॒श्मय॑- [] 43

6.3.8.4

आ॒ताना॑स्तेभ्य ए॒व न॑मस्करोत्यन॒र्वा प्रे॑हीत्याह भ्रातृ॒व्यो वा अ॒र्वा
भ्रातृ॒व्याप॑नु॒त्यै घृ॒तस्य॑ कु॒ल्याम॑नु॒ सह॑ प्र॒जया॑ सह
रा॒यस्पो॒षेणे॑-त्याहा ऽऽ*शि॒षमे॑वैता॒मा शा॑स्त आपो॒ दे॒वीः

शु॒द्धायु॒व इ॒त्याह॑ यथा॒यजु॒रेवै॒तत् । 44 (लो॒काय॑ नी॒यते॑ यद् -
 ब॒र्ही - र॒श्मयः॑ - स॒प्तत्रिं॑शच्च) (A8)

6.3.9.1

प॒शोर्वा आल॑ब्धस्य प्रा॒णाञ्छु॑गृच्छति वा॒क्त आ प्या॑यतां प्रा॒णस्त आ
 प्या॑यता॒मित्या॑ह प्रा॒णेभ्य॑ ए॒वास्य॑ शुच॑ श॒मय॑ति सा प्रा॒णेभ्योऽधि॑
 पृथि॒वीञ् शुक् प्र॑ वि॒शति॑ श॒महो॑भ्यामि॒ति नि न॑यत्यहो॒रात्राभ्या॑मे॒व
 पृथि॒व्यै शुच॑ श॒मय॑त्योष॒धे त्रा॑यस्वै॒नञ् स्व॑धि॒ते मै॒नञ्
 हि॑ञ्सीरि॒त्याह॑ व॒र्जो वै स्व॑धि॒तिः- [] 45

6.3.9.2

शा॒न्त्यै पा॒र्श्वत॑ आ च्छ॑यति म॒ध्यतो॑ हि म॒नुष्या॑ आ च्छ॑यन्ति
 ति॒रश्ची॑नमा च्छ॑यत्यनू॒चीन॑ञ् हि म॒नुष्या॑ आ॒च्छय॑न्ति व्या॒वृत्त्यै॑ र॒क्षसां॑
 भा॒गोऽसी॑ति स्थवि॒मतो॑ ब॒र्हि॒रत्वाऽपा॑स्यत्यस्नै॒व र॒क्षाञ् सि॑ नि॒रव॑दयत
 इ॒दम॑हञ् र॒क्षोऽध॑मं त॒मो न॑यामि योऽस्मा॑न् द्वेष्टि॒ यं च॑ व॒यं द्वि॑ष्म
 इ॒त्याह॑ द्वौ वा॒व पु॑रुषौ॒ यं चै॒व- [] 46

6.3.9.3

द्वेष्टि॑ यश्चैनं॑ द्वेष्टि॑ तावु॑भावध॑मं तमो॑ नयती॑षे त्वेति॑
व॒पामु॑त्खिदती॑च्छत॑ इव॑ ह्येष॑ यो यज॑ते यदु॑पतृ॒न्धाद्-रुद्रो॑ऽस्य
प॒शून् घा॑तुकः॑ स्याद् यन्नो॑पतृ॒न्धा-दय॑ता स्या-द॒न्ययो॑पतृ॒णत्य॒न्यया॑
न धृ॑त्यै घृ॒तेन॑ द्यावापृ॑थिवी॒ प्रो॒र्ण्वा॒था॒मित्या॑ह द्यावापृ॑थिवी॒ एव
र॒सेना॑नत्यच्छि॑न्नो- [] 47

6.3.9.4

रायः॑ सु॒वीर॑ इत्या॑ह यथा॑यजु॒रेवै॒तत् क्रूर॑मिव॒ वा ए॒तत् क॑रोति
यद् व॒पा-मु॑त्खिद-त्यु॒र्वन्त॑रि॒क्ष-म॒न्विही॑त्याह शान्त्यै॒ प्र वा
एषो॑ऽस्माल्लो॒काच्च्य॑वते॒ यः प॒शुं मृ॑त्यवे॒ नीय॑मानमन्वार॑भते
व॒पाश्र॑पणी॒ पुन॑रन्वार॑भतेऽस्मिन्ने॒व लो॒के प्र॑ति तिष्ठत्यग्नि॑ना
पु॒रस्ता॑देति॒ रक्ष॑सामप॒हत्या॑ अथो॒ देव॑ता ए॒व ह॒व्येना॑- [] 48

6.3.9.5

-न्वेति॑ नान्त॑ममङ्गा॒रम॑ति॒ हरे॑द् यदन्त॑ममङ्गा॒रम॑ति॒ हरे॑द्-दे॒वता॑ अति॑
म॒न्येत॑ वा॒यो वी॑हि॒ स्तो॒काना॑मित्या॑ह तस्मा॑द् वि॒भक्ताः॑ स्तो॒का अव॑
प॒द्यन्ते॑ऽग्रं वा॒ एत॑त् प॒शूनां॑ यद् व॒पाऽग्र॑मोष॒धीनां॑ ब॒र्हि॒रग्रे॑णैवाग्रं॑

स॒म॒र्ध॒य॒त्य॒थो॒ ओ॒ष॒धी॒ष्वे॒व॒ प॒शून्॑ प्र॒ति॒ष्ठा॒प॒य॒ति॒ स्वा॒हा॒कृ॒ती॒भ्यः॑
प्रे॒ष्ये॒त्या॒ह- [] 49

6.3.9.6

य॒ज्ञ॒स्य॑ स॒मि॒ष्ट्यै॑ प्रा॒णा॒पा॒नौ॒ वा ए॒तौ प॒शूनां॑ य॒त् पृ॒षदा॑ज्यमा॒त्मा व॒पा
पृ॒षदा॑ज्यम॒भि॒घार्य॑ व॒पाम॒भि घा॑रय॒त्या॒त्म॒न्ने॒व प॒शूनां॑ प्रा॒णा॒पा॒नौ द॒धाति॑
स्वा॒हो॒र्ध्व॒न॒भ॒सं मा॒रु॒तं ग॒च्छ॒त॒मि॒त्या॒हो॒र्ध्व॒न॒भा ह॒ स्म वै मा॒रु॒तो
दे॒वानां॑ व॒पा॒श्र॒प॒णी प्र॒ हर॑ति॒ तेनै॒वैने॒ प्र॒ हर॑ति॒ वि॒षू॒ची प्र॒ हर॑ति॒
तस्मा॑द् वि॒ष्व॒ञ्चौ॑ प्रा॒णा॒पा॒नौ । 50

(स्व॒धि॒ति - श्रै॒वा - च्छि॒न्नो - ह॒व्ये॒ने - ष्ये॒त्या॒ह -
षट्च॑त्वारि॒ंश॒च्च) (A9)

6.3.10.1

प॒शु॒मा॒ल॒भ्य॑ पु॒रो॒डा॒शं नि॒र्व॒प॒ति॒ स॒मे॒ध॒मे॒वै॒न॒मा ल॑भ॒ते व॒पया॑
प्र॒च॒र्य॑ पु॒रो॒डा॒शे॒न प्र॒ च॒र॒त्यू॒र्वे पु॒रो॒डा॒श ऊ॒र्ज॑मे॒व प॒शूनां॑
म॒ध्य॒तो द॒धा॒त्य॒थो प॒शो॒रे॒व छि॒द्र॒म॒पि द॒धा॒ति॒ पृ॒षदा॑ज्यस्यो॒प॒ह॒त्य
त्रिः॑ पृ॒च्छ॒ति शृ॒त॒ं ह॒वी(३):॑ श॒मि॒त॒रि॒ति त्रि॒ष॒त्या हि॒ दे॒वा योऽशृ॑त॒ं

शृ॒त॒मा॒ह॒ स॒ ए॒न॒सा॒ प्रा॒णा॒पा॒नौ॒ वा॒ ए॒तौ॒ प॒शू॒नां॑- [] 51

6.3.10.2

य॑त् पृ॒षदा॒ज्यं॒ प॒शोः॒ खलु॒ वा॒ आ॒ल॒ब्ध॒स्य॒ हृ॒द॒य॒मा॒त्मा॒ऽभि॒ समे॑ति
यत् पृ॒षदा॒ज्ये॒न॒ हृ॒द॒य॒-म॒भि॒घा॒र॒य॒त्या॒त्म॒न्ने॒व॒ प॒शू॒नां॑ प्रा॒णा॒पा॒नौ॒ द॒धा॒ति
प॒शु॒ना॒ वै॒ दे॒वाः॒ सु॒व॒र्गं॒ लो॒क॒मा॒य॒न् ते॑ऽम॒न्य॒न्त॒ म॒नु॒ष्या॑
नो॑ऽन्वा॒भ॒वि॒ष्य॒न्ती॒ति॒ तस्य॒ शि॒रः॒ छि॒त्वा॒ मे॒धं॒ प्रा॒क्षार॑यन्त्स
प्र॒क्षो॑ऽभ॒वत् तत् प्र॒क्ष॒स्य॒ प्र॒क्ष॒त्वं॒ य॑त् प्ल॒क्ष॒शा॒खो॒-त्त॒र॒ब॒र्हि॒-र्भ॑वति
स॒मे॒ध॒स्यै॒व- [] 52

6.3.10.3

प॒शो॒र॒व॒ द्य॑ति प॒शुं॒ वै॒ ह्यि॒मा॒ण॒ꣳ र॒क्षा॒ꣳस्य॑नु॒ स॒च॒न्ते॑ऽन्त॒रा॒ यू॒पं॑
चा॑ऽऽ*ह॒व॒नी॒यं॒ च॒ ह॒र॒ति॒ र॒क्ष॒सा॒म॒प॒ह॒त्यै॒ प॒शो॒र्वा॒ आ॒ल॒ब्ध॒स्य॒ म॒नो॑ऽप
क्रा॒म॒ति॒ म॒नो॒ता॒यै॒ ह॒वि॒षो॑ऽव॒दी॒य॒मा॒न॒स्या॒नु ब्रू॒ही॒त्या॒ह॒ म॒न॒ ए॒वा॒स्या॒व
रु॒न्ध॒ ए॒का॒द॒शा॒व॒दा॒ना॒न्य॒व॒ द्य॑ति द॒श॒ वै॒ प॒शोः॒ प्रा॒णा॒ आ॒त्मै॒का॒द॒शो॒
या॒वा॒ने॒व॒ प॒शु॒स्त॒स्या॒व- [] 53

6.3.10.4

द्व॒ति हृ॒दय॑स्या॒ग्रेऽव॑ द्य॒त्यथ॑ जि॒ह्वाया॑ अथ॒ वक्ष॑सो यद्वै हृ॒दये॑नाभि॒गच्छ॑ति
तज्जि॒ह्वाया॑ वदति यज्जि॒ह्वाया॑ वदति तदु॒रसोऽधि॑ निर्वदत्येतद्वै
प॒शोर्य॑थापूर्वं य॒स्यैव॑मवदाय यथा॒काम॑-मु॒त्तरे॑षामवदति यथा
पूर्व॑मे॒वा॒स्य प॒शोर॑वत्तं भवति मध्य॒तो गु॒दस्या॑व द्यति मध्य॒तो हि प्रा॒ण
उ॒त्तम॑स्याव द्यत्यु- [] 54

6.3.10.5

-त्त॒मो हि प्रा॒णो यदी॑तरं यदी॑तर-मु॒भय॑मे॒वाजा॑मि जाय॑मानो वै
ब्रा॒ह्मण॑स्त्रिभिर्ऋ॒णवा॑ जायते ब्रह्म॒चर्ये॑ण॒र्षिभ्यो॑ यज्ञे॒न दे॒वेभ्यः॑ प्रजया
पि॒तृभ्य॑ एष॒ वा अ॒नृ॒णो यः पु॒त्री यज्वा॑ ब्रह्म॒चारि॑वासी तद॒वदानै॑रे॒वाव
दय॑ते तद॒वदाना॑ना-मवदान॒त्वं दे॒वासु॑राः सँय॑त्ता आसन् ते दे॒वा
अ॒ग्निम॑ब्रुवन् त्वया वी॒रेणा॑सुरानभि भ॒वामे॒ति- [] 55

6.3.10.6

सोऽब्र॑वीद् वरं वृ॒णै प॒शोरु॑द्धारमु॒द्धरा॑ इति स ए॒तमु॑द्धारमु॒दहर॑त
दोः पूर्वा॑र्धस्य गु॒दं मध्य॑तः श्रो॒णिं जघ॑नार्धस्य ततो दे॒वा अ॒भवन्
परा॑ऽसुरा यत् त्र्य॒ङ्गाणां॑ समवदति भ्रातृ॒व्याभि॑भूत्यै भव॒त्यात्म॑ना

परा॑ऽस्य॒ भ्रातृ॑व्यो भवत्यक्ष॒णया॑ऽव द्यति॒ तस्मा॑दक्ष॒णया॑ प॒शवो॑ऽङ्गानि॒ प्र
हर॑न्ति॒ प्रति॑ष्ठित्यै । 56

(ए॒तौ प॑शूनाँ - स॒मे॒धस्यै॑व - तस्या॑ऽवो - त॒मस्या॑व॒ द्यती॑ - ति -
पञ्च॑चत्वारि॒ंशच्च॑) (A10)

6.3.11.1

मे॒दसा॑ स्रुचौ॒ प्रोर्णो॑ति॒ मेदो॑रूपा॒ वै प॒शवो॑ रू॒पमे॒व प॒शुषु॑ दधाति
यू॒षन्न॑व॒धाय॒ प्रोर्णो॑ति॒ रसो॒ वा ए॒ष प॑शूनां॒ यद्व॑ र॒समे॒व प॒शुषु॑ दधाति
पा॒र्श्वेन॑ वसा॒होमं॑ प्र॒यौति॑ म॒ध्यं वा॒ एत॑त् प॒शूनां॒ यत् पा॒र्श्वं र॒स ए॒ष
प॒शूनां॒ यद्व॑सा॒ यत् पा॒र्श्वेन॑ वसा॒होमं॑ प्र॒यौति॑ म॒ध्यत॑ ए॒व प॒शूनाँ॑ र॒सं
दधा॑ति॒ घ्नन्ति॑- [] 57

6.3.11.2

वा ए॒तत् प॒शुं य॑थ् सं॒ज्ञप॑न्त्यैन्द्रः॒ खलु॑ वै दे॒वत॑या प्रा॒ण
ऐ॒न्द्रोऽपान॑ ऐन्द्रः प्रा॒णो अ॒ङ्गे अ॒ङ्गे नि॑ दे॒ध्यदि॑त्याह प्रा॒णापा॒नावे॒व
प॒शुषु॑ दधाति॒ देव॑ त्वष्ट॒र्भूरि॑ ते स॒मे॒त्वित्या॑ह त्वाष्ट्रा हि
दे॒वत॑या प॒शवो॑ वि॒षुरु॑पा॒ यथ् स॒लक्ष्मा॑णो भव॒थेत्या॑ह वि॒षुरु॑पा॒ ह्येते॑

सन्तः सलक्ष्माण एतर्हि भवन्ति देवत्रा यन्त- [] 58

6.3.11.3

-मवसे सखायोऽनु त्वा माता पितरो मदन्त्वित्याहा-नुमतमेवैनं
मात्रा पित्रा सुवर्गं लोकं गमयत्यर्धर्चे वसाहोमं जुहोत्यसौ वा
अर्धर्च इयमर्धर्च इमे एव रसेनानक्ति दिशो जुहोति दिश एव
रसेनानत्यथो दिग्भ्य एवोर्जं रसमव रुन्धे प्राणापानौ वा एतौ
पशूनां यत् पृषदाज्यं वानस्पत्याः खलु- [] 59

6.3.11.4

वै देवतया पशवो यत् पृषदाज्यस्यो-पहत्याऽऽह वनस्पतयेऽनु
ब्रूहि वनस्पतये प्रेष्येति प्राणापानावेव पशुषु दधात्यन्यस्यान्यस्य
समवत्तं समवद्यति तस्मान्नानारूपाः पशवो यूष्णोप सिञ्चति रसो
वा एष पशूनां यद्वू रसमेव पशुषु दधातीडामुप ह्वयते पशवो वा
इडा पशूनेवोप ह्वयते चतुरूप ह्वयते- [] 60

6.3.11.5

चतु॑ष्पादो हि प॒शवो॑ यं का॒मये॑ता प॒शुः स्या॑दित्य॒मेद॑स्कं तस्मा॒ आ
द॒ध्यान्मे॑दोरूपा॒ वै प॒शवो॑ रू॒पेणै॑वैनं प॒शुभ्यो॑ निर्भ॒जत्य॑प॒शुरे॒व
भव॑ति यं का॒मये॑त प॒शुमान्त् स्या॑दिति मे॒दस्व॑त् तस्मा॒ आ
द॒ध्यान्मे॑दोरूपा॒ वै प॒शवो॑ रू॒पेणै॑वास्मै प॒शून॑व रुन्धे प॒शुमाने॑व
भव॑ति प्र॒जाप॑तिर्य॒ज्ञम॑सृजत स आ॒ज्यं- [] 61

6.3.11.6

पुर॑स्ताद॒सृज॑त प॒शुं म॑ध्यतः पृ॒षदा॑ज्यं पश्चात् तस्मा॒दाज्ये॑न
प्र॒याजा॑ इज्यन्ते प॒शुना॑ म॑ध्यतः पृ॒षदा॑ज्येना-नू॒याजा॑-
स्तस्मा॑दे॒तन्मि॑श्रमिव पश्चात् सृष्टु॑ ह्येका॒दशानू॒याजान् य॑जति दश॒ वै
प॒शोः प्रा॑णा आ॒त्मैका॑दशो या॒वाने॑व प॒शुस्त॑मनु यजति घ्नन्ति वा
ए॒तत् प॒शुं य॑त् सं॒ज्ञप॑यन्ति प्रा॒णापा॑नौ खलु॒ वा ए॒तौ प॒शूनां य॑त्
पृ॒षदा॑ज्यं य॑त् पृ॒षदा॑ज्येना () नू॒याजान् य॑जति प्रा॒णापा॑नावे॒व प॒शुषु॑
दधा॑ति । 62 (घ्नन्ति - यन्तं - खलु - चतु॑रुप॒ ह्वय॑त - आ॒ज्यं -
य॑त् पृ॒षदा॑ज्येन - षट् च) (A11)

Prasna Korvai with starting Padams of 1 to 11 Anuvaakams :-

(चा॒त्वा॒ला॒त् - सु॒व॒र्गा॒य॒ यद् वै॒स॒र्ज॒ना॒नि - वै॒ष्ण॒व्य॒र्चा - पृ॒थि॒व्यै -
सा॒ध्या - इ॒षे त्वे - त्य॒ग्नि॒ना - पर्य॑ग्नि - प॒शोः - प॒शु॒मा॒ल॒भ्य -
मे॒द॒सा स्रु॒चा - वे॒का॒द॒श)

Korvai with starting Padams of 1, 11, 21 Series of Panchaatis :-

(चा॒त्वा॒ला॒द् - दे॒वा॒नु॒पै॒ति - मु॒ञ्च॒ति - प्र॒हि॒य॒मा॒णाय॑ - पर्य॑ग्नि -
प॒शु॒मा॒ल॒भ्य - च॒तु॒ष्पा॒दो - द्वि॒ष॒ष्टिः)

First and Last Padam of Third Prasnam of 6th Kandam

(चा॒त्वा॒ला॒त् - प॒शु॒षु द॒धा॒ति)

॥ हरिः ओं ॥

॥ कृष्ण यजुर्वेदीय तैत्तिरीय संहितायां षष्ठकाण्डे तृतीयः प्रश्नः

समाप्तः ॥

ओं नमः परमात्मने, श्री महागणपतये नमः, श्री गुरुभ्यो नमः

हरिः ओं

6.4 षष्ठकाण्डे चतुर्थः प्रश्नः – सोममन्त्रब्राह्मणनिरूपणं

6.4.1.1

यज्ञेन॑ वै प्रजा॑पतिः प्रजा॑ असृजत॑ ता उपय॑डिभ-रेवा॑सृजत
यदु॑पयज उपय॑जति प्रजा॑ ए॒व तद् यज॑मानः सृज॑ते जघ॑नार्धादिव
द्व॒ति जघ॑नार्धाद्धि प्रजाः प्रजा॑यन्ते स्थवि॑मतोऽव द्व॒ति स्थवि॑मतो हि
प्रजाः प्रजा॑यन्ते ऽसं॑भिन्दन्न॒व द्व॒ति प्रा॑णाना-मसं॑भेदाय न
पर्या॑वर्तयति यत् पर्या॑वर्तयेदु॒दाव॑र्तः प्रजा॑ ग्राहु॒कः स्या॑त् समु॒द्रं गच्छ॑
स्वाहे॑त्याह॒ रेत- [] 1

6.4.1.2

ए॒व तद् द॑धात्यन्तरि॑क्षं गच्छ॑ स्वाहे॑त्याहाऽन्तरि॑क्षेणै॒वास्मै॑ प्रजाः
प्र॒ जन॑यत्यन्तरि॑क्षं ह्यनु॑ प्रजाः प्रजा॑यन्ते दे॒वः स॑वितारं गच्छ॑
स्वाहे॑त्याह स॒वितृ॑प्रसूत॒ ए॒वास्मै॑ प्रजाः प्र॒ जन॑यत्य-होरा॑त्रे गच्छ॑

स्वा॒हेत्या॑हा-हो॒रात्रा॑भ्या-मे॒वास्मै॑ प्र॒जाः प्र॑ ज॒नय॑त्य-हो॒रात्रे
ह्यनु॑ प्र॒जाः प्र॒जाय॑न्ते मि॒त्रावरु॑णौ गच्छ॒ स्वाहे॑- [] 2

6.4.1.3

-त्या॑ह प्र॒जास्वे॒व प्रजा॑तासु प्रा॒णापा॑नौ द॒धाति॑ सोमं गच्छ॒ स्वाहेत्या॑ह
सौ॒म्या हि॑ दे॒वतया॑ प्र॒जा य॒ज्ञं गच्छ॑ स्वा॒हेत्या॑ह प्र॒जा ए॒व य॒ज्ञियाः॑
करो॑ति छन्दा॒ऽसि गच्छ॑ स्वा॒हेत्या॑ह प॒शवो॑ वै छन्दा॒ऽसि प॒शूने॒वाव
रुन्धे॑ द्या॒वापृ॑थि॒वी गच्छ॑ स्वा॒हेत्या॑ह प्र॒जा ए॒व प्रजा॑ता
द्या॒वापृ॑थि॒वीभ्यामु॒भयतः॑ परि॑ गृह्णा॒ति नभो॑- [] 3

6.4.1.4

दि॒व्यं गच्छ॑ स्वा॒हेत्या॑ह प्र॒जाभ्य॑ ए॒व प्रजा॑ताभ्यो वृ॒ष्टिं नि॒यच्छ॑त्यग्निं
वै॒श्वान॑रं गच्छ॑ स्वा॒हेत्या॑ह प्र॒जा ए॒व प्रजा॑ता अ॒स्यां प्र॒ति ष्ठा॑पयति
प्रा॒णानां॑ वा ए॒षोऽव॑ द्यति योऽव॒द्यति॑ गु॒दस्य॑ मनो॒ मे हा॒र्दि यच्छे॑त्या॒ह
प्रा॒णाने॒व यथा॑स्थानमु॒प ह्य॑ते प॒शोर्वा॑ आल॒ब्धस्य॑ हृदय॒ऽशुगृ॑च्छति
सा॒ हृदय॑शूल- [] 4

6.4.1.5

–म॒भि॒ स॒मे॒ति॒ यत् पृ॒थि॒व्याꣳ हृ॒दय॑शूल–मु॒द्वा॒सये॑त् पृ॒थि॒वीꣳ
 शु॒चाꣳर्प॑येद् यद॒प्स्व॑पः शु॒चाꣳर्प॑येच्छु॒ष्क॑स्य चाऽऽ*र्द्र॑स्य च
 स॒न्धा॒वु॒द्वा॒सय॑त्यु॒भय॑स्य शान्त्यै॒ यं द्वि॑ष्यात् तं ध्या॒ये–च्छु॒चै॒वैन॑–
 म॒र्पय॑ति । 5

(रे॒ता – मि॒त्रा॒वरु॑णौ गच्छ॒ स्वा॒हा – न॒भो – हृ॒दय॑शूलं –
 द्वा॒त्रिꣳश॑च्च) (A1)

6.4.2.1

दे॒वा वै य॒ज्ञमा॒ग्नी॒ध्रे व्य॑भजन्त॒ ततो॑ यद॒त्य॒शिष्य॑त॒ तद॑ब्रुवन् वस॒तु नु
 न इ॒दमि॑ति॒ तद् व॑सती॒वरी॑णां वस॒ती व॑रित्वं तस्मिन् प्रा॒तर्न
 स॒मश॑क्नुवन् तद॒प्सु प्रा॑वेशयन् ता वस॒ती व॑रीर॒भ॒वन् व॑सती॒वरी॑र्गृह्णाति
 य॒ज्ञो वै व॑सती॒वरी॑र्य॒ज्ञमे॒वाऽऽ*र॑भ्य गृही॒त्वोप॑ वसति॒ यस्या॑गृहीता
 अ॒भि नि॒म्रो॒चे–द॑नार॒ब्धोऽस्य॑ य॒ज्ञः स्या॑– [] 6

6.4.2.2

द्य॒ज्ञं वि॑ च्छि॒न्द्या–ज्ज्यो॑तिष्या॒ वा गृ॑हीयाद्धि॒रण्यं वा॑ ऽव॒धाय॑
 स॒शु॒क्राणा॑मे॒व गृ॑ह्णाति॒ यो वा ब्रा॑ह्म॒णो बहु॑याजी॒ तस्य॑ कुं॒भ्यानां॑

गृ॒ह्णी॒या॒थ् स हि गृ॒ही॒त व॒स॒ती॒व॒री॒को व॒स॒ती॒व॒री॒र्गृ॒ह्णा॒ति प॒श॒वो वै
व॒स॒ती॒व॒रीः प॒शू॒ने॒वाऽऽ*र॒भ्य गृ॒ही॒त्वो॒प व॒स॒ति यद॒न्वी॒पं ति॒ष्ठन्
गृ॒ह्णी॒या॒न्निर्मा॒र्गु॒का अ॒स्मात् प॒श॒वः स्युः प्र॒ती॒पं ति॒ष्ठन् गृ॒ह्णा॒ति
प्र॒ति॒रु॒ध्यै॒वा॒स्मै प॒शून् गृ॒ह्णा॒ती॒न्द्रो- [] 7

6.4.2.3

वृ॒त्र॒म॒ह॒न्थ् सौऽ(१)पोऽ(१)भ्य॑म्रिय॒त ता॒सां य॑न्मे॒ध्यं य॑ज्ञि॒यꣳ
स॒दे॒व॒मा॒सी॒त् तद॑त्य॒मु॒च्य॒त ता॒ वह॑न्ती॒रभ॑वन् वह॑न्ती॒नां गृ॒ह्णा॒ति या ए॒व
मे॒ध्या य॑ज्ञि॒याः स॒दे॒वा आ॒प॒स्ता सा॒मे॒व गृ॒ह्णा॒ति ना॒न्त॒मा वह॑न्ती॒रती॒याद्-
यद॑न्त॒मा वह॑न्ती॒रती॒याद् य॒ज्ञ॒म॒ति म॑न्येत न स्था॒व॒राणां॑ गृ॒ह्णी॒याद्
वरु॑ण॒गृ॒ही॒ता वै स्था॒व॒रा य॒थ् स्था॒व॒राणां॑ गृ॒ह्णी॒याद्- [] 8

6.4.2.4

-वरु॑णे॒ना॒स्य य॒ज्ञं ग्रा॑हयेद् यद्वै दि॒वा भ॑वत्य॒पो रा॒त्रिः प्र वि॑शति
तस्मा॑त् ता॒म्रा आ॒पो दि॒वा द॑दृ॒श्रे य॒न्न॒क्तं भ॑वत्य॒पोऽहः॑ प्र वि॑शति
तस्मा॑च्च॒न्द्रा आ॒पो न॑क्तं द॑दृ॒श्रे छा॒या॒यै चाऽऽ*त॑प॒तश्च स॑न्धौ
गृ॒ह्णा॒त्य-हो॒रा॒त्रयो॑रे॒वा॒स्मै वर्णं॑ गृ॒ह्णा॒ति ह॒विष्म॑ती॒रि॒मा आ॒प इ॒त्याह॑

ह॒विष्कृ॑तानामे॒व गृ॑ह्णाति ह॒विष्मा॑ अस्तु- [] 9

6.4.2.5

सूर्य॑ इत्या॒ह स॑शुक्राणामे॒व गृ॑ह्णात्यनुष्टु॒भा गृ॑ह्णाति वाग्वा
अनुष्टु॒ग् वाचै॑वैनाः॒ सर्व॑या गृह्णाति चतु॑ष्पद॒यर्चा गृ॑ह्णाति त्रिः सा॑दयति
स॒प्त सं प॑द्यन्ते स॒प्तप॑दा शक्वरी प॒शवः॑ शक्वरी प॒शूने॒वाव रु॑न्धे
ऽस्मै॑ वै लो॒काय॑ गा॒र्हप॑त्य आ धी॑यतेऽमुष्मा॑ आह॒वनी॒यो यद्
गा॒र्हप॑त्य उपसा॒दये॑दस्मिन् लो॒के प॑शुमान्थ् स्याद्
यदा॑ह॒वनी॒येऽमु॑ष्मिन्- [] 10

6.4.2.6

लो॒के प॑शुमान्थ् स्यादु॒भयो॑रुप सा॒दय॑त्यु॒भयो॑रेवैनं लो॒कयोः॑
प॒शुम॑न्तं करोति स॒र्वतः॑ परि॒ हर॑ति रक्ष॒साम॑पहत्या
इन्द्रा॑ग्नियोर्भा॒गधे॑यीः स्थेत्या॒ह यथा॑यजु॒रेवै॑तदाग्नी॒ध्र उप॑ वासयत्येतद्वै
य॒ज्ञस्या॑पराजितं य॒दाग्नी॑ध्रं य॒देव॑ य॒ज्ञस्या॑पराजितं तदे॒वैना॑
उप॑ वासयति यतः खलु॒ वै य॒ज्ञस्य॑ वित॒तस्य॑ न क्रि॒यते () तद॑नु
य॒ज्ञं र॒क्षास्य॑व चरन्ति यद् वह॑न्तीनां गृह्णाति क्रि॒यमा॑णामे॒व

तद् य॒ज्ञस्य॑ श॒ये र॒क्षसा॑-मन॒न्वव॑चाराय॒ न ह्ये॑ता ई॒लय॑न्त्या
तृ॒तीयस॑वनात् परि शोरे य॒ज्ञस्य॑ संत॒त्यै । 11

(स्या - दि॒न्द्रो - गृ॒ह्णी॑या - द॒स्त्व - मु॒ष्मिन् - क्रि॒यते - षड्
वि॒ंशति॑श्च) (A2)

6.4.3.1

ब्र॒ह्मवा॑दिनो वदन्ति स त्वा अ॒ध्वर्युः॑ स्याद्यः सोममुपावहरन्त् सर्वा॑भ्यो
दे॒वता॑भ्य उपावहरेदिति हृदे त्वेत्याह मनुष्ये॑भ्य ए॒वैतेन॑ करोति
मन॑से त्वेत्याह पि॒तृभ्य॑ ए॒वैतेन॑ करोति दि॒वे त्वा सूर्या॑य त्वेत्याह
दे॒वेभ्य॑ ए॒वैतेन॑ करोत्ये॒तावती॑र्वै दे॒वता॑स्ताभ्य ए॒वैन॑ञ् सर्वा॑भ्य
उपावहरति पु॒रा वा॒चः- [] 12

6.4.3.2

प्र॒वदि॑तोः प्रा॒तरनु॑वाकमुपाकरोति याव॑त्ये॒व वाक् ताम॑व रुन्धे
ऽपोऽग्ने॑ऽभिव्याहरति य॒ज्ञो वा आपो॑ य॒ज्ञमे॒वाभि वा॒चं वि॑सृजति
सर्वा॑णि छन्दा॑स्यन्वाह प॒शवो॑ वै छन्दा॑सि प॒शूने॒वाव रुन्धे॑
गाय॑त्रिया तेज॒स्काम॑स्य परि दध्यात् त्रि॒ष्टुभै॑न्द्रि॒य काम॑स्य जगत्या

प॒शु॒का॒म॒स्या॒नु॒ष्टु॒भा॒ प्रति॒ष्ठा॒का॒म॒स्य॒ प॒ङ्क्त्या॒ य॒ज्ञ॒का॒म॒स्य॒
वि॒रा॒जा॒ऽन्न॒का॒म॒स्य॒ शृ॒णो॒त्व॒ग्निः॒ स॒मि॒धा॒ ह॒वं- [] 13

6.4.3.3

म॒ इ॒त्या॒ह॒ स॒वि॒तृ॒प्र॒सू॒त ए॒व दे॒वता॑भ्यो नि॒वे॒द्या॒पो॒ऽच्छै॒त्यप॑ इ॒ष्य
हो॒त॒रि॒त्या॒हे॒षि॒त॒ हि॒ क॒र्म क्रि॒यते॒ मै॒त्रा॒व॒रु॒णस्य॑ च॒म॒सा॒ध्व॒र्य॒वा
द्र॒वे॒त्या॒ह मि॒त्रा॒व॒रु॒णौ वा अ॒पां ने॒तारौ॑ ता॒भ्या॒मे॒वैना॑ अ॒च्छै॒ति
दे॒वी॒रा॒पो अ॒पां न॒पा॒दि॒त्या॒हा॒ऽऽ*हु॒त्यै॒वैना॑ नि॒ष्क्री॒य गृ॒ह्णा॒त्यथो॑
ह॒वि॒ष्कृ॒ताना॑-मे॒वा॒भि॒घृ॒तानां॑ गृ॒ह्णा॒ति- [] 14

6.4.3.4

का॒र्षि॒रसी॒त्या॒ह श॒म॒ल॒मे॒वा॒ऽऽ*सा॒मप॑ प्ला॒वय॑ति स॒मु॒द्रस्य॑ वो॒ऽक्षि॒त्या
उ॒न्नय॑ इ॒त्या॒ह तस्मा॑द॒द्य॒मा॒नाः पी॒य॒मा॒ना आ॒पो न क्षी॑यन्ते यो॒निर्वै॑
य॒ज्ञस्य॑ चा॒त्वा॒लं य॒ज्ञो व॑स॒ती॒वरी॑र्हो॒तृच॑म॒सं च॑ मै॒त्रा॒व॒रु॒णच॑म॒सं च॑
स॒स्पर्श॑र्य व॑स॒ती॒वरी॑र्व्या॒नय॑ति य॒ज्ञस्य॑ स॒यो॒नि॒त्वा॒याथो॑ स्वा॒दे॒वैना॑
यो॒नेः प्र॑ ज॒नय॑त्य॒ध्व॒र्यो॒ऽवे॒रपा॑(3) इ॒त्या॒हो॒ते () -म॑न॒न्न॒मु॒रु॒ते॒माः
प॒श्ये॒ति वा॒वै॒तदा॑ह॒ यद्य॑ग्नि॒ष्टो॒मो जु॑होति यद् यु॒क्थ्यः॑ प॒रि॒धौ नि॑ मा॒र्ष्टि॑

यद् यतिरा॒न्नो य॒जुर्वद॑न् प्र प॒द्यते य॒ज्ञक्र॑तूनां व्यावृ॑त्त्यै । 15 (वा॒चो –
हव॑ – म॒भिघृ॑तानां गृ॒ह्णात्यु॑ – त – प॒ञ्चवि॑ंशतिश्च) (A3)

6.4.4.1

दे॒वस्य॑ त्वा स॒वितुः॑ प्र॒सव॑ इति॒ ग्रावा॑णमा द॒त्ते प्र॑सू॒त्या अ॒श्विनौ॑ –
र्बा॒हुभ्या॑मित्याहा॒श्विनौ॑ हि दे॒वाना॑मध्व॒र्यू आ॑स्तां पू॒ष्णो ह॑स्ताभ्या॒मित्या॑ह
यत्यै॑ प॒शवो॑ वै सोमो॑ व्या॒न उ॒पांशु॑ स॒वनो॑ यदु॒पांशु॑ स॒वनम॑भि
मिमी॑ते व्या॒नमे॒व प॒शुषु॑ द॒धाती॑न्द्राय॒ त्वेन्द्रा॑य॒ त्वेति॑ मिमी॒त इन्द्रा॑य हि
सोम॑ आ॒ह्रिय॑ते प॒ञ्च कृ॒त्वो य॒जुषा॑ मिमी॒ते – [] 16

6.4.4.2

प॒ञ्चाक्ष॑रा प॒ङ्क्तिः॑ पा॒ङ्क्तो य॒ज्ञो य॒ज्ञमे॒वाव॑ रुन्धे प॒ञ्च कृ॒त्वस्तू॑ष्णीं द॒श
सं प॒द्यन्ते॑ द॒शाक्ष॑रा वि॒राडन्नं॑ वि॒राड् वि॒राजै॑वान्नाद्य॒मव॑ रुन्धे श्वा॒न्नाः
स्थ वृ॒त्रतु॑र इत्या॒हैष॑ वा अ॒पां सोम॑पीथो य एवं वे॒द
ना॒फ्स्वार्ति॑मा॒च्छति॑ य॒त्ते सोम॑ दि॒वि ज्योति॑रित्या॒हैभ्य॑ ए॒वैनं॑ – [] 17

6.4.4.3

लो॒केभ्यः॑ सं भ॒रति॑ सोमो॑ वै रा॒जा दि॒शोऽभ्य॑ध्याय॒त् स दि॒शोऽनु॑
प्रा॒विश॑त् प्रा॒गपा॑गुद॒गध॑रागित्या॒ह दिग्भ्य॑ ए॒वैनं॑ सं भ॒रत्य॑थो दि॒श

ए॒वास्मा॒ अव॒ रु॒न्धे ऽम्ब॒ नि ष्व॒रेत्या॒ह॒ कामु॒का ए॒न॒ स्त्रि॒यो भव॑न्ति
य ए॒वं वे॒द यत् ते॑ सो॒मादा॑भ्यं॒ नाम॒ जागृ॑वीत्या- [] 18

6.4.4.4

-है॒ष वै सोम॑स्य सोम॒पीथो॑ य ए॒वं वे॒द न सौ॒म्यामा॒र्तिमा॑च्छति
घ्न॑न्ति वा ए॒तत् सोमं॑ यद॒भिषु॑ण्वन्त्य॒ शून॑प गृह्णाति॒ त्राय॑त
ए॒वैनं॑ प्रा॒णा वा अ॒श्वः प॒शवः॑ सोमो॒ ऽशून्॑ पुनरपि॒ सृज॑ति
प्रा॒णाने॒व प॒शुषु॑ दधाति॒ द्वौ॒द्वौ॒ सृज॑ति॒ तस्मा॑द् द्वौ॒द्वौ प्रा॒णाः । 19
(य॒जुषा॑ मिमीत - ए॒नं - जागृ॑वीति - चतु॑श्चत्वारि॒शच्च॑) (A4)

6.4.5.1

प्रा॒णो वा ए॒ष यदु॑पा॒शु र्यदु॑पा॒श्वग्रा॑ ग्रहा॒ गृह्य॑न्ते प्रा॒णमे॒वानु॑ प्र
य॑न्त्यरु॒णो ह स्मा॒ ऽऽ*हौ॑पवेशिः प्रा॒तः स॒वन ए॒वाहं॑ य॒ज्ञं स॒
स्था॑पयामि तेन॒ ततः॑ स॒ स्थि॑तेन च॒रामी॑त्यष्टौ कृ॒त्वोऽग्रे॑-ऽभिषु॑णो-
त्य॒ष्टाक्ष॑रा गाय॒त्री गाय॑त्रं प्रा॒तः स॒वनं॑ प्रा॒तः स॒वनमे॒व तेना॑
ऽऽ*प्नो॑त्येकादश कृ॒त्वो द्वि॒तीय॑-मेकाद॒शाक्ष॑रा त्रि॒ष्टुप् त्रै॒ष्टुभं॑
मा॒ध्यंदि॑न- [] 20

6.4.5.2

स॒वनं॑ मा॒ध्यन्दि॑नमे॒व स॒वनं॑ तेना॒ऽऽ*प्नो॑ति द्वा॒दश॑ कृ॒त्वस्तृ॑तीयं
 द्वा॒दशाक्ष॑रा जगती॒ जाग॑तं तृ॒तीयस॑वनं तृ॒तीयस॑वनमे॒व तेना॒ऽऽ*प्नो॑त्येता॒ ह वा॒व स य॒ज्ञस्य॑ स॒ऽस्थि॑तिमुवाचा
 स्क॒न्दाया॑स्क॒न्न ह॒ तद्-यद्-य॒ज्ञस्य॑ स॒ऽस्थि॑तस्य स्क॒न्दत्यथो॑
 ख॒ल्वाहु॑र्गाय॒त्री वा॒व प्रा॑तः स॒वने॑ नाति॒वाद इ॒त्यन॑ति॒वादु॒क ए॒नं
 भ्रातृ॑व्यो भवति॒ य ए॒वं वे॒द तस्मा॑दष्टावष्टौ- [] 21

6.4.5.3

कृ॒त्वोऽभि॑षु॒त्यं ब्र॑ह्मवा॒दिनो॑ वदन्ति पवि॒त्रव॑न्तोऽन्ये ग्र॒हा गृ॑ह्यन्ते
 किं॑पवि॒त्र उपा॑ऽशु॒रिति॑ वाक्पवि॒त्र इति॑ ब्रूयाद्-वा॒चस्प॑तये पवस्व
 वाजि॑न्नित्याह वा॒चैवैनं॑ पवयति वृ॒ष्णो अ॑ऽशु॒भ्यामि॑त्याह वृ॒ष्णो
 ह्येता॑व॒ऽशू यौ सोम॑स्य ग॒भस्ति॑पू॒त इत्या॑ह ग॒भस्ति॑ना ह्ये॒नं पव॑यति
 दे॒वो दे॒वानां॑ पवि॒त्रम॑सीत्याह दे॒वो ह्ये॑ष- [] 22

6.4.5.4

सन् दे॒वानां॑ पवि॒त्रं ये॑षां भा॒गोऽसि॑ तेभ्यस्त्वेत्याह येषा॑ ह्ये॒ष
 भा॒गस्तेभ्य॑ ए॒नं गृ॑ह्णाति स्वां कृ॒तोऽसी॑त्याह प्रा॒णमे॒व स्व॑मकृत

मधु॑मती॒र्न इ॒षस्कृ॑धीत्याह॒ सर्व॑मे॒वास्मा॑ इ॒दꣳ स्व॑दयति॒ विश्वे॑भ्य-
स्त्वेन्द्रि॑येभ्यो॒ दिव्ये॑भ्यः॒ पार्थि॑वेभ्य॒ इत्या॑हो॒भयै॑ष्वेव॒ देव॑मनु॒ष्येषु॑
प्रा॒णान् द॑धाति॒ मन॑स्त्वा- [] 23

6.4.5.5

ऽष्टि॑वत्याह॒ मन॑ ए॒वाश्नु॑त उ॒र्वन्त॑रिक्ष-मन्वि॒हीत्या॑हा-न्तरिक्षदे॒वत्यो॑
हि प्रा॒णः स्वा॑हा॒ त्वा सु॑भवः॒ सूर्या॑येत्याह॒ प्राणा॑ वै स्व॒भव॑सो
दे॒वास्ते॑ष्वेव॒ परोक्षं॑ जुहोति॒ देवे॑भ्यस्त्वा मरीचि॒पेभ्य॑ इत्याहा
ऽऽ*दि॒त्यस्य॑ वै रश्म॑यो दे॒वा मरी॑चिपास्तेषां॒ तद् भा॒गधे॑यं॒ ताने॑व तेन॒
प्री॑णाति॒ यदि॑ का॒मये॑त॒ वर्ःषु॑कः॒ पर्जन्यः॑- [] 24

6.4.5.6

स्या॑दिति॒ नीचा॑ हस्ते॒न नि॑ मृ॒ज्याद्-वृष्टि॑मेव॒ नि य॑च्छति॒ यदि॑
का॒मये॑तावर्ःषु॒कः स्या॑दित्यु॒त्ताने॑न॒ नि मृ॒ज्याद्-वृष्टि॑मेवोद्-यच्छति॒
यद्य॑भिचरे॒दमुं॑ जह्यथ॒ त्वा हो॑ष्यामीति॒ ब्रूया॑दाहु॒तिमे॑वैनं॒ प्रेप्स॑न्
हन्ति॒ यदि॑ दू॒रे स्या॑दा तमि॒तोस्ति॑ष्ठेत् प्रा॒णमे॒वास्या॑नु॒गत्य॑ हन्ति॒
यद्य॑भिचरे॒दमुष्य॑- [] 25

6.4.5.7

त्वा प्रा॒णे सा॒दया॒मीति॑ सा॒दये॒दस॒न्नो वै प्रा॒णः प्रा॒णमे॒वास्य॑ सा॒दयति॑
 षड्भि॒र॒शुभिः॑ पव॒यति॑ षड् वा ऋ॒तव॑ ऋ॒तुभि॒रेवैनं॑ पव॒यति॑
 त्रिः पव॒यति॑ त्रय॑ इमे लो॒का ए॒भिरे॒वैनं॑ लो॒कैः पव॒यति॑ ब्र॒ह्मवा॒दिनो॑
 वद॒न्ति कस्मा॑त् स॒त्यात् त्रयः॑ प॒शूना॑ ह॒स्तादा॒ना इति॑ यत् त्रि॒रुपा॑
 शु॒ हस्ते॑न वि॒गृह्णा॑ति तस्मा॒त् त्रयः॑ प॒शूना॑ ह॒स्तादा॒नाः पुरु॑षो
 () ह॒स्ती म॒र्कटः॑ । 26 (मा॒ध्यंदि॑न – म॒ष्टाव॑ष्टा – वे॒ष – मन॑स्त्वा
 – प॒र्जन्यो॑ – ऽमु॒ष्य – पुरु॑षो – द्वे च॑) (A5)

6.4.6.1

दे॒वा वै यद् यज्ञे॑ऽकुर्व॒त तद॑सु॒रा अकुर्व॑त ते दे॒वा उ॒पा॒शौ य॒ज्ञं
 स॒स्थाप्य॑मप॒श्यन् तमु॒पा॒शौ स॒मस्था॑पयन् तेऽसु॒रा वज्र॑मु॒द्यत्य॑
 दे॒वान॑भ्यायन्त ते दे॒वा बि॒भ्यत॑ इन्द्र॒मुपा॑धावन् तानिन्द्रोऽन्तर्या॒मेणा॑न्तर॒धत्त॑
 तदन्तर्या॒मस्या॑न्तर्या॒मत्वं यद॑न्तर्या॒मो गृह्य॑ते भ्रातृ॒व्याने॒व तद्
 यज॑मानोऽन्तर्ध॒त्ते ऽन्त॑स्ते – [] 27

6.4.6.2

द॒धामि॑ द्या॒वापृ॑थि॒वी अ॒न्तरु॑-र्व॒न्तरि॑क्ष-मि॒त्याहै॑भिरे॒व लो॒कैर्य॑ज॒मानो॑
 भ्रातृ॑व्या॒नन्त॑र्ध॒त्ते ते दे॒वा अ॒मन्य॑न्तेन्द्रो॒ वा इ॒दम॑भू॒द्यद् वय॑ꣳ स्म इति॑
 तेऽब्रु॑वन् म॒घव॑न्ननु॒ न आ भ॑जेति॒ सजो॑षा दे॒वैर॒वरैः परै॑श्चेत्य॒ब्रवी॑द्ये
 चै॒व दे॒वाः परे॑ ये चा॒वरे॑ ता॒नुभ॑या- [] 28

6.4.6.3

न॒न्वाभ॑जथ् सजो॑षा दे॒वैर॒वरैः परै॑श्चेत्या॒ह ये चै॒व दे॒वाः परे॑ ये
 चा॒वरे॑ ता॒नुभ॑या-न॒न्वाभ॑ज-त्यन्त॑र्या॒मे म॒घव॑न् मा॒दय॑स्वेत्या॒ह य॒ज्ञादे॒व
 यज॑मानं॒ नान्तरै॑त्यु॒पयाम॑-गृ॒हीतो॑ ऽसीत्या॒हापा॑नस्य धृ॒त्यै
 यदु॒भाव॑पवि॒त्रौ गृ॒ह्येया॑तां प्रा॒णम॑पा॒नोऽनु॑ न्यृच्छेत् प्र॒मायु॑कः
 स्यात् प॒वित्र॑वानन्त॑र्या॒मो गृ॒ह्यते॑- [] 29

6.4.6.4

प्रा॒णापा॑नयो-र्वि॒धृत्यै॑ प्रा॒णापा॑नौ वा ए॒तौ यदु॑पाꣳश्चन्त॑र्या॒मौ व्या॑न
 उ॒पाꣳशु॑ स॒वनो॒ यं का॑मये॒त प्र॒मायु॑कः स्या॒दित्य॑सꣳ स्पृष्टौ॒ तस्य॑
 सा॒दये॑द्-व्या॒नेनै॒वास्य॑ प्रा॒णापा॑नौ वि च्छि॑नन्ति॒ ताज॑क् प्र मी॒यते॑ यं
 का॑मये॒त सर्व॑मायु॒रिया॑दिति॒ सꣳ स्पृष्टौ॒ तस्य॑ सा॒दये॑द्-व्या॒नेनै॒वास्य॑

प्राणापानौ सं तनोति सर्वमायुरेति । 30

(त - उभयान् - गृह्यते - चतुश्चत्वारिंशच्च) (A6)

6.4.7.1

वाग्वा एषा यदैन्द्रवायवो यदैन्द्रवायवाग्रा ग्रहा गृह्यन्ते वाचमेवानु प्र
यन्ति वायुं देवा अब्रुवन्थ सोमं राजानं हनामेति सोऽब्रवीद् वरं
वृणै मदग्रा एव वो ग्रहा गृह्यान्ता इति तस्मादैन्द्रवायवाग्रा ग्रहा
गृह्यन्ते तमघ्नन्थ सोऽपूयत् तं देवा नोपाधृष्णुवन् ते वायुमब्रुवन्निमं
नः स्वदये- [] 31

6.4.7.2

-ति सोऽब्रवीद् वरं वृणै मद्देवत्यान्येव वः पात्राण्युच्यान्ता इति
तस्मान्नानादेवत्यानि सन्ति वायव्यान्युच्यन्ते तमैभ्यो वायुरेवास्वदयत्
तस्माद्यत् पूयति तत् प्रवाते वि षजन्ति वायुर्हि तस्य पवयिता
स्वदयिता तस्य विग्रहणं नाविन्दन्थ सादितिरब्रवीद् वरं वृणा अथ
मया वि गृहीध्वं मद्देवत्या एव वः सोमाः - [] 32

6.4.7.3

स॒न्ना अस॑-न्नि॒त्युप॑याम॒गृही॑तोऽसी-त्या॒हा-दि॑तिदे॒वत्या॑स्तेन
यानि॑ हि दा॒रुम॑याणि पा॒त्राण्य॑स्यै तानि॑ यो॒नेः सं॑भू॒तानि॑ यानि॑ मृ॒न्मया॑नि
सा॒क्षात् ता॒न्यस्यै॑ तस्मा॑दे॒वमा॒ह वा॒ग्वै परा॑च्य-व्या॒कृता॑ऽवदत् ते दे॒वा
इन्द्र॑मब्रुवन्नि॒मां नो॒ वाचं॑ व्या॒कुर्वि॑ति सोऽब्र॑वीद् वरं॑ वृ॒णै मह्यं॑ चै॒वैष
वा॒यवे॑ च स॒ह () गृ॑ह्याता इति॑ तस्मा॑दैन्द्रवा॒यवः स॒ह गृ॑ह्यते तामिन्द्रो॑
मध्य॑तोऽव॒क्रम्य॑ व्या॒करो॑त् तस्मा॑दियं॑ व्या॒कृता॑ वा॒गुद्य॑ते तस्मा॑त्
सकृ॑दिन्द्राय॑ मध्य॑तो गृह्यते॑ द्वि॒र्वाय॑वे द्वौ हि स वरा॑ववृणीत । 33

(स्व॒दय - सोमाः॑ - स॒हा - षा॒वि॒शति॑श्च) (A7)

6.4.8.1

मि॒त्रं दे॒वा अब्रु॑वन्थ् सोम॑ꣳ राजा॑नꣳ हना॑मेति सोऽब्र॑वीन्नाहꣳ
सर्व॑स्य वा अ॒हं मि॒त्रम॑स्मीति॑ तमब्रु॑वन् हना॑मैवेति सोऽब्र॑वीद् वरं॑
वृ॒णै प॑यसै॒व मे सोम॑ꣳ श्री॒णन्नि॑ति॒ तस्मान्-मै॒त्रावरु॑णं प॑यसा
श्री॑णन्ति॒ तस्मा॑त् प॒शवो॑ऽपा॒क्रामन्॑ मि॒त्रः सन् कू॒रम॑क॒रिति॑ कू॒रमि॑व
खलु॑ वा ए॒षः - [] 34

6.4.8.2

करोति॑ यः सोमे॑न यज॑ते तस्मा॑त् प॒शवोऽप॑ क्राम॑न्ति यन्मै॑त्रावरु॑णं
पय॑सा श्री॑णाति प॒शुभिरे॑व तन्मि॒त्रं सम॑र्धयति प॒शुभिर्यज॑मानं
पु॒रा खलु॑ वावै॑वं मि॒त्रोऽवे॑दप मत् क्रू॒रं चक्रु॑षः प॒शवः क्रमि॑ष्यन्तीति॒
तस्मा॑दे॒वमवृ॑णीत वरु॑णं दे॒वा अब्रु॑वन् त्वयाऽ॒शुभु॑वा सोमं॒
राजा॑नं ह॒नामे॑ति सोऽब्रु॑वीद् वरं॑ वृ॒णै मह्यं॑ चै- [] 35

6.4.8.3

वैष॑ मि॒त्राय॑ च सह॑ गृ॒ह्याता॑ इति॒ तस्मा॑न्मै॒त्रावरु॑णः सह॑ गृ॒ह्यते॑
तस्मा॑द् राजा॑ राजा॑नम॒शुभु॑वा घ्न॑न्ति वैश्ये॑न वैश्यं॒ शू॒द्रेण॑
शू॒द्रं न वा॑ इ॒दं दि॒वा न नक्त॑मासीदव्यावृ॑त्तं ते दे॒वा
मि॒त्रावरु॑णावब्रु॑वन्नि॒दं नो॒ वि॒वास॑यतमिति॒ ताव॑ब्रू॒तां वरं॑ वृ॒णाव॑हा एकं॑
ए॒वाऽऽव॑त् पूर्॒वो ग्र॑हो गृ॒ह्याता॑ इति॒ तस्मा॑दैन्द्र॒वाय॑वः ()
पूर्॒वो मै॒त्रावरु॑णाद्-गृ॒ह्यते॑ प्रा॒णापा॑नौ ह्येतौ॑ यदु॒पाश्व॑-श्चन्तर्या॑मौ
मि॒त्रोऽह॑रजनयद्-वरु॑णो रा॒त्रिं ततो॑ वा इ॒दं व्यौ॑च्छद्यन्-मै॒त्रावरु॑णो
गृ॒ह्यते॑ व्यु॒ष्ट्यै । 36 (एष॑ - श्वै॑ - द्रवा॒यवो॑ - द्वावि॑शतिश्च) (A8)

6.4.9.1

य॒ज्ञस्य॑ शिरो॑ऽच्छिद्य॑त ते दे॒वा अ॒श्विना॑वब्रुवन् भिष॒जौ वै स्थ॑ इ॒दं
 य॒ज्ञस्य॑ शिरः॑ प्रति॑ धत्तमि॒ति ताव॑ब्रूतां वरं॑ वृ॒णाव॑है ग्र॒ह ए॒व
 ना॒वन्नापि॑ गृह्य॒तामि॒ति ताभ्या॑-मे॒तमा॑श्विन-म॒गृह्णन्॑ ततो॑ वै तौ
 य॒ज्ञस्य॑ शिरः॑ प्रत्य॒धत्तां य॒दाश्विनो॑ गृह्य॒ते य॒ज्ञस्य॑
 निष्कृ॑त्यै तौ दे॒वा अब्रु॑वन्न॒पूतौ॑ वा इ॒मौ म॑नुष्यच॒रौ- [] 37

6.4.9.2

भिष॒जावि॒ति तस्मा॑द् ब्राह्म॒णेन॑ भेष॒जं न का॒र्यम॑पू॒तो ह्ये॑(१)षो ऽमे॒ध्यो
 यो भिष॑क्तौ ब॒हिष्य॑व॒माने॑न प॒वयि॑त्वा ताभ्या॑-मे॒तमा॑श्विन-म॒गृह्णन्॑
 तस्मा॑द् ब॒हिष्य॑व॒माने॑ स्तु॒त आ॒श्विनो॑ गृह्य॒ते तस्मा॑दे॒वं वि॒दुषा॑
 ब॒हिष्य॑व॒मान॑ उ॒पस॑द्यः प॒वित्रं॑ वै ब॒हिष्य॑व॒मान॑ आ॒त्मान॑मे॒व प॑वय॒ते
 तयो॑ऽस्त्रे॒धा भैष॑ज्यं वि॒ न्य॑दधु॒रग्नौ॑ तृ॒तीयम॑प्सु तृ॒तीयं॑ ब्राह्म॒णे तृ॒तीयं॑
 तस्मा॑दु॒दपा॑त्र- [] 38

6.4.9.3

-मु॒पनि॑धाय ब्राह्म॒णं दक्षि॑णतो निषाद्य भेष॒जं कुर्या॑द् याव॒देव
 भेष॑जं तेन करोति स॒मर्धु॑कमस्य कृतं भवति ब्रह्म॒वादि॑नो वदन्ति

कस्मा॑त् स॒त्यादे॑कपा॒त्रा द्वि॑दे॒वत्या॑ गृ॒ह्यन्ते॑ द्वि॒पात्रा॑ हू॒यन्त॑ इति॒
यदे॑कपा॒त्रा गृ॒ह्यन्ते॑ तस्मा॑दे॒कोऽन्तर॑तः प्रा॒णो द्वि॑पा॒त्रा हू॒यन्ते॑
तस्मा॑द् द्वौ॒ द्वौ ब॒हिष्ठा॑त् प्रा॒णाः प्रा॒णा वा ए॒ते यद् द्वि॑दे॒वत्याः॑
प॒शव॑ इ॒डा य॒दिडां॑ पूर्वा॑ द्वि॒देव॑त्येभ्य॑ उ॒पह्व॑येत- [] 39

6.4.9.4

प॒शुभिः॑ प्रा॒णान॑न्तर्द॒धीत॑ प्र॒मायु॑कः स्याद् द्वि॒देव॑त्यान्
भक्ष॑यित्वे॒डामु॑प ह्व॒यते॑ प्रा॒णाने॒वाऽऽत्म॑न् धि॒त्वा प॒शूनु॑प ह्व॒यते॑
वा॒ग्वा ऐ॒न्द्रवा॑यवश्चक्षु॑-मै॒त्रावरु॑णः श्रो॒त्रमा॑श्विनः पु॒रस्ता॑दै॒न्द्रवा॑यवं
भक्ष॑यति॒ तस्मा॑त् पु॒रस्ता॑द् वा॒चा व॑दति पु॒रस्ता॑न्मै॒त्रावरु॑णं तस्मा॑त्
पु॒रस्ता॑च्चक्षु॒षा प॑श्यति स॒र्वतः॑ परि॒हार॑माश्विनं तस्मा॑त् स॒र्वतः॑ श्रो॒त्रेण॑
शृ॒णोति॑ प्रा॒णा वा ए॒ते यद् द्वि॑दे॒वत्या॑- [] 40

6.4.9.5

अ॒रि॒क्तानि॑ पा॒त्राणि॑ सा॒दय॑ति तस्मा॑द॒रि॒क्ता अ॑न्तर॒तः प्रा॒णा य॑तः ख॒लु
वै य॒ज्ञस्य॑ वि॒तत॑स्य न क्रि॒यते॑ तद॒नु य॒ज्ञञ् र॒क्षाञ् स्य॑व च॒रन्ति॑
यद॒रि॒क्तानि॑ पा॒त्राणि॑ सा॒दय॑ति क्रि॒यमा॑णमे॒व तद् य॒ज्ञस्य॑ श॒ये र॒क्षसा॑

–मन॑न्व॒वचा॑राय॒ दक्षि॑णस्य॒ हवि॑र्धान॒स्योत्तर॑स्यां॒ वर्त॑न्या॒ साद॑यति
वाच्ये॑व वाचं॑ दधा॒त्या तृ॑तीयस॒वना॑त् परि॑ शेरे॒ यज्ञ॑स्य सन्त॑त्यै । 41

(मनु॑ष्य॒चरा॑ – वुद॑पात्र – मु॒पहृ॑र्यत – द्वि॒देव॑त्याः –

षट्च॑त्वारि॒ंशच्च॑) (A9)

6.4.10.1

बृह॑स्पति॒र्देवानां॑ पु॒रोहि॑त आसी॒-च्छण्डा॑मर्का॒-वसु॑राणां॒ ब्रह्म॑ण् वन्तो
दे॒वा आ॒सन् ब्रह्म॑ण् वन्तोऽसु॑रास्ते(1) ऽन्योऽन्यं॑ नाश॑क्नुव॒-न्नभि॑भवितुं
ते दे॒वाः शण्डा॑मर्का॒-वुपा॑मन्त्रयन्त॒ ता व॑ब्रूतां॒ वरं॑ वृ॒णाव॑है॒ ग्रहा॑वेव
ना॒वत्रा॑पि गृ॒ह्येता॑मिति॒ ताभ्या॑मेतौ शु॒क्राम॑न्थिना॒-वगृ॑ह्णन् ततो॑ दे॒वा
अ॒भवन्॑ पराऽसु॑रा॒ यस्यै॑वं वि॒दुषः॑ शु॒क्राम॑न्थिनौ गृ॒ह्येते॑ भव॒त्यात्म॑ना
परा॑- [] 42

6.4.10.2

ऽस्य॑ भ्रातृ॒व्यो भ॑वति॒ तौ दे॒वा अ॒पनु॑द्याऽऽत्म॑न॒ इन्द्रा॑याजुह॒वु-र॑पनु॒त्तौ
शण्डा॑मर्को॒ सहा॑मुनेति॒ ब्रूया॑द्यं द्वि॒ष्याद्य॑मेव॒ द्वेष्टि॑ तेनै॒नौ सहा॑प॒ नुद॑ते
स प्र॑थमः॒ संकृ॑ति-वि॒श्वक॑र्मेत्ये॒वैना॑-वा॒त्मन॑ इन्द्रा॑या-जुह॒वुरिन्द्रो॑

ह्येतानि रूपाणि करिक्रदचरदसौ वा आदित्यः शुक्रश्चन्द्रमा
मन्थ्यपि-गृह्य प्राञ्चौ नि- [] 43

6.4.10.3

-ष्क्रामत-स्तस्मात् प्राञ्चौ यन्तौ न पश्यन्ति प्रत्यञ्चावावृत्य
जुहुतस्तस्मात् प्रत्यञ्चौ यन्तौ पश्यन्ति चक्षुषी वा एते यज्ञस्य
यच्छुक्रामन्थिनौ नासिकोत्तरवेदिरभितः परिक्रम्य जुहुतस्तस्मादभितो
नासिकां चक्षुषी तस्मान्नासिकया चक्षुषी विधृते सर्वतः परि
क्रामतो रक्षसामपहत्यै देवा वै याः प्राचीराहुतीरजुहवुर्ये
पुरस्तादसुरा आसन् ताऽस्ताभिः प्रा- [] 44

6.4.10.4

-णुदन्त याः प्रतीचीर्ये पश्चादसुरा आसन् ताऽस्ताभिरपानुदन्त
प्राचीरन्या आहुतयो हूयन्ते प्रत्यञ्चौ शुक्रामन्थिनौ पश्चाच्चैव
पुरस्ताच्च यजमानो भ्रातृव्यान् प्र णुदते तस्मात् पराचीः प्रजाः
प्र वीयन्ते प्रतीचीर्जायन्ते शुक्रामन्थिनौ वा अनु प्रजाः प्र जायन्ते
ऽत्नीश्चाद्याश्च सुवीराः प्रजाः प्रजनयन् परीहि शुक्रः

शुक्रशोचिषा- [] 45

6.4.10.5

सुप्रजाः प्रजाः प्रजनयन् परीहि मन्थी मन्थिशोचिषेत्याहैता वै
 सुवीरा या अत्त्रीरेताः सुप्रजा या आद्या य एवं वेदान्यस्य प्रजा
 जायते नाऽऽद्या प्रजापतेरक्ष्यश्चयत् तत् पराऽऽपतत् तद् विकङ्कतं
 प्राविशत् तद् विकङ्कते नारमत तद् यवं प्राविशत् तद् यवेऽरमत तद्
 यवस्य- [] 46

6.4.10.6

यवत्वं यद् वैकङ्कतं मन्थिपात्रं भवति सक्तुभिः श्रीणाति प्रजापतेरेव
 तच्चक्षुः सं भरति ब्रह्मवादिनो वदन्ति कस्मात् सत्यान्मन्थिपात्रं
 सदो नाश्नुत इत्यार्तपात्रं हीति ब्रूयाद्-यदश्नुवीतान्धोऽध्वर्युः
 स्यादार्तिमाच्छेत् तस्मान्नाश्नुते । 47

(आत्मना परा - नि - अ - शुक्रशोचिषा - यवस्य -
 सप्तत्रिंशच्च) (A10)

6.4.11.1

दे॒वा वै॒ यद् य॒ज्ञेऽकु॑र्व॒त तद॑सुरा अकुर्व॒त ते दे॒वा आ॑ग्र॒यणा॒ग्रान्
 ग्र॒हान॑पश्यन् तान॒गृह्ण॑त॒ ततो॑ वै तेऽग्रं॒ पर्या॑यन् यस्यै॒वं वि॒दुष
 आ॒ग्र॒यणा॒ग्रा ग्र॒हा गृ॒ह्यन्तेऽग्र॑मे॒व स॒मा॒ना॒नां पर्ये॑ति रु॒ग्णव॑त्यर्चा
 भ्रातृ॑व्यवतो गृ॒ह्णीयाद्-भ्रातृ॑व्यस्यै॒व रु॒क्त्वाग्रं॑ स॒मा॒ना॒नां पर्ये॑ति ये
 दे॒वा दि॒व्येका॑द॒श स्थे॑त्याहै- [] 48

6.4.11.2

-ता॒वती॑र्वै दे॒वता॑स्ताभ्य॒ ए॒वैनं॑ सर्वा॑भ्यो गृ॒ह्णात्ये॒ष ते
 योनि॑र्विश्वे॑भ्यस्त्वा दे॒वेभ्य॑ इत्याह॒ वैश्व॑दे॒वो ह्ये॒ष दे॒वत॑या वा॒ग्वै
 दे॒वेभ्यो-ऽपा॑क्रामद्-य॒ज्ञाया॑तिष्ठ॒माना॑ ते दे॒वा वा॒च्यप॑क्रान्तायां तू॒ष्णीं
 ग्र॒हान॑गृह्ण॒त सा॒मन्य॑त॒ वाग॑न्तर्य॒न्ति वै मे॒ति साऽऽग्र॑यणं प्र॒त्याग॑च्छत्
 तदा॑ग्र॒यण॑स्याऽऽग्र॒यण॑त्वं- [] 49

6.4.11.3

तस्मा॑दाग्र॒यणे॑ वा॒ग्वि सृ॑ज्यते॒ यत् तू॒ष्णीं पूर्वे॑ ग्र॒हा गृ॒ह्यन्ते॑ यथा
 थ्सा॑रीयति॒ म आ॒ख इ॒यति॑ नाप॒ राथ॑स्या-मीत्यु॒पाव॑सृजत्ये॒वमे॒व
 तद॑ध्व॒र्युरा॑ग्र॒यणं॑ गृ॒हीत्वा॑ य॒ज्ञमा॑रभ्य॒ वाचं॑ वि सृ॑जते॒ त्रिर्हि॑

करोत्युद्गा॒तृ-ने॒व तद् वृ॒णीते॑ प्र॒जाप॑तिर्वा ए॒ष यदा॑ग्रय॒णो
यदा॑ग्रय॒णं गृ॒हीत्वा हिं॑ करोति॑ प्र॒जाप॑तिरव- [] 50

6.4.11.4

तत् प्र॒जा अ॒भि जि॒घ्रति॑ तस्मा॒द् व॒थ्सं॑ जा॒तं गौ॒रभि॑ जि॒घ्रत्या॒त्मा वा
ए॒ष य॒ज्ञस्य॑ यदा॑ग्रय॒णः स॒वने॑स॒वनेऽभि॑ गृ॒ह्णात्या॒त्मन्ने॒व य॒ज्ञः
सं त॒नोत्यु॑परि॒ष्ठादा॑ न॒यति॑ रे॒त ए॒व तद् द॑धात्य॒धस्ता॑दुप॒ गृ॒ह्णाति॑
प्र॒ जन॑यत्ये॒व तद्ब्र॑ह्म॒वादि॑नो॒ वद॑न्ति॒ कस्मा॑त् स॒त्याद्-गा॑यत्री क॒निष्ठा
छ॒न्दसा॑ स॒ती सर्वा॑णि स॒वनानि॑ व॒हती॒त्ये ()-ष॑ वै गा॒यत्रि॒यै
व॒थ्सो यदा॑ग्रय॒णस्त॑मे॒व तद॑भि॒निव॑र्त॒ सर्वा॑णि स॒वनानि॑ व॒हति॑
तस्मा॒द् व॒थ्सम॑पाकृ॒तं गौ॒रभि॑ नि॒ वर्त॑ते । 51

(आहाऽऽ - ग्र॒यण॑त्वं - प्र॒जाप॑तिरे॒वे - ति॑ - वि॒शति॑श्च) (A11)

Prasna Korvai with starting Padams of 1 to 11 Anuvaakams :-

(य॒ज्ञेन॑ ता॒ उप॑य॒ङ्भि - दे॒वा वै य॒ज्ञमा॑ग्नी॒ध्रे - ब्र॑ह्म॒वादि॑नः स॒ त्वे -
दे॒वस्य॑ ग्रा॒वाणं॑ - प्रा॒णो वा॑ उ॒पाश्च॑ग्रा - दे॒वा वा॑ उ॒पाश्च॑शो - वा॒ग्वै
- मि॒त्रं - य॒ज्ञस्य॑ - बृ॒हस्प॑ति - दे॒वा वा॑ आ॒ग्रय॑णा॒ग्रा - ने॒काद॑श)

Korvai with starting Padams of 1, 11, 21 Series of Panchaatis :-

(य॒ज्ञेन॑ – लो॒के प॒शु॒मा॒न्त् स्या॒त् – स॒व॒नं॑ मा॒ध्य॒न्दि॒नं – वा॒ग्वा –
अ॒रि॒क्ता॒नि – तत् प्र॒जा – ए॒क॒प॒ञ्चा॒शत्)

First and Last Padam of Fourth Prasnam of 6th Kandam

(य॒ज्ञेन॑ – नि॒ वर्त॑ते)

॥ हरिः॑ ओं ॥

॥ कृष्ण यजुर्वेदीय तैत्तिरीय संहितायां षष्ठकाण्डे चतुर्थः प्रश्नः

समाप्तः ॥

ओं नमः परमात्मने, श्री महागणपतये नमः, श्री गुरुभ्यो नमः

हरिः ओं

6.5 षष्ठकाण्डे पञ्चमः प्रश्नः – सोममन्त्रब्राह्मणनिरूपणं

6.5.1.1

इन्द्रो॑ वृ॒त्राय॑ वज्रमु॒दय॑च्छत् स वृ॒त्रो वज्रा॑दु॒द्यता॑दबिभे॒त् सोऽब्र॑वीन्मा
मे प्र॒ हार॑स्ति वा इ॒दं मयि॑ वी॒र्यं॑ तत् ते प्र॒ दास्या॑मीति॒ तस्मा॑ उ॒क्थ्यं॑
प्राय॑च्छत् तस्मै॑ द्वितीयमु॒दय॑च्छत् सोऽब्र॑वीन्मा मे प्र॒ हार॑स्ति वा इ॒दं
मयि॑ वी॒र्यं॑ तत् ते प्र॒ दास्या॑मीति- [] 1

6.5.1.2

तस्मा॑ उ॒क्थ्यमे॒व प्राय॑च्छत् तस्मै॑ तृतीयमु॒दय॑च्छत् तं वि॒ष्णुर॑न्वतिष्ठत
जही॑ति सोऽब्र॑वीन्मा मे प्र॒ हार॑स्ति वा इ॒दं मयि॑ वी॒र्यं॑ तत् ते प्र॒
दास्या॑मीति॒ तस्मा॑ उ॒क्थ्यमे॒व प्राय॑च्छत् तं निर्मा॑यं भू॒तम॑हन् य॒ज्ञो हि
तस्य॑ मा॒याऽऽसी॑द्-यदु॒क्थ्यो गृ॒ह्यत॑ इन्द्रि॒यमे॒व- [] 2

6.5.1.3

तद् वी॒र्यं॑ य॒जमा॑नो भ्रातृ॒व्यस्य॑ वृ॒ङ्क्ष इन्द्रा॑य त्वा बृ॒हद्-व॑ते वय॒स्वत
इत्या॑हेन्द्रा॒य हि स॑ तं प्राय॑च्छत् तस्मै॑ त्वा वि॒ष्णावे॑ त्वेत्या॒ह यदे॒व

विष्णु॑रन्व॒तिष्ठ॑त ज॒हीति॑ तस्मा॒द्-विष्णु॑मन्वा॒भज॑ति त्रि॒र्निर्गृ॑ह्णाति
 त्रि॒र्हि स तं तस्मै॑ प्राय॒च्छ॒देष॑ ते यो॒निः पुन॑र्ह॒विर॒सीत्या॑ह
 पुनः॑ पुन- [] 3

6.5.1.4

-ह्य॒स्मा-त्रि॒र्गृह्णा॑ति चक्षु॒र्वा ए॒तद्-य॒ज्ञस्य॑ यदु॒क्थ्य॑-स्तस्मा॒दुक्थ्य॑
 हु॒तः सो॒मा अ॒न्वाय॑न्ति तस्मा॒दात्मा॑ चक्षु॒रन्वे॑ति तस्मा॒देकं॑ य॒न्तं
 ब॒हवोऽनु॑ यन्ति तस्मा॒देको॑ ब॒हूनां॑ भ॒द्रो भ॑वति तस्मा॒देको॑ ब॒ह्वीर्जा॑या
 वि॒न्दते॑ यदि का॒मये॑ता-ध्व॒र्यु-रा॒त्मानं॑ य॒ज्ञ य॒शसे॑ना-र्प॒येय॑-
 मि॒त्यन्तरा॑ऽह॒वनी॑यं च ह॒विर्धा॑नं च तिष्ठ॒न्नव॑ नये- [] 4

6.5.1.5

दा॒त्मान॑मे॒व य॒ज्ञय॒शसे॑ना॒र्पय॑ति यदि का॒मये॑त य॒जमा॑नं
 य॒ज्ञ य॒शसे॑ना॒र्पये॑य-मि॒त्यन्तरा॑ स॒दोह॑वि॒र्धाने॑ तिष्ठ॒न्नव॑
 नये॒द्-य॒जमा॑नमे॒व य॒ज्ञय॒शसे॑ना॒र्पय॑ति यदि का॒मये॑त स॒दस्या॑न्
 य॒ज्ञ य॒शसे॑ना॒र्पये॑यमि॒ति स॒द आ॒लभ्या॑व नये॒थ् स॒दस्या॑ने॒व
 य॒ज्ञय॒शसे॑ना॒र्पय॑ति । 5

(इती॑ – द्रिय॑मेव – पुनः॑ पुन – नयेत् – त्रयस्त्रि॑ञ्शच्च) (A1)

6.5.2.1

आयु॑र्वा ए॒तद्-य॒ज्ञस्य॑ यद् ध्रु॒व उत्त॑मो ग॒र्हाणां॑ गृह्य॑ते तस्मा॑दायुः
प्रा॒णाना॑मुत्त॑मं मूर्धा॑नं दि॒वो अ॒रतिं॑ पृथि॒व्या इत्या॑ह मूर्धा॑नमे॒वैनं॑
समा॑नानां करो॑ति वैश्वा॒नर॑मृताय॑ जा॒तम॑ग्निमित्या॑ह वैश्वा॒नरं॑ हि
दे॒वत॑याऽऽयु॑रुभय॑तो वैश्वा॒नरो॑ गृह्य॑ते तस्मा॑दुभय॑तः प्रा॒णा अध॑स्ता-
च्चो॒परि॑ष्टा-च्चा॒र्धिनो॑ऽन्ये ग॒र्हा गृह्य॑न्तेऽर्धी॑ ध्रु॒वस्त॑स्मा- [] 6

6.5.2.2

-द॒र्ध्यवा॑ङ् प्रा॒णोऽन्ये॑षां प्रा॒णाना॑मु॒पोप्ते॑ऽन्ये ग॒र्हाः सा॒द्यन्ते॑ऽनु॒पोप्ते॑
ध्रु॒वस्त॑स्मा-द॒स्थना॑न्याः प्र॒जाः प्र॒ति॒तिष्ठ॑न्ति मा॒सेना॑न्या अ॒सुरा॑ वा
उत्त॑रतः पृथि॒वीं पर्या॑चि॒क्रीर्ष॑न् तां दे॒वा ध्रु॒वेणा॑दृ॒हन् तद् ध्रु॒वस्य॑
ध्रु॒वत्वं य॑द् ध्रु॒व उत्त॑रतः सा॒द्यते॑ धृ॒त्या आयु॑र्वा ए॒तद्-य॒ज्ञस्य॑
यद् ध्रु॒व आ॒त्मा हो॒ता यद्धो॑तृच॒मसे॑ ध्रु॒व-म॒वन॑य॒त्यात्म॑न्ने॒व
य॒ज्ञस्या॑- [] 7

6.5.2.3

–यु॒र्दधा॑ति पु॒रस्ता॑दु॒क्थस्या॑वनी॒य इत्या॑हुः पु॒रस्ता॑द्द॒ध्यायु॑षो भु॒ङ्क्ते
म॒ध्यतो॑ऽवनी॒य इत्या॑हुर्म॒ध्यमे॑न ह्यायु॑षो भु॒ङ्क्ते उत्तरार्धे॑ऽवनी॒य
इत्या॑हुरु॒त्तमे॑न ह्यायु॑षो भु॒ङ्क्ते वैश्व॑दे॒व्यामृ॑चि श॒स्यमा॑नायाम॒व न॑यति
वैश्व॑दे॒व्यो वै प्र॒जाः प्र॒जास्वे॒वाऽऽ*यु॒र्दधा॑ति । 8

(ध्रु॒वस्तस्मा॑ – दे॒व य॒ज्ञस्यै॑ – का॒न्न च॑त्वा॒रि॒ंशच्च॑) (A2)

6.5.3.1

य॒ज्ञेन॑ वै दे॒वाः सु॒वर्गं॑ लो॒कमा॑यन् तेऽम॒न्यन्त॑ मनु॒ष्या
नोऽन्वा॑भविष्यन्तीति ते सँव॑त्सरेण योपयित्वा सु॒वर्गं॑ लो॒कमा॑यन्
तमृ॑षय ऋतु॒ग्रहै॑रेवानु प्राजा॑नन् यदृ॒तुग॒हा गृ॑ह्यन्ते सु॒वर्गस्य॑ लो॒कस्य॑
प्र॒जात्यै॑ द्वाद॒श गृ॑ह्यन्ते द्वाद॒श मा॑साः सँव॑त्सरः सँव॑त्सरस्य प्र॒जात्यै॑
सह॑ प्रथ॒मौ गृ॑ह्येते स॒होत्त॑मौ तस्मा॑द् द्वौद्वा॒वृत्तौ॑ उ॒भयो॑र्मुख–मृ॒तुपा॑त्रं
भव॑ति को– [] 9

6.5.3.2

हि तद्–वे॒द यत॑ ऋतू॒नां मुख॑मृ॒तुना॑ प्रे॒ष्येति॑ षट् कृ॒त्व आ॒ह
षड्वा॑ ऋ॒तव॑ ऋतू॒नेव॑ प्री॒णात्यृ॑तुभि॒रिति॑ च॒तुश्च॑तु॒ष्पद॑ ए॒व प॒शून्

प्रीणाति द्विः पुनर्ऋतुनाऽऽह द्विपद एव प्रीणात्यृतुना प्रेष्येति
षट् कृत्व आहर्तुभिरिति चतुस्तस्मा-च्चतुष्पादः पशव
ऋतूनुप जीवन्ति द्विः- [] 10

6.5.3.3

पुनर्ऋतुनाऽऽह तस्माद्-द्विपादश्चतुष्पदः पशूनुप जीवन्त्यृतुना
प्रेष्येति षट् कृत्व आहर्तुभिरिति चतुर्द्विः पुनर्ऋतुनाऽऽहा
ऽऽक्रमणमेव तथ् सेतुं यजमानः कुरुते सुवर्गस्य लोकस्य समष्ट्यै
नान्योऽन्यमनु प्रपद्येत यदन्योऽन्यमनु प्रपद्येतर्तुर्ऋतुमनु प्रपद्येतर्तवो
मोहकाः स्युः- [] 11

6.5.3.4

प्रसिद्धमेवा-ध्वर्युर्दक्षिणेन प्रपद्यते प्रसिद्धं प्रतिप्रस्थातोत्तरेण
तस्मादादित्यः षण्मासो दक्षिणेनैति षडुत्तरेणो-पयामगृहीतोऽसि स
सर्पोऽस्य हस्पत्याय त्वेत्याहास्ति त्रयोदशो मास इत्याहुस्तमेव तत्
प्रीणाति । 12

(को - जीवन्ति द्विः - स्यु - श्वतुस्त्रिंशच्च) (A3)

6.5.4.1

सुवर्गाय॑ वा ए॒ते लो॒काय॑ गृह्यन्ते॒ यद॑तु॒ग्रहा॑ ज्योति॑रिन्द्रा॒ग्नी
यदै॑न्द्रा॒ग्नमृ॑तुपा॒त्रेण॑ गृह्णाति॒ ज्योति॑रेवा॒स्मा उप॑रि॒ष्टाद्-द॑धाति
सुवर्ग॑स्य लो॒कस्यानु॑ख्यात्या ओजो॒भृतौ॑ वा ए॒तौ दे॒वानां॑ य॒दिन्द्रा॒ग्नी
यदै॑न्द्रा॒ग्नो गृ॑ह्यत ओज॑ ए॒वाव रु॒न्धे वैश्व॑देव॒ऽशुक्र॑पा॒त्रेण॑
गृह्णाति॒ वैश्व॑दे॒व्यो वै प्र॒जा अ॒सावा॑दि॒त्यः शुक्रो॑ यद्-वैश्व॑देव॒ऽ
शुक्र॑पा॒त्रेण॑ गृह्णाति॒ तस्मा॑द॒सावा॑दि॒त्यः- [] 13

6.5.4.2

सर्वाः॑ प्र॒जाः प्र॒त्यङ्मु॑देति॒ तस्मा॑त् सर्व॑ ए॒व म॑न्यते मां प्र॒त्युद॑गादि॒ति
वैश्व॑देव॒ऽशुक्र॑पा॒त्रेण॑ गृह्णाति॒ वैश्व॑दे॒व्यो वै प्र॒जास्तेजः॑ शुक्रो॑ यद्-
वैश्व॑देव॒ऽशुक्र॑पा॒त्रेण॑ गृह्णाति॒ प्र॒जास्वे॒व तेजो॑ दधाति । 14

(तस्मा॑द॒सावा॑दि॒त्य - स्त्रि॒ऽश॒च्च) (A4)

6.5.5.1

इन्द्रो॑ मरु॒द्भिः साँ॑वि॒द्येन॑ मा॒ध्यन्दि॑ने स॒वने॑ वृ॒त्रम॑हन् यन्मा॒ध्यन्दि॑ने
स॒वने॑ मरु॒त्वती॑या गृह्यन्ते॒ वार्त्र॑घ्ना ए॒व ते य॑ज॒मान॑स्य गृह्यन्ते॒ तस्य॑
वृ॒त्रं ज॒घ्नुष॑ ऋ॒तवो॑ऽमु॒ह्यन्त्स॑ ऋ॒तुपा॒त्रेण॑ मरु॒त्वती॑यान॒गृह्णात्॑ ततो॒ वै

स ऋ॒तून् प्रा॒जाना॒द्-य॒दृतु॒पात्रे॑ण मरु॒त्वती॑या गृ॒ह्यन्त॑ ऋ॒तूनां॑ प्र॒ज्ञात्यै॑
वज्रं॑ ँ॒वा ए॒तं य॑ज॒मानो॑ भ्रातृ॒व्याय॑ प्र॒ हर॑ति यन्मरु॒त्वती॑या उदे॒व
प्र॒थमे॑न- [] 15

6.5.5.2

यच्छ॑ति प्र॒ हर॑ति द्वि॒तीये॑न स्तृ॒णुते॑ तृ॒तीये॑नाऽऽ*यु॒धं ँ॒वा ए॒तद्-
यज॑मानः स॒ ऽ स्कु॑रुते यन्मरु॒त्वती॑या ध॒नुरे॑व प्र॒थमो॑ ज्या द्वि॒तीय
इषु॑स्तृ॒तीयः॑ प्र॒त्येव॑ प्र॒थमे॑न ध॒त्ते वि॑सृ॒जति॑ द्वि॒तीये॑न वि॒ध्यति॑
तृ॒तीये॑नेन्द्रो॑ वृ॒त्रं ह॑त्वा परां॑ परा॒वत॑-मगच्छ॒-दपा॑राध॒मिति॑ म॒न्यमा॑नः
स हरि॑तोऽभव॒त् स ए॒तान् मरु॒त्वती॑या-ना॒त्मस्पर्॑णा-नप॒श्यत्
तान॑गृह्णीत- [] 16

6.5.5.3

प्रा॒णमे॒व प्र॒थमे॑ना-स्पर्॒णुता॑पानं द्वि॒तीये॑नाऽऽत्मा॑नं तृ॒तीये॑नाऽऽत्म॑स्पर्॒णा
वा ए॒ते यज॑मानस्य गृ॒ह्यन्ते॑ यन्मरु॒त्वती॑याः प्रा॒णमे॒व प्र॒थमे॑न
स्पर्॒णुते॑ऽपानं द्वि॒तीये॑नाऽऽ*त्मा॑नं तृ॒तीये॑नेन्द्रो॑ वृ॒त्रम॑हन् तं दे॒वा अ॑ब्रुवन्
म॒हान् वा अ॒यम॑भू॒द्यो वृ॒त्रम॑वधी॒दिति॑ तन्महे॒न्द्रस्य॑ महे॒न्द्रत्व॑ ँ॒ स ए॒तं

मा॒हेन्द्र॑-मु॒द्धार॑-मु॒दहर॑त वृ॒त्रं ह॒त्वाऽन्या॑सु दे॒वता॑स्व () धि
यन्मा॒हेन्द्रो॑ गृ॒ह्यत॑ उ॒द्धार॑मेव तं य॒जमान॑ उ॒द्धर॑तेऽन्या॑सु प्र॒जास्व॑धि
शुक्र॑पा॒त्रेण॑ गृ॒ह्णाति॑ यज॒मान॑दे॒वत्यो॑ वै मा॒हेन्द्र॑स्तेजः शु॒क्रो
यन्मा॒हेन्द्रो॑ शु॒क्रपा॒त्रेण॑ गृ॒ह्णाति॑ यज॒मान॑ ए॒व तेजो॑ दधाति । 17

(प्र॒थमे॑ना - गृ॒ह्णीत॑ - दे॒वता॑स्व - षा॒विः॑ शतिश्च) (A5)

6.5.6.1

अदि॑तिः पु॒त्रका॑मा सा॒ध्येभ्यो॑ दे॒वेभ्यो॑ ब्र॒ह्मौदन॑मपचत् तस्या
उ॒च्छे॑षणमददुस्तत् प्रा॒श्नाथ् सा॒ रेतो॑ऽधत्त तस्यै च॒त्वार॑ आ॒दित्या॑
अजा॑यन्त सा द्वि॒तीयम॑पचथ् साऽम॒न्यतो॑च्छे॒षणान्म॑ इ॒मेऽज॑त
यदग्रे॑ प्रा॒शिष्या॑मीतो मे वसी॒याऽसो॑ जनिष्यन्त इति साऽग्रे॑ प्रा॒श्नात्
सा रेतो॑ऽधत्त तस्यै व्यृ॒द्धमा॑ण्डमजायत साऽऽदि॒त्येभ्य॑ ए॒व- [] 18

6.5.6.2

तृ॒तीयम॑पचद्-भो॒गाय॑ म इ॒दं श्रान्त॑मस्त्विति तेऽब्रु॒वन् वरं॑ वृ॒णाम॑है
योऽतो॑ जा॒याता॑ अ॒स्माकं॑ स ए॒कोऽसद्यो॑ऽस्य प्र॒जायामृ॑ध्याता
अ॒स्माकं॑ भो॒गाय॑ भवा॒दिति॑ ततो॑ वि॒वस्वाना॑दित्योऽजायत तस्य वा

इ॒यं प्र॒जा यन्म॒नुष्या॑स्तास्वेक॑ ए॒वर्धो॑ यो यज॒ते स दे॒वानां॑ भो॒गाय॑
भव॒ति दे॒वा वै य॒ज्ञा- [] 19

6.5.6.3

-दू॒द्र-म॒न्तरा॑यन्त् स आ॒दित्या॑नन्वाक्र॒मत॑ ते द्वि॒देव॑त्यान् प्राप॑द्यन्त
तान् न प्र॒ति प्राय॑च्छन् तस्मा॒दपि॑ व॒ध्यं प्र॒पन्नं॑ न प्र॒ति प्रय॑च्छन्ति
तस्मा॑द् द्वि॒देव॑त्येभ्य आ॒दित्यो॑ निर्गृ॒ह्यते॑ यदु॒च्छेष॑णा-दजा॑यन्त
तस्मा॑दु॒च्छेष॑णाद्-गृ॒ह्यते॑ ति॒सृभिर्. ऋ॒ग्भिर्गृ॑ह्णाति मा॒ता पि॒ता
पु॒त्रस्त॑देव तन्मि॒थुन॑मु॒ल्बं गर्भो॑ ज॒रायु॑ तदे॒व तन्- [] 20

6.5.6.4

-मि॒थुनं॑ प॒शवो॑ वा ए॒ते यदा॑दित्य ऊ॒र्गधि॑ द॒ध्ना म॑ध्यतः
श्री॑णा॒त्यूर्ज॑मे॒व प॒शूनां॑ म॒ध्यतो॑ द॒धाति॑ शृ॒तात॑ङ्क्येन मे॒ध्यत्वा॑य
तस्मा॑दामा प॒क्वं दु॒हे प॒शवो॑ वा ए॒ते यदा॑दित्यः परि॒श्रित्य॑ गृ॒ह्णाति॑
प्रति॑रु॒ध्यैवा॑स्मै प॒शून् गृ॑ह्णाति प॒शवो॑ वा ए॒ते यदा॑दित्य ए॒ष रु॒द्रो
यद॑ग्निः परि॒श्रित्य॑ गृ॒ह्णाति॑ रु॒द्रादे॒व प॒शून्त॑र्दधा- [] 21

6.5.6.5

–त्येष वै वि॒वस्वानादि॒त्यो यदु॒पाꣳ शु॒सव॑नः स ए॒तमे॒व सो॒मपी॒थं
 परि॒ शय॑ आ तृ॒तीयस॑वनाद्–वि॒वस्व॑ आदि॒त्यैष॑ ते सो॒मपी॒थ इत्या॑ह
 वि॒वस्व॑न्तमे॒वाऽऽ*दि॒त्यꣳ सो॒मपी॒थेन॑ सम॒र्धय॑ति या दि॒व्या वृ॒ष्टिस्त॑या
 त्वा श्री॑णामीति वृ॒ष्टिका॑मस्य श्री॑णीयाद्–वृ॒ष्टिमे॒वाव रु॑न्धे यदि ता॒जक्
 प्र॒स्कन्दे॑द्–वर्षु॑कः पर्जन्यः स्याद्यदि चिरमवर्षु॑को न ()
 सा॒दय॑त्यसन्नाद्धि प्र॒जाः प्र॒जाय॑न्ते नानु वषट् करोति यदनुवषट्कुर्याद्
 –रु॒द्रं प्र॒जा अ॒न्वव॑सृजेन्न हु॒त्वान्वै॑क्षेत यदन्वीक्षेत चक्षु॑रस्य
 प्र॒मायु॑कꣳ स्यात् तस्मान्नान्वीक्ष्यः । 22

(ए॒व – य॒ज्ञा – ज्ज॒रायु॑ तदे॒व तद॑ – न्तर्द॑धाति – न –
 स॒प्तवि॑ꣳशतिश्च) (A6)

6.5.7.1

अन्त॑र्यामपात्रेण सा॒वित्र॑मा॒ग्रय॑णाद्–गृ॒ह्णाति॑ प्र॒जाप॑तिर्वा एष
 यदा॒ग्रय॑णः प्र॒जानां॑ प्र॒जन॑नाय न सा॒दय॑त्यसन्नाद्धि प्र॒जाः प्र॒जाय॑न्ते
 नानु वषट् करोति यदनुवषट्कुर्याद्–रु॒द्रं प्र॒जा अ॒न्वव॑सृजे॒देष॑ वै

गा॒य॒त्रो दे॒वानां॑ य॒थ् स॒वितै॑ष गा॒य॒त्रियै॑ लो॒के गृ॒ह्यते॑ यदा॒ग्र॒य॒णो
यद॒न्तर्या॑मपा॒त्रेण॑ सा॒वि॒त्रमा॒ग्र॒य॒णाद्-गृ॒ह्णाति॑ स्वा॒दे॒वैनं॑ यो॒नेर्नि॒र्गृ॒ह्णाति॑
वि॒श्वे- [] 23

6.5.7.2

दे॒वास्तृ॒तीय॑ स॒वनं॑ नोद॒यच्छन्॑ ते स॒वि॒तारं॑ प्रा॒तः स॒वन॒भा॒गं
स॒न्तं तृ॒तीय॑स॒वन॒म॒भि पर्य॑ण॒यन् ततो॑ वै ते तृ॒तीय॑ स॒वन॒मुद॒यच्छन्॑
यत् तृ॒तीय॑स॒वने॑ सा॒वि॒त्रो गृ॒ह्यते॑ तृ॒तीय॑स्य स॒वन॒स्योद्य॑त्यै
स॒वि॒तृपा॒त्रेण॑ वै॒श्वदे॒वं क॒लशा॑द्-गृ॒ह्णाति॑ वै॒श्वदे॒व्यो वै प्र॒जा वै॒श्वदे॒वः
क॒लशः॑ स॒वि॒ता प्र॒स॒वाना॑मी॒शो य॒थ् स॒वि॒तृपा॒त्रेण॑ वै॒श्वदे॒वं क॒लशा॑द्-
गृ॒ह्णाति॑ स॒वि॒तृप्र॒सूत॑ ए॒वास्मै॑ प्र॒जाः प्र- [] 24

6.5.7.3

ज॒नय॑ति सो॒मे सो॒म॒म॒भि गृ॒ह्णाति॑ रे॒त ए॒व तद्-द॑धाति सु॒शर्मा॑ऽसि
सु॒प्र॒ति॒ष्ठा॒न इ॒त्याह॑ सो॒मे हि सो॒म॒म॒भिगृ॒ह्णाति॑ प्र॒ति॒ष्ठि॒त्या ए॒तस्मिन्॑ वा
अ॒पि ग्र॑हे म॒नुष्ये॑भ्यो दे॒वेभ्यः॑ पि॒तृभ्यः॑ क्रि॒यते॑ सु॒शर्मा॑ऽसि सु॒प्र॒ति॒ष्ठा॒न
इ॒त्याह॑ म॒नुष्ये॑भ्य ए॒वैते॑न करोति बृ॒हदि॒त्याह॑ दे॒वेभ्य॑ ए॒वैते॑न करोति

नम॑ इत्या॒ह पि॒तृ॒भ्य॑ ए॒वैतेन॑ करोत्ये॒ () ताव॑ती वै दे॒वता॒स्ताभ्य॑
 ए॒वैन॑ꣳ सर्वा॑भ्यो गृ॒ह्णात्ये॒ष ते योनि॑र्विश्वे॑भ्यस्त्वा दे॒वेभ्य॑ इत्या॒ह
 वैश्व॑दे॒वो ह्ये॒षः । 25 (वि॒श्वे - प्र - पि॒तृ॒भ्य॑ ए॒वैतेन॑ करोत्ये॒ - कान्न॑
 विꣳश॑तिश्च) (A7)

6.5.8.1

प्रा॒णो वा ए॒ष यदु॑पाꣳशु-र्यदु॑पाꣳशुपा॒त्रेण॑ प्रथ॒मश्चो॑त्त॒मश्च॑ ग्रहौ
 गृ॒ह्येते॑ प्रा॒णमे॒वानु॑ प्रय॒न्ति प्रा॒णम॑नू॒द्यन्ति॑ प्रजा॒पति॑र्वा ए॒ष यदा॑ग्रयणः
 प्रा॒ण उपा॑ꣳशुः प॒त्नीः प्रजाः॑ प्र जनय॒न्ति यदु॑पाꣳशुपा॒त्रेण॑
 पा॒त्नीव॑तमाग्रयणाद्-गृ॒ह्णाति॑ प्रजा॒नां प्र॑जननाय॒ तस्मा॑त् प्रा॒णं प्रजा॑
 अनु॑ प्र जाय॒न्ते दे॒वा वा इ॒त इ॒तः प॒त्नीः सु॒वर्ग- [] 26

6.5.8.2

लौ॒कम॑जिगाꣳसन् ते सु॒वर्गं लौ॒कं न प्रा॑जानन् त ए॒तं
 पा॒त्नीव॑तमपश्यन् तमगृ॒ह्णत॑ ततो वै ते सु॒वर्गं लौ॒कं प्रा॑जानन् यत्
 पा॒त्नीव॑तो गृ॒ह्यते॑ सु॒वर्गस्य॑ लो॒कस्य॑ प्रजा॒त्यै स सोमो॑ नातिष्ठत स्त्री॒भ्यो
 गृ॒ह्यमा॑णस्तं घृ॒तं वज्रं॑ कृ॒त्वाऽघ्नन्॑ तं निरिन्द्रि॒यं भू॒तम॑गृ॒ह्णन् तस्मा॑त्

स्त्रियो॑ निरिन्द्रि॑या अदा॑यादीरपि॑ पा॒पात् पु॒ञ्स उप॑स्तितरं- [] 27

6.5.8.3

ँवद॑न्ति यद्-घृ॑तेन॑ पा॒त्नीव॑तः॒ श्री॑णाति॑ वज्रे॑णै॒वैनं॑ ँव॑शो कृ॒त्वा
गृ॒ह्णा-त्यु॑पयाम॑गृहीतोऽसी॑त्याहे॒यं ँवा॑ उप॒याम॑स्तस्मा॑दिमां
प्र॒जा अनु॑ प्र जा॒यन्ते॑ बृ॒हस्प॑तिसु॒तस्य॑ त इत्या॑ह ब्र॒ह्म वै दे॒वानां॑
बृ॒हस्प॑तिर्ब्र॒ह्मणै॑वास्मै॑ प्र॒जाः प्र जन॑यती॒न्दो इत्या॑ह रे॒तो वा
इ॒न्द्रू रे॒त ए॒व तद्-द॑धातीन्द्रि॒याव इ॒- [] 28

6.5.8.4

-त्या॑ह प्र॒जा वा इन्द्रि॑यं प्र॒जा ए॒वास्मै॑ प्र जन॑यत्यग्ना(३)
इत्या॑हाग्नि॒र्वै रे॒तोधाः॑ प॒त्नीव॑ इत्या॑ह मिथु॒नत्वा॑य स॒जूर्दे॒वेन॑ त्वष्ट्रा
सोमं॑ पि॒बेत्या॑ह त्वष्ट्रा॒ वै प॒शूनां॑ मिथु॒नानां॑ रूप॒कृद्-रूप॑मे॒व प॒शुषु॑
द॑धाति॒ देवा॑ वै त्वष्ट्रा॒रमजि॑घाञ्सन्थ् स प॒त्नीः प्रा॑पद्यत॒ तं न प्र॑ति
प्रा॒यच्छ॑न् तस्मा॑दपि- [] 29

6.5.8.5

व॒ध्यं प्र॑पन्नं न प्र॒ति प्र॑यच्छन्ति॑ तस्मा॑त् पा॒त्नीव॑ते त्वष्ट्रेऽपि॑ गृ॒ह्यते॑ न
सा॒दय॑त्यसन्ना॒द्धि प्र॒जाः प्र॒जाय॑न्ते॒ नानु॑ वषट् करोति॑ यदनु॑वषट्

कुर्याद्-रुद्रं प्रजा अन्ववसृजेद्-यन्नानुवषट्कुर्या-दशान्त-मग्नीथ्
 सोमं भक्षयेदुपाञ्चनु वषट् करोति न रुद्रं प्रजा अन्ववसृजति
 शान्तमग्नीथ् सोमं भक्षयत्यग्नी-न्नेष्टुरुपस्थमा सीद- [] 30

6.5.8.6

नेष्टः पत्नी-मुदानयेत्याहा-ग्नीदेव नेष्टरि रेतो दधाति नेष्टा
 पत्नियामुद्-गात्रा सं ख्यापयति प्रजापतिर्वा एष यदुद्गाता प्रजानां
 प्रजननायाप उप प्र वर्तयति रेत एव तथ् सिञ्चत्यूरुणोप प्र
 वर्तयत्यूरुणा हि रेतः सिच्यते नग्नं कृत्यो-रुमुप प्र वर्तयति यदा
 हि नग्न ऊरुर्भवत्यथ मिथुनी () भवतोऽथ रेतः सिच्यतेऽथ प्रजाः
 प्र जायन्ते । 31

(पत्नीः सुवर्ग - मुपस्तिर - मिन्द्रियाव इत्य - पि - सीद -
 मिथुन्य - षौ च) (A8)

6.5.9.1

इन्द्रो वृत्रमहन् तस्य शीर्षकपाल-मुदौब्जथ् स द्रोणकलशोऽभवत्
 तस्माथ् सोमः समस्रवथ् स हारियोजनोऽभवत् तं व्यचिकिथ्स-

ज्जुहवानी(३) मा हौषा(३)मिति सोऽमन्यत यद्धोष्याम्याम॑ हौष्यामि
यन्न होष्यामि यज्ञवेशसं करिष्यामीति तमध्रियत होतु॑
सोऽग्निरब्रवीन्न मँय्याम॑ हौष्यसीति तं धानाभिरश्रीणात्- [] 32

6.5.9.2

त॑ शृतं भूतमजुहोद्-यद्धानाभि-हारियोजन॑ श्रीणाति शृतत्वाय
शृतमेवैनं भूतं जुहोति बह्वीभिः श्रीणात्येतावती-रेवास्या-मुष्मिन्
लोके कामदुघा भवन्त्यथो खल्वाहुरेता वा इन्द्रस्य पृश्नयः
कामदुघा यद्धारियोजनीरिति तस्माद्-बह्वीभिः श्रीणीयादृख्सामे वा
इन्द्रस्य हरी सोमपानौ तयोः परिधय आधानं यदप्रहृत्य परिधी-
ज्जुहुया-दन्तराधानाभ्यां- [] 33

6.5.9.3

घासं प्र यच्छेत् प्रहृत्य परिधीज्जुहोति निराधानाभ्यामेव घासं प्र
यच्छत्युन्नेता जुहोति यातयामेव ह्येतर्ह्यध्वर्युः स्वगाकृतो
यदध्वर्युर्जुहुयाद्-यथा विमुक्तं पुनर्युनक्ति तादृगेव तच्छीर्ष-
न्नधिनिधाय जुहोति शीर्षतो हि स समभवद्-विक्रम्य जुहोति

विक्रम्य॑ हीन्द्रो॑ वृ॒त्रम॑हन्त्सु॒ समृ॑द्ध्यै प॒शवो॑ वै हा॒रियो॑जनीर्यथ्
संभि॑न्द्वादल्पा- [] 34

6.5.9.4

ए॒नं प॒शवो॑ भु॒ञ्जन्त॑ उप॒तिष्ठे॑रन् यन्न संभि॑न्द्वाद्-ब॒हव॑ ए॒नं
प॒शवो॑ऽभु॒ञ्जन्त॑ उप॒ तिष्ठे॑रन् मन॒सा सं बा॑धत उ॒भयं॑ करोति ब॒हव॑
ए॒वैनं॑ प॒शवो॑ भु॒ञ्जन्त॑ उप॒ तिष्ठ॑न्त उ॒न्नेतर्यु॑प॒हवमि॑च्छन्ते य ए॒व
तत्र॑ सोम॒पीथ॑स्तमे॒वाव रु॑न्धत उ॒त्तर॑वेद्यां नि॒वप॑ति प॒शवो॑ वा उ॒त्तर॑वेदिः
प॒शवो॑ हा॒रियो॑जनीः प॒शुष्वे॒व प॒शून् प्र॑ति ष्ठा॒पय॑न्ति () । 35

(अ॒श्रीणा॑ - द॒न्तरा॑धानाभ्या - म॒ल्पाः - स्था॑पयन्ति) (A9)

6.5.10.1

ग्र॒हान् वा अ॒नु प्र॒जाः प॒शवः॑ प्र जा॒यन्त॑ उपा॒श्वन्तर्या॑-मा॒वजा॑वयः
शु॒क्राम॑न्थिनौ पु॒रुषा॑ ऋ॒तुग्र॑हा-नेक॑शफा आ॒दित्य॑ग्रहं गा॒व
आ॒दित्य॑ग्रहो भू॒यिष्ठा॑भिर्. ऋ॒ग्भिर्गृ॑ह्यते तस्मा॑द्-गा॒वः प॒शूनां॑ भू॒यिष्ठा॑
यत् त्रि॒रुपा॑ऽशु॒ हस्ते॑न वि॒गृह्णा॑ति तस्मा॑द् द्वौ त्री॒नजा॑
ज॒नय॑त्यथा॒वयो॑ भू॒यसीः॑ पि॒ता वा ए॒ष यदा॑ग्रयणः पु॒त्रः क॒लशो॑

यदाग्रयण उपदस्येत् कलशाद्-गृह्णीयाद्-यथा पिता- [] 36

6.5.10.2

पुत्रं क्षित उपधावति तादृगेव तद्यत् कलश उपदस्ये-दाग्रयणाद्-
गृह्णीयाद्-यथा पुत्रः पितरं क्षित उपधावति तादृगेव तदात्मा वा
एष यज्ञस्य यदाग्रयणो यद्ग्रहो वा कलशो वोपदस्ये-दाग्रयणाद्-
गृह्णीयादात्मन एवाधि यज्ञं निष्करोत्यविज्ञातो वा एष गृह्यते
यदाग्रयणः स्थाल्या गृह्णाति वायव्येन जुहोति तस्माद्- [] 37

6.5.10.3

गर्भेणा विज्ञातेन ब्रह्महा ऽवभृथमव यन्ति परा स्थालीरस्यन्त्युद्-
वायव्यानि हरन्ति तस्मात् स्त्रियं जातां पराऽस्यन्त्युत् पुमां सꣳ
हरन्ति यत् पुरोरुचमाह यथा वस्यस आहरति तादृगेव तद्-यद्-ग्रहं
गृह्णाति यथा वस्यस आहत्य प्राऽऽ*ह तादृगेव तद्-यत् सादयति यथा
वस्यस उपनिधाया-पक्रामति तादृगेव तद् य () द्वै यज्ञस्य साम्ना
यजुषा क्रियते शिथिलं तद्-यद्-चा तद् दृढं पुरस्तादुपयामा यजुषा
गृह्यन्त उपरिष्ठा-दुपयामा ऋचा यज्ञस्य धृत्यै । 38 (यथा पिता -

तस्मा - दपक्रामति तादृगेव तद् य - दष्टा दश च) (A10)

6.5.11.1

प्रान्यानि पात्राणि युज्यन्ते नान्यानि यानि पराचीनानि प्रयुज्यन्तेऽमुमेव
तैर्लोकमभि जयति पराडिव ह्यसौ लोको यानि पुनः प्रयुज्यन्ते
इममेव तैर्लोकमभि जयति पुनः पुनरिव ह्ययं लोकः प्रान्यानि
पात्राणि युज्यन्ते नान्यानि यानि पराचीनानि प्रयुज्यन्ते तान्यन्वोषधयः
परा भवन्ति यानि पुनः- [] 39

6.5.11.2

प्रयुज्यन्ते तान्यन्वोषधयः पुनरा भवन्ति प्रान्यानि पात्राणि युज्यन्ते
नान्यानि यानि पराचीनानि प्रयुज्यन्ते तान्यन्वारण्याः पशवोऽरण्यमप
यन्ति यानि पुनः प्रयुज्यन्ते तान्यनु ग्राम्याः पशवो ग्राममुपावयन्ति
यो वै ग्रहाणां निदानं वैद निदानवान् भवत्याज्यमित्युक्थं तद्वै
ग्रहाणां निदानं यदुपांशु शंसति त- [] 40

6.5.11.3

–दु॒पा॒ञ्च॒न्तर्या॒मयो॒–र्यदु॒च्चै॒–स्तदि॒तरेषां॒ ग्रहा॑णामे॒तद्वै॒ ग्रहा॑णां
नि॒दानं॒ य॒ एवं॒ वेद॑ नि॒दान॒वान् भव॑ति यो वै ग्रहा॑णां मि॒थुनं॒ वेद॑
प्र प्र॒जया॑ प॒शुभिर्मि॑थुनैर्जा॒यते॒ स्थाली॑भिरन्ये ग्रहा॑ गृह्यन्ते वा॒यव्यै॒रन्य॑
ए॒तद्वै॒ ग्रहा॑णां मि॒थुनं॒ य॒ एवं॒ वेद॑ प्र प्र॒जया॑ प॒शुभिर्मि॑थुनैर्जा॒यत॑
इन्द्र॑स्त्वष्टुः सोम॑मभीषहाऽपि॒ब॒थ् स वि॒ष्वङ्– [] 41

6.5.11.4

व्या॒र्च्छ॒थ् स आ॒त्मन्ना॒रम॑णं नावि॒न्द॒थ् स ए॒तान॑नु॒स॒वनं॑
पु॒रोडा॑शानपश्यत् तान् नि॒रव॑पत् तैर्वै स आ॒त्मन्ना॒रम॑ण–मकुरु॒त
तस्मा॑दनु॒स॒वनं॑ पु॒रोडा॑शा नि॒रुप्य॑न्ते तस्मा॑दनु॒स॒वनं॑ पु॒रोडा॑शानां
प्रा॒श्नीया॑दा॒त्म–न्नेवाऽऽ*र॑मणं कुरु॒ते नैन॑ꣳ सोमोऽति॑ पवते
ब्र॒ह्मवा॑दिनो वदन्ति नर्चा न यजु॒षा प॒ङ्क्ति॑राप्यतेऽथ किं () य॒ज्ञस्य॑
पा॒ङ्क्त॒त्वमि॑ति धानाः करं॒भः परि॑वापः पु॒रोडा॑शः पय॒स्या तेन॑
प॒ङ्क्ति॑राप्यते तद्–य॒ज्ञस्य॑ पा॒ङ्क्त॒त्वं । 42 (भव॑न्ति या॒नि पुनः॑ –
शꣳस॑ति त – द्वि॒ष्वङ् – किं – चतु॑र्दश च) (A11)

Prasna Korvai with starting Padams of 1 to 11 Anuvaakams :-

(इन्द्रो॑ वृ॒त्राय॑ – ऽऽयु॒र्वे – य॒ज्ञेन॑ – सु॒वर्गा॑ – येन्द्रो॑ म॒रुद्धि॑ – र॒दिति॑ –
रन्त॑र्यामपा॒त्रेण॑ – प्रा॒ण उ॒पा॒शु पा॒त्रे – णेन्द्रो॑ वृ॒त्रम॑हन् तस्य॑ – ग्र॒हान्
– प्रा॒न्या – न्येका॑दश)

Korvai with starting Padams of 1, 11, 21 Series of Panchaatis :-

(इन्द्रो॑ वृ॒त्राय॑ – पु॒नर् ऋ॒तुना॑ऽऽह – मि॒थुनं॑ प॒शवो॑ –
नेष्टः॑ प॒त्नी – मु॒पा॒श्वन्त॑र्यामयो॑ – द्वि॒चत्वारि॑ंशत्)

First and Last Padam of Fifth Prasnam of 6th Kandam

(इन्द्रो॑ वृ॒त्राय॑ – पा॒ङ्गत्वं)

॥ हरिः॑ ओं ॥

॥ कृष्ण यजुर्वेदीय तैत्तिरीय संहितायां षष्ठकाण्डे पञ्चमः प्रश्नः

समाप्तः ॥

ओं नमः परमात्मने, श्री महागणपतये नमः, श्री गुरुभ्यो नमः

हरिः ओं

6.6 षष्ठकाण्डे षष्ठः प्रश्नः – सोममन्त्रब्राह्मणनिरूपणं

6.6.1.1

सुवर्गाय॑ वा ए॒तानि॑ लो॒काय॑ हूयन्ते॒ यद्-दाक्षि॑णानि॒ द्वाभ्यां॑
गार्.ह॑पत्ये जुहोति॒ द्विपाद्-यज॑मानः॒ प्रतिष्ठि॑त्या आग्नी॒ध्रे
जुहोत्यन्तरि॑क्ष ए॒वाऽऽ*क्रम॑ते॒ सदोऽभ्यै॑ति सुवर्गमे॒वैनं॑ लो॒कं ग॑मयति
सौरी॑भ्यामृ॒ग्भ्यां गार्.ह॑पत्ये जुहोत्यमुमे॒वैनं॑ लो॒कं समारो॑हयति
नय॑वत्यर्चाऽऽ*ग्नी॒ध्रे जुहोति॑ सुवर्गस्य॒ लोकस्या॑भिनी॒त्यै दि॒वं गच्छ॑
सुवः॑ प॒तेति॑ हिरण्यं- [] 1

6.6.1.2

हु॒त्वोद्-गृ॑ह्णाति सुवर्गमे॒वैनं॑ लो॒कं ग॑मयति रू॒पेण॑ वो
रू॒पम॑भ्यैमीत्याह रू॒पेण॑ ह्यासां रू॒पम॑भ्यैति यद्धिर॑ण्येन तुथो वो
वि॒श्ववे॑दा वि भज॑त्वित्याह तुथो ह स्म वै वि॒श्ववे॑दा दे॒वानां॑ दक्षि॒णा
वि भज॑ति तेनै॒वैना॑ वि भज॑त्ये तत् ते अग्ने॒ राध- [] 2

6.6.1.3

ऐति॑ सोम॑च्युत॒मित्या॑ह सोम॑च्युत॒ꣳ ह्यस्य॑ राध ऐति॑ तन्मित्र॑स्य पथा
 नये॑त्याह शान्त्या॑ ऋत॑स्य पथा प्रेत॑ चन्द्र॑ दक्षिणा॑ इत्याह सत्यं॑ वा
 ऋत॑ꣳ सत्येनै॑वैना ऋतेन॑ वि भजति॑ यज्ञस्य॑ पथा सुविता॑
 नयन्ती॑रित्याह यज्ञस्य॑ ह्येताः पथा॑ यन्ति॑ यद्-दक्षिणा॑
 ॥
 ब्राह्मण॑मद्य राध्यास- [] 3

6.6.1.4

मृषि॑मार्.षेय॑मित्याहैष वै ब्राह्मण॑ ऋषि॑मार्.षेयो यः शुश्रु॑वान्
 तस्मा॑देवमाह वि सुवः॑ पश्य॑ व्यन्तरि॑क्षमित्याह सुवर्ग॑मेवैनं॑
 ॥लोकं॑ गमयति॑ यतस्व॑ सदस्यै॑रित्याह मित्र॑त्वायास्मद्वा॑त्रा देव॑त्रा
 गच्छ॑त मधु॑मतीः प्रदा॑तारमा विश॑तेत्याह वय॑मिह प्रदा॑तारः
 ॥स्मोऽस्मान्मु॑त्र मधु॑मतीरा विश॑तेति- [] 4

6.6.1.5

वावै॑तदाह हिरण्यं॑ ददाति॑ ज्योति॑र्वै हिरण्यं॑ ज्योति॑रेव पु॒रस्ता॑द्धत्ते
 सुवर्ग॑स्य लोक॑स्यानु॒ख्यात्या॑ अग्नी॑धे ददात्य॑ग्निमु॒खाने॑वर्तून् प्री॑णाति

ब्र॒ह्म॒णो॑ द॒दाति॑ प्र॒सू॒त्यै॑ हो॒त्रे द॒दा॒त्या॒त्मा वा ए॒ष य॒ज्ञस्य॑
यद्धो॒ताऽऽत्मा॑नमे॒व य॒ज्ञस्य॑ दक्षि॒णाभिः॑ स॒म॒र्ध॒यति॑ । 5

(हि॒र॒ण्य॒ - रा॒धो - रा॒ध्या॒स - म॒मु॒त्र म॒धु॒म॒ती॒रा वि॒श॒ते॒त्य -
ष्टा॒त्रि॒ंश॒च्च) (A1)

6.6.2.1

स॒मि॒ष्ट य॒जू॒षि जु॒होति॑ य॒ज्ञस्य॑ स॒मि॒ष्ट्यै॑ य॒द्वै य॒ज्ञस्य॑ कू॒रं
य॒द्-वि॒लि॒ष्टं य॒द॒त्येति॑ य॒न्ना॒त्येति॑ य॒द॒ति॒क॒रोति॑ य॒न्नापि॑ क॒रोति॑ तदे॒व
तैः प्री॑णाति न॒व जु॒होति॑ न॒व वै पु॒रु॒षे प्रा॒णाः पु॒रु॒षेण॑ य॒ज्ञः
सं॒मि॒तो या॒वा॒ने॒व य॒ज्ञस्तं॑ प्री॑णाति ष॒ड् ऋ॒ग्मि॒याणि जु॒होति॑
ष॒ड्वा ऋ॒त॒व ऋ॒तू॒ने॒व प्री॑णाति त्री॒णि य॒जू॒षि- [] 6

6.6.2.2

त्रय॑ इ॒मे लो॒का इ॒मा॒ने॒व लो॒कान् प्री॑णाति य॒ज्ञ य॒ज्ञं ग॒च्छ य॒ज्ञप॑तिं
ग॒च्छे॒त्याह॑ य॒ज्ञप॑तिमे॒वैनं॑ ग॒म॒यति॑ स्वां यो॒निं ग॒च्छे॒त्याह॑ स्वा॒मे॒वैनं॑
यो॒निं ग॒म॒य॒त्येष॑ ते य॒ज्ञो य॒ज्ञप॑ते स॒हसू॑क्त॒वाकः॑ सु॒वी॒र इ॒त्याह॑

यज॑मान॒ ए॒व वी॑र्यं॒ दधा॑ति वा॒सि॒ष्ठो ह॑ सा॒त्यह॑व्यो दे॒वभा॑गं प॒प्रच्छ॑
यथ् सृ॑ञ्ज॒यान् बहु॑याजि॒नोऽयी॑यजो य॒ज्ञे- [] 7

6.6.2.3

य॒ज्ञं प्र॑त्यति॒ष्ठिपा॑(३) य॒ज्ञप॑ता(३)वि॒ति स॒ हो॑वाच य॒ज्ञप॑तावि॒ति
स॒त्याद्वै सृ॑ञ्ज॒याः परा॑ ब॒भूवु॑रिति हो॒वाच॑ य॒ज्ञे वा॒व य॒ज्ञः प्र॑ति॒ष्ठाप्य॑
आसी॑द्-यज॒मान॒स्या-प॑राभा॒वाये॑ति दे॒वा गा॑तुवि॒दो गा॑तुं वि॒त्त्वा गा॑तु
-मि॒तेत्या॑ह य॒ज्ञ ए॒व य॒ज्ञं प्र॑ति ष्ठा॒पय॑ति यज॒मान॒स्या-प॑राभा॒वाय । 8
(यजू॑ँषि - य॒ज्ञ - ए॒कच॑त्वारि॒ंशच्च॑) (A2)

6.6.3.1

अ॒वभृ॑थ-यजू॑ँषि जु॒होति॑ यदे॒वावा॑ची॒न-मे॒कहा॑य॒नादे॑नः क॒रोति॑
तदे॒व तै॒रव॑ यज॒ते ऽपो॑ऽवभृ॑थ-म॒वैत्य॑प्सु वै वरु॑णः सा॒क्षादे॒व
वरु॑णम॒व यज॒ते व॒र्त्म॑ना वा अ॒न्वित्य॑ य॒ज्ञं र॒क्षाँसि॑ जिघाँ॒सन्ति॑
सा॒म्ना प्र॑स्तो॒ताऽन्व॑वैति॒ साम॑ वै र॒क्षोहा॑ र॒क्षसा॑मप॒हत्यै॑
त्रि॒र्निध॑नमु॒पैति॑ त्रय॒ इमे॑ लो॒का ए॒भ्य ए॒व लो॒केभ्यो॑ र॒क्षाँ- [] 9

6.6.3.2

—स्यप॑ ह॒न्ति॑ पु॒रुषः॑ पु॒रुषो॑ नि॒धन॑मु॒पैति॑ पु॒रुषः॑ पु॒रुषो॑ हि र॒क्षस्वी॑
र॒क्षसा॑मप॒हत्या॑ उ॒रु॒ः हि॑ रा॒जा व॒रुण॑श्च॒कारे॑त्याह॒ प्रति॑ष्ठित्यै॒ शतं॑
ते रा॒जन् भि॑षजः॒ सह॑स्रमि॒त्याह॑ भे॒षज॑मे॒वास्मै॑ क॒रोत्य॑भि॒ष्ठितो॑
व॒रुण॑स्य पा॒श इ॒त्याह॑ व॒रुण॑पा॒शमे॒वाभि॑ तिष्ठति ब॒र्हि॒रभि॑
जुहो॒त्याहु॑तीनां॒ प्रति॑ष्ठित्या॒ अथो॑ अ॒ग्नि॒वत्ये॒व जुहो॒त्यप॑ ब॒र्हि॒षः

प्रया॒जान्— [] 10

6.6.3.3

यज॑ति प्र॒जा वै ब॒र्हिः प्र॒जा ए॒व व॒रुण॑पा॒शान्—मु॒ञ्च॒त्याज्य॑भा॒गौ
यज॑ति य॒ज्ञस्यै॒व चक्षु॑षी॒ नान्त॑रेति॒ वरु॑णं य॒जति॑ व॒रुण॑पा॒शादे॒वैनं॑
मु॒ञ्च॒त्यग्नी॑व॒रुणौ॑ यज॑ति सा॒क्षादे॒वैनं॑ व॒रुण॑पा॒शान् मु॒ञ्च॒त्य—
पब॒र्हिषा॑वनू॒यजौ॑ यज॑ति प्र॒जा वै ब॒र्हिः प्र॒जा ए॒व व॒रुण॑पा॒शान्—
मु॒ञ्च॒ति च॒तुरः॑ प्रया॒जान् यज॑ति द्वा॒वनू॒याजौ॑ षट्॒थ् संप॑द्यन्ते
षड्वा॑ ऋ॒तव॑— [] 11

6.6.3.4

ऋ॒तु॒ष्वे॒व प्र॒ति ति॒ष्ठ-त्य॑व॒भृथ॑-नि॒चङ्कु॑णे॒त्याह॑ यथो॒दित॑मे॒व वरु॑णम॒व
यज॑ते स॒मु॒द्रे ते हृ॒दय॑-म॒प्स्वन्त॑रि॒त्याह॑ स॒मु॒द्रे ह्यन्त॑र्वरुणः॒ सं त्वा॑
वि॒श-न्त्वो॑ष॒धी-रु॒ताऽऽ*प॑ इ॒त्याहा॒द्भि-रे॒वैन॑मोष॒धीभिः॑ स॒म्यञ्चं॑ दधा॒ति
दे॒वीरा॑प ए॒ष वो गर्भ॑ इ॒त्याह॑ यथा॒यजु॑रे॒वैतत् प॒शवो॑ वै- [] 12

6.6.3.5

सो॒मो यद्-भि॑न्दूनां भ॒क्षये॑त् प॒शुमा॑न्थ्-स्याद्-वरु॑ण-स्त्वे॒न
गृ॒ह्णी॒याद्य॑न्न भ॒क्षये॑द॒पशुः॑ स्या॒न्नैनं॑ वरु॑णो गृ॒ह्णी॒या-दुप॑स्पृश्यमे॒व
प॒शुमा॑न् भव॒ति नैनं॑ वरु॑णो गृ॒ह्णाति॑ प्र॒तियु॑तो वरु॑णस्य पा॒श इ॒त्याह॑
वरु॑णपा॒शादे॒व निर्मु॑च्यते ऽप्र॒तीक्ष॑मा य॒न्ति वरु॑णस्यान्त॒र्हि॒त्या
ए॒धोऽस्ये॑धिषीम॒ही-त्या॑ह स॒मिधै॑वाग्निं न॒मस्य॑न्त () उपा॑यन्ति
तेजो॑ऽसि तेजो॑ मयि धे॒हीत्या॑ह तेज॑ ए॒वाऽऽत्म॑न् ध॒त्ते । 13

(रक्षा॑सि - प्र॒याजा - नृ॒तवो॑ - वै - न॒मस्य॑न्तो
- द्वा॒दश॑ च) (A3)

6.6.4.1

स्फ्येन वेदिमुद्धन्ति रथाक्षेण वि मिमीते यूपं मिनोति त्रिवृतमेव
 वज्रं संभृत्य भ्रातृव्याय प्र हरति स्तृत्यै यदन्तर्वेदि
 मिनुयाद्-देवलोकमभि जयेद्-यद्-बहिर्वेदि मनुष्य लोकं
 वैद्यन्तस्य सन्धौ मिनोत्युभयो-लोकयो-रभिजित्या उपरसंमितां
 मिनुयात् पितृलोककामस्य रशनसंमितां मनुष्यलोककामस्य चषाल-
 संमितामिन्द्रिय कामस्य सर्वान्थ् समान् प्रतिष्ठाकामस्य ये त्रयो
 मध्यमास्तान्थ् समान् पशुकामस्यैतान् वा- [] 14

6.6.4.2

अनु पशव उप तिष्ठन्ते पशुमानेव भवति व्यतिषजेदितरान् प्रजयैवैनं
 पशुभिर्व्यतिषजति यं कामयेत प्रमायुकः स्यादिति गर्तमितं तस्य
 मिनुयादुत्तरार्ध्यं ँवर्षिष्ठमथ हसीयाऽसमेषा वै गर्तमिद्वस्यैवं मिनोति
 ताजक् प्र मीयते दक्षिणार्ध्यं ँवर्षिष्ठं मिनुयाथ् सुवर्गकामस्याथ
 हसीयाऽस-माक्रमणमेव तथ् सेतुं ँयजमानः कुरुते सुवर्गस्य
 लोकस्य समष्ट्यै- [] 15

6.6.4.3

यदे॒कस्मिन् यूपे॒ द्वे र॒शने॑ परि॒व्यय॑ति तस्मा॒देको॒ द्वे जा॒ये वि॒न्दते॑
यन्नैका॑ र॒शनां॑ द्वयो॒र्यूपयोः॑ परि॒व्यय॑ति तस्मान्नैका॒ द्वौ पती॑ वि॒न्दते॑
यं का॒मये॑त स्त्र्यस्य जा॒येतेत्यु॒पान्ते॑ तस्य व्यतिष॑जेथ् स्त्र्ये॒वास्य॑
जाय॑ते यं का॒मये॑त पु॒मानस्य॑ जा॒येतेत्या॒न्तं तस्य॑ प्र वै॒ष्टये॑त्
पु॒माने॒वास्य॑- [] 16

6.6.4.4

जाय॑ते ऽसुरा॒ वै दे॒वान् दक्षि॑णत उ॒पान॑यन् तान् दे॒वा उप॑शयेनैवापा॒-
नुद॑न्त त-दुप॑शयस्यो-प॒शय॑त्वं यद्-दक्षि॑णत उप॑शय उप॑शये
भ्रातृ॑व्यापनु॒त्यै सर्वे॑ वा अ॒न्ये यू॒पाः प॒शुम॑न्तोऽथोप॑शय
ए॒वाप॑शुस्तस्य यज॑मानः प॒शुर्य॑न्न निर्दि॑शेदार्ति-मा॒च्छेद्-
यज॑मानोऽसौ ते प॒शुरिति॑ निर्दि॑शेद्यं द्वि॒ष्याद्-यमे॒व- [] 17

6.6.4.5

द्वेष्टि॑ तमस्मै प॒शुं निर्दि॑शति यदि न द्वि॒ष्यादा॒खुस्ते॑ प॒शुरिति॑ ब्रू॒यान्न
ग्रा॒म्यान् प॒शून् हि॒नस्ति॑ नाऽऽ*र॒ण्यान् प्र॒जाप॑तिः प्र॒जा अ॑सृजत

सोऽन्नाद्येन व्यार्ध्यत स एतामेकादशिनी-मपश्यत् तया वै
 सोऽन्नाद्यमवारुन्ध यद्दश यूपा भवन्ति दशाक्षरा विराडन्नं विराड्
 विराजैवा-न्नाद्यमव रुन्धे- [] 18

6.6.4.6

य एकादशः स्तन एवास्यै स दुह एवैनां तेन वज्रो वा एषा सं
 मीयते यदेकादशिनी सेश्वरा पुरस्तात् प्रत्यञ्चं यज्ञं संमर्दितोर्यत्
 पालीवतं मिनोति यज्ञस्य प्रत्युत्तब्ध्यै सयत्वाय । 19 (वै - समष्ट्यै
 - पुमानेवास्य - यमेव - रुन्धे - त्रिंशच्च) (A4)

6.6.5.1

प्रजापतिः प्रजा असृजत स रिरिचानोऽमन्यत स एतामेकादशिनी-
 मपश्यत् तया वै स आयुरिन्द्रियं वीर्यमात्मन्नधत्त प्रजा इव खलु वा
 एष सृजते यो यजते स एतर्हि रिरिचान इव यदैषैकादशिनी
 भवत्यायुरेव तयैन्द्रियं वीर्यं यजमान आत्मन् धत्ते प्रैवाऽऽग्नेयेन
 वापयति मिथुनं सारस्वत्या करोति रेतः- [] 20

6.6.5.2

सौ॒म्येन॑ द॒धाति॑ प्र॒ जन॑यति पौ॒ष्णेन॑ बार्ह॒स्पत्यो॑ भ॒वति॑ ब्र॒ह्म
 वै दे॒वानां॑ बृ॒हस्प॑तिर्ब्र॒ह्मणै॑वास्मै प्र॒जाः प्र॑जनयति वै॒श्वदे॒वो भ॑वति
 वै॒श्वदे॒व्यो वै प्र॒जाः प्र॒जा ए॒वास्मै॑ प्र॑जनयती-न्द्रि॒यमे॒वैन्द्रे॑णाव
 रु॒न्धे वि॒शं मा॒रुते॑नौजो ब॒लमै॑न्द्रा॒ग्नेन॑ प्र॒सवा॑य सा॒वित्रो॑ निर्व॒रुण॑त्वाय
 वा॒रुणो॑ म॒ध्यत॑ ऐ॒न्द्रमा॑ ल॒भते॑ म॒ध्यत॑ ए॒वेन्द्रि॒यं यज॑माने
 द॒धाति॑- [] 21

6.6.5.3

पु॒रस्ता॑दै॒न्द्रस्य॑ वै॒श्वदे॒वमा॑ ल॒भते॑ वै॒श्वदे॒वं वा॑ अ॒न्नम॑न्नमे॒व
 पु॒रस्ता॑द्ध॒त्ते तस्मा॑त् पु॒रस्ता॑द॒न्नम॑द्यत ऐ॒न्द्रमा॑ल॒भ्य मा॒रुत॑मा ल॒भते॑
 वि॒ड् वै म॒रुतो॑ वि॒शमे॑वास्मा अनु ब॒ध्नाति॑ यदि का॒मये॑त योऽव॒गतः॑
 सोऽप॑ रु॒ध्यतां॑ योऽप॑रु॒द्धः सोऽव॑ गच्छ॒त्वित्यै॒न्द्रस्य॑ लो॒के वा॒रुण॑मा
 ल॒भेत॑ वा॒रुण॑स्य लो॒क ऐ॒न्द्रं- [] 22

6.6.5.4

ॐ ए॒वाव॑गतः सोऽप॑ रु॒ध्यते॑ योऽप॑रु॒द्धः सोऽव॑ गच्छति॒ यदि॑ का॒मये॑त
 प्र॒जा मु॒ह्येयु॑रिति॒ प॒शून् व्य॑तिष॒जेत् प्र॒जा ए॒व मो॑हयति॒ यद॑भि॒वाह॑तोऽपां
 ॐ वा॒रुण॑मा॒लभे॑त प्र॒जा व॑रु॒णो गृ॑ह्णीयाद्-दक्षि॒णत॑ उद॒ञ्च॒मा
 ल॑भतेऽप॒वाह॑तोऽपां प्र॒जाना॑-मव॑रु॒ण ग्रा॑हाय । 23 (रेतो - यज॑माने
 द॒धाति॑ - लो॒क ऐ॒न्द्र - स॒प्तत्रिं॑शच्च) (A5)

6.6.6.1

इन्द्रः॒ प॒त्न्या म॑नु॒मया॑जयत् तां प॒र्य॑ग्निकृ॒ता-मु॑दसृजत् तया
 म॒नुरा॑र्ध्नो॒द्यत् प॒र्य॑ग्निकृतं पा॒त्नीव॑तमु॒थ् सृ॒जति॑ या॒मेव॑ म॒नुर्.
 ऋ॒द्धिमा॑र्ध्नोत् ता॒मेव॑ यज॒मान॑ ऋ॒ध्नोति॑ य॒ज्ञस्य॑ वा अ॒प्रति॑ष्ठिताद्-य॒ज्ञः
 प॒रा भ॑वति य॒ज्ञं प॒राभ॑वन्तं ॐ यज॒मानोऽनु॑ प॒रा भ॑वति यदा॒ज्येन॑
 पा॒त्नीव॑तः स॒स्थाप॑यति य॒ज्ञस्य॑ प्र॒तिष्ठि॑त्यै य॒ज्ञं प्र॒ति॒तिष्ठ॑न्तं
 ॐ यज॒मानोऽनु॑ प्र॒ति तिष्ठ॑तीष्टं ॐ व॒पया॑- [] 24

6.6.6.2

भ॒वत्य॑निष्टं ॐ व॒शया॑ऽथ पा॒त्नीव॑तेन प्र च॒रति॑ ती॒र्थ ए॒व प्र च॑रत्यथो
 ए॒तर्ह्ये॒वास्य॑ या॒मस्त्वा॑ष्ट्रो भ॒वति॑ त्व॒ष्टा वै रे॑तसः सि॒क्तस्य॑ रू॒पाणि॑ वि

करोति॑ तमे॒व वृषा॑णं पत्नी॒ष्वपि॑ सृजति॒ सोऽ॑स्मै रूपाणि॒ वि
करोति॑ । 25 (वपया॑ - षट् त्रि॑ंशच्च) (A6)

6.6.7.1

घ्नन्ति॑ वा ए॒तथ् सोमं॑ यद॒भिषु॑ण्वन्ति॒ यथ् सौ॒म्यो भव॑ति यथा॑
मृ॒ताया॑नु॒स्तर॑णीं घ्नन्ति॑ तादृ॒गेव॑ तद् यदु॒त्तरार्धे॑ वा मध्ये॑ वा जुहु॒याद्-
दे॒वता॑भ्यः स॒मदं॑ दध्याद्-दक्षि॒णार्धे॑ जुहोत्येषा॑ वै पि॒तृणां॑ दि॒ख्
स्वा॒यामे॑व दि॒शि पि॒तृन् नि॒रव॑दयत उ॒द्गातृ॑भ्यो हरन्ति॑ सामदे॒वत्यो॑ वै
सौ॒म्यो यदे॒व साम्नः॑ छं॒बट्कु॑र्वन्ति॒ तस्यै॒व स शान्ति॑रवे- [] 26

6.6.7.2

-क्षन्ते॑ पवि॒त्रं वै सौ॒म्य आ॒त्मान॑मे॒व प॑वयन्ते॒ य आ॒त्मानं॑ न
प॒रिप॑श्येदि॒तासुः॑ स्याद॒भिदि॑ कृ॒त्वाऽ॒वैक्षे॑त तस्मिन्॒ ह्या॒त्मानं॑
प॒रिप॑श्यत्यथो॒ आ॒त्मान॑मे॒व प॑वयते॒ यो ग॑तम॒नाः स्या॑थ् सोऽ॒वैक्षे॑त
यन्मे॒ मनः॑ प॒राग॑तं य॒द्वा मे॑ अ॒परा॑ग॒तं । रा॒ज्ञा सो॒मेन॑ तद्व॒यम॑स्मासु
धा॒रयाम॑सीति॒ मन ए॒वात्म॑न् दा॒धार- [] 27

6.6.7.3

न ग॒तम॒ना भ॒वत्य॒प वै तृ॒तीय॒सव॒ने य॒ज्ञः क्रा॒मती॒जाना॑ –
 द॒नी॒जान॒मभ्या॑ – ग॒नावै॒ष्णव्य॒र्चा घृ॒तस्य॑ य॒जत्य॒ग्निः सर्वा॑ दे॒वता॑
 वि॒ष्णुर्य॒ज्ञो दे॒वता॑श्चै॒व य॒ज्ञं च॑ दा॒धारोपा॑शु य॒जति॑ मि॒थुन॒त्वाय॑
 ब्र॒ह्मवा॒दिनो॑ वदन्ति मि॒त्रो य॒ज्ञस्य॑ स्वि॒ष्टं यु॒वते॑ वरु॒णो दु॒रिष्टं॑ क्व
 तर्हि॑ य॒ज्ञः क्व॑ य॒जमा॒नो भ॒वतीति॑ यन्मै॒त्रावरु॑णीं
 व॒शामा॒लभ॒ते मि॒त्रेणै॒व – [] 28

6.6.7.4

य॒ज्ञस्य॑ स्वि॒ष्टं श॒मय॒ति वरु॑णेन दु॒रिष्टं॑ नाऽऽ*ति॒माच्छ॑ति य॒जमा॒नो
 यथा॑ वै ला॒ङ्गले॒नोर्व॑रां प्र॒भिन्दन्॑ – त्ये॒वमृ॑ख्स्सामे य॒ज्ञं प्र॑ भि॒न्तो
 यन्मै॒त्रावरु॑णीं व॒शामा॒लभ॒ते य॒ज्ञायै॒व प्र॒भिन्ना॒य म॒त्यम॒न्ववा॑स्यति
 शान्त्यै॑ या॒तया॑मानि वा ए॒तस्य॑ छन्दा॑सि य ई॒जानः॑ छन्द्सामे॒ष
 रसो॑ यद् – व॒शा यन्मै॒त्रावरु॑णीं व॒शामा॒लभ॒ते छन्दा॑स्ये॒व पुन॑रा
 प्री॒णात्य॑ () या॒तया॑मत्वायाथो छन्द्ः स्वे॒व रसं॑ दधाति । 29
 (अ॒व – दा॒धार – मि॒त्रेणै॒व – प्री॒णाति॑ – षट्च॑) (A7)

6.6.8.1

दे॒वा वा इ॒न्द्रि॒यं वी॒र्यां॑(१) व्य॑भजन्त॒ ततो॑ यद॒त्य॒शि॒ष्य॒त तद॑ति॒ग्रा॒ह्या
अ॒भवन् तद॑ति॒ग्रा॒ह्याणा॑-म॒ति॒ग्रा॒ह्यत्वं य॑दति॒ग्रा॒ह्या गृ॒ह्यन्त॑ इन्द्रि॒यमे॒व
तद्-वी॒र्यं य॑ज॒मान॑ आ॒त्मन् ध॒त्ते तेज॑ आ॒ग्ने॒येनेन्द्रि॒य-मै॒न्द्रेण॑
ब्र॒ह्मव॑र्च॒सꣳ सौ॒र्येणो॑प॒स्तंभ॑नं वा ए॒तद्-य॒ज्ञस्य॑ यदति॒ग्रा॒ह्याश्च॑क्रे
पृ॒ष्ठानि॒ यत् पृ॒ष्ठे न॑ गृ॒ह्णी॒यात् प्रा॒ञ्चं य॒ज्ञं पृ॒ष्ठानि॒ सꣳ
शृ॒णीयु॑र्यदु॒क्थ्ये- [] 30

6.6.8.2

गृ॒ह्णी॒यात् प्र॒त्यञ्चं॑ य॒ज्ञम॑ति॒ग्रा॒ह्याः सꣳ शृ॒णीयु॑र्वि॒श्वजि॑ति॒ सर्व॑पृ॒ष्ठे
ग्र॒ही॒तव्या॑ य॒ज्ञस्य॑ स॒वीर्य॑त्वाय॒ प्रजा॑प॒तिर्दे॒वेभ्यो॑ य॒ज्ञान् व्यादि॑शत् स
प्रि॒यास्त॑नूर॒प न्य॑धत्त॒ तद॑ति॒ग्रा॒ह्या अ॒भवन् वि॑त॒नुस्त॑स्य॒ यज्ञ॑ इ॒त्याहु॑र्य-
स्या॒ति॒ग्रा॒ह्या न॑ गृ॒ह्यन्त॑ इ॒त्यप्य॑ग्नि॒ष्टोमे॑ ग्र॒ही॒तव्या॑ य॒ज्ञस्य॑ स॒तनु॑त्वाय॒
दे॒वता॒ वै सर्वाः॑ स॒दृशी॑रा॒सन् ता॒ न व्या॑वृ॒त-म॒गच्छ॑न् ते दे॒वा- [] 31

6.6.8.3

ए॒त ए॒तान् ग्र॒हान॑पश्यन् तान॑गृह्णताऽऽग्ने॑ यम॒ग्निरै॒न्द्रमिन्द्रः॑ सौर्य॑
सूर्य॑स्ततो॒ वै ते॑ऽन्याभि॑-र्दे॒वताभि॑-र्व्यावृ॑तमगच्छन्. यस्यै॒वं वि॒दुष॑ ए॒ते
ग्र॒हा गृ॒ह्यन्ते॑ व्यावृ॑तमे॒व पा॒प्मना॑ भ्रातृ॒व्येण॑ गच्छती॒मे लो॒का
ज्योति॑ष्मन्तः स॒मावद्-वी॒र्याः का॒र्या इत्या॑हुराग्ने॒येना॒स्मिन् लो॒के
ज्योति॑र्धत्त ऐ॒न्द्रेणा॒न्तरि॑क्ष इन्द्र॒वायू॑ हि स॒युजौ॑ सौर्ये॒णामु॒ष्मिन्
लो॒के- [] 32

6.6.8.4

ज्योति॑र्धत्ते ज्योति॑ष्मन्तोऽस्मा इ॒मे लो॒का भ॑वन्ति स॒मावद्-वी॒र्याने॑नान्
कुरु॑त ए॒तान् वै ग्र॒हान् ब॒न्बा-वि॒श्वव॑यसा-ववि॒त्तां ताभ्या॑मि॒मे लो॒काः
परा॑ञ्चश्चा॒र्वाञ्चश्च॑ प्रा॒भुर्यस्यै॒वं वि॒दुष॑ ए॒ते ग्र॒हा गृ॒ह्यन्ते॑ प्रा॒स्मा इ॒मे
लो॒काः परा॑ञ्चश्चा॒र्वाञ्चश्च॑ भान्ति । 33 (उ॒क्थ्ये॑ - दे॒वा - अ॒मुष्मिन्
लो॒क - ए॒कान्न॑ च॒त्वारि॑ञ्श॒च्च) (A8)

6.6.9.1

दे॒वा वै यद्-य॒ज्ञेऽकु॑र्वत तदसु॒रा अ॑कुर्वत ते दे॒वा अ॒दाभ्ये॑ छन्दा॒ऽसि
स॒वनानि॑ स॒मस्था॑पयन् ततो॒ दे॒वा अ॑भवन् परा॒ऽसुरा॑ यस्यै॒वं

वि॒दु॒षोऽ॒दा॒भ्यो गृ॒ह्यते॑ भव॒त्यात्म॑ना परा॒ऽस्य॑ भ्रातृ॒व्यो भव॑ति यद्वै दे॒वा
असु॒रा-न॒दा॒भ्ये-नाद॑भ्नुवन् तद॒दा॒भ्यस्या-दा॒भ्य त्वं॑ य ए॒वं वे॒द
द॒भ्नोत्ये॒व भ्रातृ॒व्यं नैनं॑ भ्रातृ॒व्यो द॒भ्नोत्ये॒- [] 34

6.6.9.2

-षा वै प्र॒जाप॑ते-रतिमोक्षिणी॒ नाम॑ तनूर्यद॒दा॒भ्य उप॑नद्धस्य
गृ॒ह्णात्य॑तिमु॒क्त्या अति॑ पा॒प्मानं॑ भ्रातृ॒व्यं मु॒च्यते॑ य ए॒वं वे॒द
घ्न॑न्ति वा ए॒तत् सोमं॑ यद॒भिषु॑ण्वन्ति सोमे॑ ह॒न्यमा॑ने य॒ज्ञो
ह॒न्यते॑ य॒ज्ञे यज॑मानो ब्र॒ह्मवा॑दिनो वदन्ति किं तद्-य॒ज्ञे यज॑मानः
कुरु॑ते येन जी॒वन्त् सु॒वर्गं॑ लो॒कमे॑तीति जी॒वग्र॑हो वा ए॒ष
यद॒दा॒भ्यो ऽन॑भिषुतस्य गृ॒ह्णाति॑ () जी॒वन्तमे॒वैनं॑ सु॒वर्गं॑ लो॒कं
गम॑यति वि वा ए॒तद्-य॒ज्ञं छि॑न्दन्ति यद॒दा॒भ्ये स॒-स्था॑पय-
न्त्यं॑ शूनपि सृ॒जति॑ य॒ज्ञस्य॑ सन्तत्यै । 35

(द॒भ्नोत्य॑ - न॒भिषु॑तस्य गृ॒ह्णात्ये॑ - कान्न॑ वि॒शति॑श्च) (A9)

6.6.10.1

दे॒वा वै प्र॒बाहु॒ग्रहा॑-न॒गृह्ण॑त॒ स ए॒तं प्र॒जाप॑ति-र॒ञ्शु-म॑पश्यत्
तम॑गृह्णी॒त तेन॑ वै स आ॒ध्नो॒द्-य॒स्यै॒वं वि॒दुषो॑ऽञ्शु-गृह्ण॑त
ऋ॒ध्नो॒त्ये॒व स॒कृद॑भिषु॒तस्य॑ गृह्णा॒ति स॒कृद्धि॑ स तेनाऽऽ*ध्नो॒न्मन॑सा
गृह्णा॒ति मन॑ इ॒व हि प्र॒जाप॑तिः प्र॒जाप॑ते॒राप्त्या॑ औ॒दुम्बरे॑ण गृह्णा॒त्यूर्वा
उ॒दुम्ब॑र ऊ॒र्जमे॒वाव रु॒न्धे च॑तुः स॒क्ति भ॑वति दि॒क्ष्वे- [] 36

6.6.10.2

-व प्र॒ति तिष्ठ॑ति यो वा अ॒ञ्शो॒राय॑तनं वे॒दाऽऽय॑तनवान् भवति
वा॒मदे॒व्यमि॑ति सा॒म तद्वा अ॒स्याऽऽ*य॑तनं मन॒सा गा॑यमानो
गृह्णा॒त्याय॑तनवाने॒व भ॑वति यद॒ध्वर्यु॑र॒ञ्शुं गृह्ण॑न् ना॒र्धये॑दु॒भाभ्यां
न॒र्ध्ये॑ता॒ध्वर्य॑वे च यज॑मानाय च यद॒र्धये॑-दु॒भाभ्या॑-मृ॒ध्येता॑नवानं
गृह्णा॒ति सै॒वा॒स्यर्द्धि॑-हि॒रण्य॑मभि व्यनित्य () -मृ॒तं वै हि॑रण्यमायुः
प्रा॒ण आ॑युषै॒वामृ॑तमभि धि॒नोति॑ श॒तमा॑नं भवति श॒तायुः॑ पुरुषः
श॒तेन्द्रि॑य आ॒युष्ये॑वेन्द्रि॒ये प्र॑ति तिष्ठति । 37

(दि॒क्ष्वे - नि॒ति - वि॒ञ्शतिश्च॑) (A10)

6.6.11.1

प्र॒जाप॑ति-दे॒वेभ्यो॑ य॒ज्ञान् व्यादि॑शत् स रि॒रिचा॑नोऽम॒न्यत॑ स य॒ज्ञानां॑
 षोड॑शधेन्द्रि॒यं वी॒र्य॑मा॒त्मान॑म॒भि सम॑क्खि॒दत् तथ् षोड॑श्य॒भव॑न्न वै
 षोड॑शी नाम य॒ज्ञोऽस्ति॑ यद्वाव षोड॑शऽस्तोत्रं॑ षोड॑शऽश॒स्त्रं तेन॑
 षोड॑शी तथ् षोड॑शिनः षोड॑शित्वं यथ् षोड॑शी गृ॒ह्यत॑ इन्द्रि॒यमे॒व
 तद्-वी॒र्यं य॑ज॒मान॑ आ॒त्मन् ध॑त्ते दे॒वेभ्यो॑ वै सु॒वर्गो लो॒को- [] 38

6.6.11.2

न प्रा॒भव॑त् त ए॒तऽषोड॑शिनमपश्यन् तम॑गृह्णीत॒ ततो॑ वै तेभ्यः
 सु॒वर्गो लो॒कः प्रा॒भव॑द्यथ् षोड॑शी गृ॒ह्यते॑ सु॒वर्गस्य॑ लो॒कस्या॒भिजि॑त्या
 इन्द्रो॑ वै दे॒वाना॑मा॒नुजा॑वर आसीत् स प्र॒जाप॑तिमुपा॒धाव॑त् तस्मा॑
 ए॒तऽषोड॑शिनं प्रायच्छत् तम॑गृह्णीत॒ ततो॑ वै सोऽग्रं॑ दे॒वता॑नां
 पर्ये॑द्-यस्यै॒वं वि॒दुषः॑ षोड॑शी गृ॒ह्यते- [] 39

6.6.11.3

ऽग्र॑मे॒व स॒माना॑नां पर्येति प्रातः स॒वने॑ गृह्णाति॒ वज्रो॑ वै षोड॑शी
 वज्रः॑ प्रातः स॒वनऽस्वादे॒वैनं॑ यो॒नेर्नि॑गृह्णाति॒ स॒वने॑स॒वने॑ऽभि

गृ॒ह्णाति॑ स॒वना॒थ्-स॒वना॒दे॒वैनं॑ प्र॒ जन॑यति तृतीयस॒वने॑ प॒शुकाम॑स्य
 गृ॒ह्णीया॒द्-वज्रो॑ वै षोड॒शी प॒शव॑स्तृतीयस॒वनं॑ वज्रेणै॒वास्मै॑
 तृतीयस॒वनात् प॒शून॑व रुन्धे नोक्थ्ये गृ॒ह्णीया॒त् प्र॒जा वै प॒शव॑
 उक्थानि॑ यदुक्थ्ये- [] 40

6.6.11.4

गृ॒ह्णीया॒त् प्र॒जां प॒शून॑स्य निर्दहे॒दति॑रात्रे प॒शुकाम॑स्य गृ॒ह्णीया॒द्-वज्रो॑
 वै षोड॒शी वज्रेणै॒वास्मै॑ प॒शून॑वरुध्य रात्रि-योपरि॑ष्टा-
 च्छम॑यत्यप्यग्नि॒ष्टोमे॑ राज॒न्यस्य॑ गृ॒ह्णीया॒द्-व्यावृ॑त्कामो हि राज॒न्यो
 यज॑ते सा॒ह ए॒वास्मै॑ वज्रं गृ॒ह्णाति॑ स ए॒नं वज्रो॑ भूत्या इन्धे निर्वा
 दह॑-त्येकविंश॑ स्तोत्रं भवति प्रति॑ष्ठित्यै हरि॒वच्छ॑स्यत इन्द्र॒स्य
 प्रि॒यं धामो॑- [] 41

6.6.11.5

-पा॒प्नोति॑ कनी॒याँसि॑ वै दे॒वेषु॑ छन्दाँ॒स्यास॑न्-ज्या॒याँ-स्य॑सुरे॒षु
 ते दे॒वाः कनी॑यसा छन्दा॒सा ज्या॑यः छन्दोऽभि॒ व्यश॑ँसन् ततो॒ वै
 तेऽसु॑राणां लो॒कम॑वृज्जत यत् कनी॒यसा॑ छन्दा॒सा ज्या॑यः छन्दोऽभि

वि॒श॒स॒ति॒ भ्रा॒तृ॒व्य॒स्यै॒व त॒ल्लो॒कं वृ॒द्धे ष॒डक्ष॒राण्य॒ति रे॒चय॑न्ति
षड् वा ऋ॒तव॑ ऋ॒तूने॒व प्री॑णाति च॒त्वारि॒ पूर्वा॑ण्यव कल्पयन्ति-[] 42

6.6.11.6

चतु॑ष्पद ए॒व प॒शून्व॑ रुन्धे द्वे उत्त॑रे द्वि॒पद॑ ए॒वाव॑ रुन्धे
ऽनु॒ष्टु॒भम॑भि सं पा॒दय॑न्ति वा॒ग्वा अ॒नुष्टु॑प् तस्मा॒त् प्रा॒णानां॑
वा॒गु॒त्तमा॑ स॒मया॑विषिते सूर्ये षोड॑शिनः स्तोत्र॑-मुपा॒करो॑त्येतस्मिन्
वै लो॒क इन्द्रो॑ वृ॒त्रम॑हन्त् सा॒क्षादे॒व वज्रं॑ भ्रा॒तृव्या॑य
प्र॒ हर॑-त्यरुणपि॒शङ्गो॑ऽश्वो दक्षि॑णैतद्वै वज्र॑स्य रू॒पं स॒मृद्ध्यै॑ । 43

(लो॒को - वि॒दुषः॑ षोड॑शी गृ॒ह्यते॑ - यदु॒क्थ्ये॑ - धाम॑ - कल्पयन्ति
- सप्त॑चत्वारि॒ंशच्च॑) (A11)

Prasna Korvai with starting Padams of 1 to 11 Anuvaakams :-

(सु॒वर्गा॑य यद् दाक्षि॑णानि - समिष्ट॑ यजू॒ - ष्य॑वभृथ यजू॒षि -
स्प॒येन॑ - प्र॒जाप॑तिरेकादशिनी - मिन्द्रः॑ पत्न्या॒ - घ्न॑न्ति - दे॒वा
वा इन्द्रि॑यं वी॒र्यं॑ - दे॒वा वा अदा॑भ्ये - दे॒वा वै प्र॒बाहु॑क् -
प्र॒जाप॑तिर्दे॒वेभ्यः॑ स रि॒रि॒चानः॑ - षोड॑शधैकादश)

Korvai with starting Padams of 1, 11, 21 Series of Panchaatis :-

(सुवर्गाय॑ – यजति॑ प्रजाः – सौम्येन॑ – गृह्णीयात्॑ प्रत्यञ्चं –
गृह्णीयात्॑ प्रजां पशून् – त्रिचत्वारिंशत्॑)

First and Last Padam of sixth Prasnam of 6th Kanda :-

(सुवर्गाय॑ – वज्रस्य॑ रूपं॑ समृद्ध्यै॑)

Kaanda Korvai with starting Padams of 6 Prasanams of Kanda 6

(प्राचीनव॑ंशं – य – च्चात्वाला॑ – द्यज्ञेने॑ – न्द्रः॑ –
सुवर्गाय॑ – षट्)

॥ हरिः॑ ओं ॥

॥ कृष्ण यजुर्वेदीय तैत्तिरीय संहितायां षष्ठकाण्डे षष्ठः प्रश्नः समाप्तः ॥

॥ इति षष्ठं काण्डं ॥

Details of Anuvakam, Panchati and Padam for Kandam 6

	Anuvakam	Panchati	Padams
Prasna 1	11	76	3840
Prasna 2	11	59	3085
Prasna 3	11	62	3155
Prasna 4	11	51	2626
Prasna 5	11	42	2150
Prasna 6	11	43	2125
Total	66	333	16981